


Литература Дагъистан

16+

Гьалмагъдеш


ЛИТЕРАТУРНО-ХУДОЖЕСТВЕННЫЙ И ОБЩЕСТВЕННО-ПОЛИТИЧЕСКИЙ ЖУРНАЛ

5/2018
сентябрь - октябрь



110
дус

Габдулмажид Гялихановлис





Гьалмагъдеш



ЛИТЕРАТУРНО-ХУДОЖЕСТВЕННЫЙ
И ОБЩЕСТВЕННО-ПОЛИТИЧЕСКИЙ ЖУРНАЛ

Учредитель: Министерство печати и информации РД

РУКОВОДИТЕЛЬ - БЕКИ РЕДАКТОР
Мурад ГИЯХИМАДОВ

ЖАВАБЛА СЕКРЕТАРЬ
Т. ЗУРГЪАЛОВА

РЕДАКЦИЯЛА КОЛЛЕГИЯ
XI. Кьурбанов (журналла редактор)
Кь. Мигърабов
Т.СягИдов

ЖАМИГИЯТЛА СОВЕТ
А. Гябдулмананова
И. Ибрагъимов
Ш. МяхИяммадов
Х. ХИябидова
Х. Юсупов
И. МяхИяммадов

5
2018

сентябрь - октябрь

Кел бази гьачам
дурабулхъан

Выходит один раз в два месяца

1952 ибил дуслизиб
акIахъубси саби

Журнал основан в 1952 году

Государственное бюджетное учреждение
Республики Дагестан “Редакция республиканских литературных
журналов “Соколенок” и “Литературный Дагестан”.



ЖУРНАЛЛИЗИР ЛЕР:

ГІЯБДУЛМАЖИД ГІЯЛИХАНОВЛИС – 110 ДУС

ГІябдулмажид ГІЯЛИХАНОВ. Лекторла архІя..... 3

ДРАМАТУРГИЯ

Къасум-Бег МИГЪРАБОВ. Къуллукъчиби..... 21

ПРОЗА

Ибрагъим ИБРАГЪИМОВ. ЦІализиб ва хІилизиб.....35

Хадижат ХІЯБИБОВА. Чарбухъни.....49

ПОЭЗИЯ

ХІябиб КЪУРБАНОВ. Дунъя бисули саби.....55

ТАРИХЛА БЯХІЯНИ

ПатІмат МАЛЛАЕВА. Ахъушан ГІяли-ХІяжи.....58

Тавсултан СЯГИДОВ. ХизриХІяжи устад.....68

НУШАЧИВ ГІЯХІЛАДЛИ

КІарахъала поэт Макъсуд ЗАЙНУЛГІЯБИДОВ. Дявти (*поэмализирад бутІни*).....79

ОЧЕРКУНИ

Аминат ГІЯБДУЛМАНАПОВА. Леблалра дагърилизив калунси.....83

МяхІяммад ТАХСУРМАНОВ. Район ахъбарисси.....86

ФОЛЬКЛОР

МяхІяммад КЪАРАТОВ. КІел къянала хабар.....94

Регистрационный номер ПИ №ТУ05-00369 от 23. 12. 2016 г.
Выданный управлением Роскомнадзора по Республике Дагестан.

Типография: ООО «Издательство «Феникс-пресс»
Адрес типографии: 367018, РД, г. Махачкала, пр. Петра I, 61

ГЪАЛМАГЪДЕШ №5 2018 г.

На даргинском языке

Выход в свет 28.09. 2018 г. Тираж 301 экз.

Заказ № 250 Цена свободная.

Печать офсетная. Бумага офсетная.

Формат 70x108 $\frac{1}{16}$.

Усл. печ. л. 8,4.

Усл. изд. л. 8,7.

Редакция и издатель: Государственное бюджетное учреждение Республики Дагестан “Редакция республиканских литературных журналов “Соколенок” и “Литературный Дагестан”.

Адрес редакции и издателя: 367000, РД, г. Махачкала, ул. Даниялова, д. 55.

Электронный адрес редакции:

litdag@mail.ru

Анхдугахайчиргад 110 дуг

Гябдулмажид
ГЯЛИХАНОВ



ЛЕКТОРЛА АРХИЯ

Х а б а р

I

Ну аркъуси шилизи автобус башуси ахIенри, илбагъандан ну хIябкъяйличив кацIибси автобус итмадан батбихъиб ва хивла ахъти галгубала гIелаб, чула дуб чехIебути унхърани къяраибсиван беткахъиб. Ну тIашси хIябкъяй вацIалира унхърала халати галгубара алавбуцилри. ВацIа, хIябкъяйличира кабаили, алгъай шайчибси ахъси дубурла бекIличира чебяхIахъилри. БуцIарси берхIи бархъли бекIличи чекабизурлири ва чинабадалра цIуэри чейгули ахIенри. Амма вацIара унхърира сагаси, умуси гъавали гъигъдикIулри, вава-къарли тIемдикIулри. Дубурла шухIярлабад кабухъунси биштIаси хIеркI, лугIяна цIуба шурличибад чяхIбикIули, берхIила нурлиуб, дяхIимцIала къяйда, ухулри.

Ну автобусличив левалли милигсири ва ил биштIаси хIеркIла чяхI-чяхIила гъала ши ужес гъамиубра. Рахли ца шайчивад набзи вявикIусила иргъулра:

– Иша, гIинизличи, ваши валликъяна, ши ужес.

Ну илала тIамаличи шурухъунхIели, вацIала бегIлара хъар дубличирти жагали вавнадяхъибти хурла галгубала дяхIцIилиу кайибси адам чеира.

Держес или дила мехIлизи гIяхъибти хIеркIла дугIярти шин хIедержили чябхъдарра. Дила саламлис саламра чарбатурли, айзурли дила някъра буцили гIергъи, шулгIирти хъанцIа шурмала гъярбиклабад чяхIбикIули кабухъунси гIинизличи лишанбарилри, илини иб:

– Иш гIинизла шин датурли, адам хIеркIла шинни ужару? ДугIярти, кункти, адамла къаркъайс дебали гIяхIти шин сари ишди.

Шин дужухIели, марлира, дила цулбачи илди миъван дугIяригулри.

ГIинизлар дяхI-някъра дирцили, ил юлдашла шулгIи дяхIцIилиу кайира.

Хурла галгали зумали дерхъибти духъянти къялуби бекIла черкад гъадатурлири. Илдала дяхIцIили гIиниз-алавси диркъа кIапIбуцилри. ВацIализибад къугъати макъамтачил чIив-чIив или дучIути арцантала бикъулри. Алавчарси къугъадешли уркIи шадбирахъулри. Биалра, къалабаикIулра, шилизи ваэс машина мурт бирусил багъес дигулра.

– ХIура машиналичи хIерикIуси хIейиши? «ХIунтIена байрахъ» колхозлизи ишад сецад гъуни леба? – хъарбаира нуни илизи.

– Нура икIа сайра аркъуси. Гъуни викIадли, вецIну шура-гъал километр сеналра бургар.

– Машина мурт бирарал хIебаладу?

– Машина викладли, мурт бирарал нуни хЕбалас: ишбархИи я бирар яра бирхЕбирар. Илди кИлизибад ца бирни сеналра балас, уртахъ, – иб илини, ва, набчира дила мякъла кабихъибси портфельчира разили хИинцИдикЛути халати хИулба хЕрикЛули, сунела дерхъибти хИяна супелти хъатли хИяршдариб. Илала гамса, чИучИубалхунси вяхИла камра шалаахъибсиван кабизур. Сен-биалра наб ил адамла масхара гИяхИхЕбизур. Набзи ну викЛури: «Се саби ишини набзи буриси? Ну хъяша-мага хЕйиша, дукелцИиличи кайхъес. Дила портфельчи се гъанбикили хЕрикЛусира?»

Наб сунела масхара къабулхЕбикни хЕбагъахъес, нуни гъарахъли дугИ хЕръира. Мусисиртличиб унхърала ца дубличибад сагали бацунси чИяртИа хъуличиб гъарш кабуцили бетухъунси трактор биштИали чебиулри.

– ИшбархИи гИямалагара ну колхозлизи ветхЕэс. Белики, машина бекИлил хЕбакЕс, илхЕли се бириси?

– Чили бала, мурт ва се машина лябкъянал? Ишарад машинаби автобусван заманаличир дашути ахЕнгу, – иб илини.

Нушала ихтилат бемжур. Нуни илизи бурра, ну чула шилизи МяхИячкъалализивад лявкъуси лектор виъниличила. Илинира набзи буриб, сай ну аркъуси шилизивси колхозник виъниличила. Илис ИзибяхИянд бикЛусири. Сай ВагИа дергъла чулахъ сайри. Ил буркъа дяхъи хИянбердили, больницализив калири.

БахъхИи агарли гъарахълабад лявкъуси машинала гИама иргъесбяхИиб. Ну някъ ахъбуцес харчизурхЕли, ИзибяхИянд набчивра гъалаухъи, гИясара убирхъули, гъунила дубла гъамирулри. Мотоцикл буилри. Някъ ахъбуцили, гъунчи гИашизурси ИзибяхИяндличичи абаибмад, ил гИашаиб.

Мотоциклличивси гъал-гъану кИира дусла дурхИяли, сунела диштИати къерхЕ хИулби набчи хЕрдирули, къяшмачивад бекИличичи бикайчи ункъли хИясибирулра.

Иличичи хЕрикЛули, ну пикриикЛула: «Иш ИзибяхИяндхъала шангъуна ахЕн. Виалри, кЕл баз чула шав агарси, лявкъуси ИзибяхИяндличил яхши-хушдири. Шила адамта цабехИли цабехИ балули бирар, бизили дугъабилзан, биштИатани халатала хИурматбарес дигахъу...»

ИзибяхИяндли, набчибяхИра мотоциклличира гИясаличил лишанбарили, иб:

– ХЕра гъари, дила урши ГИядулварисхан! Иш гъалмагъ нушала колхозлизи МяхИячкъалализивад къалабаси къуллукълис лявкъуси адам сай, чекати, хЕла хъали, хЕла машиналичичи, арука, ну биалли багълали вашули лявкъяс.

ИлхЕли ну вализурра ИзибяхИяндлизи эс: «Се биубли хъалли, хИу гЕлавататурли, ну аркъуси ахЕнра, хИу ишичил укъен, ну вашули лявкъяс».

– ТаксикЛун хЕбиэс иш, гъуни-гъундурачичи къалабабикЛути чекабалтес! – иб мотоциклла вегИли, ИзибяхИяндла гъайличичи къабулхЕйкили. Ил дукаряхИиб ва, гягИти гавлара хясалара кИана гЕлаб батурли, хИулбала гъалавад кИунацИиб.

ИлхЕли нуни шурухъи ИзибяхИяндличибяхИ хЕръира. Ил дяхИла ранглизив валли вехИсуркайублири, мотоциклличичи гЕлавад хЕрикЛули, гъимилличил бекИли гъакИикЛури, ну дила убла мерличичи дяхИцИилиу кайира, илра наб гЕлавад вакИили, мякъла кайиб.

Рахли ИзибяхИянд тяп виштИаси дурхИяван пишяхъили дукаряхИиб, бекИра гъакИ-гъакИбарили, иб:

– Агъ, усалси дудешла увяхИси урши хЕйалли!

– Чи сайри ит?

– Нушала колхозла председателъла урши сайри. ХИукЛун МяхИячкъалализивад нушачи къалабаси къуллукъличил лявкъусири. Ит, хяла кецИа, колхозла мотоциклличив кеплис ласикЛули сай.

– Чи сая хІушала колхозла председателъ?

– Илала кІел у лерти сари: ца – МяхІяммад – сунела неш-дудешли бихъибси, цара – Лявбатир – халкъли бихъибси. МяхІяммад или хъалли, нушала адамтани илала у хІебала, лебилра Лявбатир бикІар, сенкІун илини сунечиб халати хІякимтас ялавкардеш диру. Колхозникунас биалли ил адамдеш агарси, уктемси адам сай. Лявбатир председателъли вахъхІи виубли ахІен. Амма, вахъхІи виубли, пайдара хІебииши. ХІуни сай чейид, иличила гъайхІедикІехІе, – гъай къантІдариб илини.

Нура ИзибяхІяндра гІинизла мякълар дарх къацІли дукунра. Цалис ца гІяхІялдиубли, сай шагъарлизи вакІибхІели, гІяхІладли набчи вашахъес дила хъа адресра илизи бедира. Илала гІергъи нушала ихтилат гІурра гІяхІил бемжур. Замана багълали аркъулри. ХІери гІергъи биулри.

II.

Дила къакъла гІелабад хабарагарли лявкъуси адамла гъайла аргъира:

– ИзибяхІянд, чинадри, сери?

Ну гъайкІусиличивяхІ шуряхъира. Чейула нушачивяхІ савхъи лявкъуси адам: ахъси ахІенси къаркъа, буркъдешли къантІкабиубси сукъбайчилси, цІуба варгъила къапІала вегІ, масхІура мулебкІан мачуйтира сайра, цІуб арцІи арра къяртІалара дуцибси кІел декІван бухъяна ханжайчил. Чез ил шуцІанну шура дусра-сера виубсигъунари. Илала къанца гъезла муцІур-супел тъякІли къи-цІдарилри. Демдурти пушагІибти нудбалара хІунтІена къяпІикІуналара удирад хІябмузан хІулби думхІяхъули, ИзибяхІяндла някъ буцес сунела гъабатур:

– Ассаламу гІялайкум! – салам гиб илини; хъарчІайчирти хунжи черкасиб, ца шайчи гІяса лайбакІиб.

– ВагІялайкум салам, Агъада-Малла! ХІу чинадри, хІу сери? ХІела арадеш сена?! – иличил бизити яхши-хуш дариб ИзибяхІяндли.

Агъада-Малла гІинизличи гъамиубли ши ужиб, гІур илди кІилалра ургаб ихтилат бемжур. Ну лехІкахъира, ил маллани ИзибяхІяндличил ахІи, набчил гъай бархмагІебиахъуб, нунира сунезиселра или гъайхІеира. Ну, хІулбира къяпІдарили, дяхІцІилиу хъарихъири.

– ХІу чинав калунри, чинад лявкъусири, ИзибяхІянд? – хъарбаиб Агъада-Маллани.

– Ну, валлагъ, курортличив кали, чарухъи лявкъусира, – жаваб бедиб ИзибяхІяндли.

– Курортличиб гІяхІил бурги, хІуша ункъли далхули дургудари?

– ГІяхІси мер сабри, Агъада-Малла, дигусигъуна беркала, изутас дармунти – селра камси аги. ХІу, уртахъ Агъада-Малла, чинад дураикилри вашхІешуси мерличи?

– Ну чиналра вашули вирус. ХІуни баладгу, Аллагъли ну сунес лагъдеш дарахъесра халкълис къуллукъ барахъесра акІахъубси адам сайра. Набчи хІяжатдеш лебтала къуллукъ бартаахъес багъандан, ну чина-дигара вашес гІелумхІелзас, Аллагълизи шукру! – иб ва някъ муцІурличибад хІяршбариб. ГІур сунела архІяличила хабар бехІбихъиб.

– ХІябал бархІи гъалав Насиркентлизивад ца адам вакІиб, вархъли дила хъайгІи. Ил викІар, валлагъ, хІу нушала ша арукес вакІилра, сеналра хІекІес гІямал хІебирар, вакІнила къяш-хІекъра хІед нуни, викІар, урхІилиничиб хІяйнали имцІали лугас. Ну илизи викІулра: лявкъяс, Аллагъ хъумхІертути адамта ну гъимхІергахъура, хІушагъунта гибси секІайчи хъарси дила хІекъра хІуни хІебукни балас. – Набзи илини сай мурдали кибси урчи гиб, сай биал-

ли хьурали гьамси дякъад арякъун. Ну хан гьунчивад багълали урчиличив арякъунра. Хѳера, хѳябал бархѳи ихав кали, лаг льякъусира.

– Катхѳел урчиличив арукибсила лаг сен вашахьули вархьибсирив гьатѳи? – иб Маллази Изибяхѳяндли.

– Сабурбара, уртахь Изибяхѳянд, нуни бурис, ну сен урчи агарли вархьибсирал. Ну ил адамли чула ша арукибсири, сунела хьуна магьар баргахьес... Хѳези нуни бархьли бурасли, Изибяхѳянд, шаригѳят хѳясибли, ил гьабзала хьуна магьар агара или, чула шилизибти маллубани бурили, хьунул муруйзирад декѳарли сунела бегѳтачир хѳеррирулри. Чили-сабрил набчила илизи бурилри, валлагь, ишгьуна хабарла халаси гѳялим сай Агьада-Малла, икѳини ца се-биалра барили, хѳушала магьар бургу или. Илра разивиубли колхозла урчира сасили сайра, набчи дуцѳухьи сай. Селичи хѳекѳеса, я сунес, я сунела хьунуйс декѳарбикес дигули ахѳенри, кѳелра чус биубси хабарагарси анцѳубкьличи пашмай нургьба ушкули буилри.

– Нуни иргьули ахѳенра. Чус цалисалра декѳарбикес хѳейгули гѳергьѳи, магьар сен бушибси гьатѳи? Ил чили бушибси? – иб Изибяхѳяндли, Агьада-Маллачи хѳердирути хѳулби черхѳейсули.

– Бурулра, сабурбара. Мурул бержили кепли кали сай. Кепдешли хѳебалули хьунуйзи илини хьарбарили сай, дуги-дугили рякъѳи, гѳярякъѳила шишни асахьес. Ишди дила кѳелра юлдашлисра набра держес гьариллис ца-ца гѳярякъѳила шиша бусягѳят хѳехадли, хѳела магьарла хѳябалра тѳалакъ кадикиб викѳули, хьунуйзи магьарла дугьби дурили сай. Хьунул жагьил хьунул адам сари, нунира чераира; бара гьанна балугьраибсигьуна. Ца баз-байхьала гьалаб хьайчикабибти буилри, цалис ца дебали дигули. Тукен гѳекѳили буилри. Муруй ибси барес хьунуйс дигулиригу, дайдугила манзил буилри...

Ил дуги кепси муруй, гѳярякъѳи хѳедаргили или, сунела неш-дудешхьалачи хьунул гьаряхьилри. Гѳергьѳила бархѳи биалли сунела хатѳаличи пашманиубси мурул хьуна бегѳтачи илди чебберхахьес, хьунул сунечи чаррухахьес тѳиладиличил вякъѳи сай. Динничи вирхаруси хьуна дудеш викѳули сай: «Юх, хѳуни магьарла дугьби шаригѳятла гьуйчир дурилри, рурси чархѳеририс». Илкьайда вецѳал бархѳира-сера дикили гѳергьѳи бареси хѳебалуси ил набчи кьаршиикили сай.

Магьарла дугьби дурухѳели, барх кьаршибикибтази нуни хьарбаира. Илданира анцѳубкь илгьуна биъни марбариб. Ну илди мурул-хьунуйзи викѳулра: «Хѳушала магьар гьарли-марли кабикили биъни багьандан, декѳардикес хѳяжатли саби, дарх хѳердиэс шаригѳят хѳясибли, сегьуналра гьуни агара». Хьуна хѳулбазирад нургьби гердикѳули сари, мурул биалли, хѳярхѳяли вяхьибсиван уркѳухьѳи, викѳули сай: «Гѳур бареси селра гѳямал агарсив? Нушала загс хѳебехьубли лебалсигу!» Ну викѳулра: «Ну шаригѳят хѳясибли сайра гьайикѳуси, нуни загсла къуллукь хѳебалас... Загсличила шаригѳятлизиб бурили ахѳен. Хѳушаб дарх хѳердиэс калунси чѳянкѳли ца гьуни саби: рухѳи-магьар дихьни. Илди гьала-гьала уркѳухьун. Итмадан мурул викѳули сай: «Сен-сен вегѳла хьунул урхѳилис хѳябал бархѳилис редес вирусив? Или ибси се ибси? Юх, вирхѳейрус». Гѳур хьуна неш-дудешра шаригѳятла магьар агарли рурси муруйчи чаррарес къабулхѳебиркули калун. Илхѳели сунела хьунуйс рухѳи-магьар дихьяхьес, урхѳилис хѳябал бархѳи шери редес ил къабуликиб. Илала гѳергьѳи сагали магьар дихьяхьили, сунечи чарриру. Шаригѳятла ил бархьси гьуни сунези нуни аргьахьибхѳели (белики, иличи къабулхѳейкиб визс), муруй, наб секѳал хѳегили, вацѳли вархьес къасбариб. Илхѳели нуни сунези ира: «Ну иша кибнила хѳекь хѳуни гес гѳягѳниси саби, ну хѳушагьунтани гѳибсилечи

хъарси адам сайра...» Илини кисалабад абити дила къяшмала гъала гъану шура къурушла кагъар лайбакиб. Сунени мурдали вархъес урчи чина гиши наб, цулбази бяхъес къаркъа хелуги. Урчи биха или, нунира хеира.

Ил шилизир дила гурра къуллукъуни лерри, чумбехира изутас кими дарра. Хянчи дахъдаили, гъанна бикайчи калунра. Магъар бушибси ил шилизив ца гъати леври. Илала магъар нуни баргира. Илис ишгъуна бетаурсири... – хабар байбяхъили, Агъада-Маллани гяшли хъарбаиб.

– Иш чи сая, чинадла адама?

– Мяхъкъалализивад командировкаличи лъвкъуси адам сай, – жаваб бедиб Изибяхъандли.

Ну, дила хулби дускаахъи, лехкахъилра.

Ну Агъада-Маллани чула мез хедалуси адамлизи халварра ва, цакамси замана лехкахъили, иб:

– Нуни хези, урки бирхули, илди секлал дурулра, амма урхлизи дурес асухебирар.

– Ил секлал нунира балас, – иб Изибяхъандли.

– Аммаки илди адамтала уми нуни хезира хедурис.

– Уми хъажатли ахен, хабар бура.

– Бурасли, гъажаибси секлал бетаурлири киэсиллисра, гъи-гъи, гъи-гъи! Се-биалра, чула шилизибти маллубани хебаргибси магъар нуни баргира. Ге, баргира нуни. Ит шила маллубира балли набчи тамашакабиуб... Мурул виубли сайри авцали дусичив имцали. Хъунул викладли, сунечир вецлал дусра-сера риштасири. Илдала хъабал-авал биштатира лебри. Ца бархи хъунул муруйзи риклули сари: «Иш анкила гавлаг шинкъала бухес, чила-биалра эмхера баргили, хунира кумекбарагу, нуни рякъи дукъахъисну». Сен саял илав мурул хъунуйчи гъимукли викулли сай: «Ну хянчила къанирулрану, хуни къакъличи гелакахъили буха, хугъунти урхла хъунрира шинкъани гелакахъили башулину...» Хъунул риклули сари: «Дила илцад цлакъ агара, рирхерирус». Илхели, лехихъути хъабал-авал адама лебли, муруй или сай: «Нагагъла гавлаг бицибти ризкъи хуни гелакахъили шинкъала хедухадли, хела магъарла хъабалра таллакъ кадикаб».

Гъайгъай, ил зягипси, биштаси къаркъа хъунул адамли илди шел пут ризкъила гелакахъес херири.

Ил хуна узини сунела рузи, магъар кабикилину, хералтас викулли, муруйчирад декларрили, чучи аррукилри. Хуни балад, Изибяхъанд, биштати дурхнира сайра ил мурул пашманиубли, чула шилизибти маллубачи вашули уилри, дила хуна магъар баргая или. Чула шилизибти маллубанира бареси хебалули, ну чула шилизив левни багъурхели, набчи баклиб.

– Гъу, хуни сен-сен баргири гъати илдала магъар? – суал бедиб Изибяхъандли.

– Нуни илдала магъар кахебиркуси гъуни баргира. Ил баягъи анкила гавлаг чула хулиб ташли лебри. Гъала-гъала бабгахъира унцала уркура. Гур ил баягъи анкила гавлаг ил хуна къакъличи гелакахъили, уркурлици каратурра. Къакъличибад гавлаг чебхесили, уркура шинкъала унзала гъала ташкаиб. Илад кел гъати адамли ахъбуцили гавлаг шинкъала бухнаб хуна къакъличибад чебкасиб. Хулибад шинкъала кабаайчи декдеш уркурличиб биалра, гавлаг хуна къакъличиб гелакахъилри... Хера, ихи баргира илдала магъар кахебикеси гямал. Ил нуни чус барибси халаси гъахъидеш чули дилара бацли хебатур. Ну дебали разиварра, Аллагъ чучира разивиабну, – таман-бариб Агъада-Маллани хабар.

Маллала хабарличи ИзибяхИянд, тамашали гЯкбяхъили, вацІа бучІахъули, дукаряхІиб. Мала, иличи уркІухъи, харчли айзур, сунела хунжачира гЯса-личира хъямикун.

– Валкъарусигъунаригу? – иб ИзибяхИяндли, дукелцІи тІашаэс къайгъи-бирули.

– Гъанна ну вашус, ИзибяхИянд.

– Багълабарагу, уртахъ Агъада-Малла, белики, айэси бирар, – иб ИзибяхИяндли.

– Юх, аркъяс. Ишаб, махъилаб, ца дила къуллукъра лебси саби. Аркъяс.

– ХІу тІашизадри, нушачи гЯхІладли аркади. ХІела шайзирад Жавгъарличи саламтилра хІедурхъулрив? Ягъари, нушачи вашалра хІешудгу, ца Жавгъар багъандан лебил шантачил къидавиубсиригъ?

Агъада-Маллала дяхІла сипат хапли хІунтІен-цІяббиубли бехІсурбиуб. Чеди хІерикІусили багъеслири, Жавгъарла у гъанбушибхІели, изуси жижкІа-личичи къячикунхІеливан Маллас дебали хІейгизни.

– Наб Жавгъар селис хІяжатли? Набзи хІуни ил гъанмаруршид! – ИзибяхИяндличичи гъимила хІулбани хІеръиб ва, арцурси дягІван, гъунчи дураухъи, лагбяхІ гъайбариб.

III.

– Жавгъарла у хІуни гъанбушибхІели, Маллас дебали хІейгизургу. Чи сари ил? – хъарбаира дила гЯхІяйзи.

ИзибяхИянд хъарихъунси мерличивад ахъиуб, пишяхъили набчивяхІ шурухъун ва, къяшми дергурли, кайиб. ГІур, супелтира хІяршдарили, хабар буриб:

– Жавгъар – нушала колхозла парторг сари. ВакІибхІели шилизи хІуни чериид, уртахъ ГІяли. Ил хІералуси камли вирар...

– Гъа, марлира, жявлил ралуси сари нуни, – ира ИзибяхИяндлизи, – Жавгъар колхозла бригадир рирухІели, илини бекІдеш дируси бригадали анкІила халаси сабухъ сархибсири, Ленинна орденра касили, Москвализирад чаррухъунхІели, нуша ца вагойзир къаршидикибтири. Илала хІурматлис бахъал халкъ дам-дядличил вокзаллизи гъала бакІибтири.

– Бархъси саби, уртахъ ГІяли, баягъи тѧп ил хІу викІуси Жавгъар сари. ИтхІели дам-дядличил дурабухъунтачил варх нура левсири... Жавгъарлис нушала адамти Жавгъар-духури бикІули бирар. ХІерагу ца, уртахъ ГІяли, хІунира ил ункъли ралули уилри, илала хабар МяхІячкъалализиб ахІенну, Москвализигра тІинтІбиубли саби. Жавгъар нушала председателхІели, колхоз хъярхъли чеахъбикІули бири, – иб ИзибяхИяндли ва чеимцІабариб: – Тѧп ил хІу викІуси нушала Жавгъар их Агъада-Маллас шери рякъунсири. Иличир рахъхІи калунси ахІенри. Жавгъарли Агъада-Малла гъарли-марли шилизивад дугІкаиб ва илала гІергъи гъанна хІябцІали дусра-сера нушала шилизи вакІибси ахІен. Ну итхІели НурбяхИяндхъалачив хъубзарли вираси. Жавгъархъала юрт дила хабчабла унраличиб бири. Жавгъар ит замана жагъти гІямруличир рири, цархІилти лебилра дубурлан хъунул адимтаниван суненира белкІес-белчІес хІебалуси, сунела хъа хІянчиллизир рархибси адам сарри. Илала Будагъ бикІуси мурул ца гЯхІси хъубзара вири. Ил, авлахъличиб чІичІала къацІики, вебкІиб. КІел дусра хІейубси виштІаси дурхІяра сарира кумекчи агарси Жавгъарли хъубзардешла лерилра декІти хІянчи суненицун дузахъули калун.

ИлхІели Агъада-Малла нушала ша хала мижитла будунварес дурашавад

кибсири. Дила хабчаблира, шилизибти супнанира, динна агълулира. Агъа-да-Малла левглев дебали гапирулри, хІятта ил караматла вегІ шайхлизи халирусири. ВягІдара лебри: илис жамигІятли хІябцІали бархала ванза бегІи, биршили, сай къячхІейкахъи, сабухъ хъули гечбарес, дусли гъар хъулибад ца-ца барха анкІилара бедлугес ва гъар дуги яргали хинкІличира викес.

Ил мижитла будундешличил далли Агъада-Маллани мударрисдешра дужахъусири, илаб бучІути дурхІнала бегІтазибад багъа сайсули. Сагали нушала шилизиб абхъибси хІукуматла школализи дурхІни хІебашахъес, гІялам халкъ Агъада-Маллани, бунагъ биур или, урухбирутири. Ил замана маллубачи бирхарути бахъал бири, школализи башахъес хІебалтули, гІяхІцад илди цІябти халкъли чула дурхІни Агъада-Маллачи мадрасализи башахъи.

Шила давлачебтанира малла-супи агълулира гІевкавцибси Агъада-Маллала шин лаглизирад датдихъилри. Ил вакІила нушала шилизир гъар бархІи мавлидуни дучІахъанкадиуб.

Шила маллуби-супни цахІнабяхъили, итхІели Жавгъарлира мавлид белчІахъири. Агъада-Маллани илхІели хъа регІ жагъси, кегІебти куц-бекІла регІ, илала сагати – адамла хІяздохъести юртани, мас-мицІираг, анкІили дегІунти гІяхІти хъумира пикрихІедарили кавлану гъатІи?..

НурбахІянд Агъада-Маллала уркІи буриси гъалмагъ вири. Маллани Жавгъарличи ил сукни вархъиб. ГІяхІцадхІи Жавгъар къабулхІериркули калун, ахирра ил къабулрикахъиб. Магъарра дихъили, Малла Жавгъарличи гечууб.

Амма Жавгъар рахъхІи агарли, Агъада-Маллала бухъя-зегъа къабулхІедикили, дила хъунуйзи ралли гІярзрикІесряхІиб. Ил рикІулри: «Сунела сай вегІси секІайзибад ца кепек харжбарахъес ил къабулиркули ахІен. ХІятта кІа баресли хибти гидгурира далли мегъ черси халаси къанила кадирхъу, умхъу сунела кисалаб бирар. Илини набчибси дех кункбиру или гъанбикибсири, иличи ургІебли, гъатІира наб къиянти имцІадиуб...».

Дила хъунул илизи маслигІятрикІули сари: «Агъада-мМлла дурхъаси адам сай. ЯхІкабара, ахиратлизиб хІед гІяхІил бирар...»

Мекъ барили ца баз хІедикили лералли, чисалра хабарагарси, чула шилизирси Агъада-Маллала хъунул рархъли Жавгъарла хъули ракІиб. Сунела хъунула дурхІнира лебни Жавгъарлизибад Маллани дигІянбарили уилри.

БиштІати кІел дурхІяра дуклабуцили, гъаларла хъунул ракІалли, Агъада-Малла уркІхІелхъану гъатІи?! Я бареси балули ахІен, я викеси мер бургули ахІен.

Сунела шилизирад Маллала хъунул ракІнила хабар нушала шилизиб хъярхъли гІинтІбиуб. Гъар цалабикибихІиб адамти иличила бири гъайбикІути ва иличи гІяйибта биркъутири. ЦацабехІтани Малла дукелцІиличи кархъулри.

Маллала гъаларла хъунула гІяхІти куц-бекІла хъунул адам сарри. Амма илала дяхІлизибси пашмандешла гІелала аги. БиштІатачилара сунечилара сунела мура сегъуналра къайгъи агниличи зигаррикІулри.

Жавгъарли ил хъунуйс гІяхІти гІяхІялдеш дариб. Сари регІти секІайзирад палтар дарахъес чІянкІи, декъла гавлаг ва гІурра серил дедили, илди гъунчибушиб. Жавгъарлира Агъада-Маллази чІумали ибсири: «ХІу гъарли-марси къунбала къачІа сайри! ХІуни хІела хъунуйсра биштІатасра хІебируливан, набра селра гІяхІси хІебиридну, дила юртлизибад пяхІли ветахъи! ХІечил бархси наб я дунъя хІейги, я ахират»...

Шила шантас цІахкайубси Агъада-Малла илхІели нушачивад гъавухъунсири.

ИтхІейчирад дахъал дусми ардякъи диалра, гъаннара Жавгъарла у гъанбушили илис дебали хІейгахъу; я сай итала гІергъи нушала шилизи вакІес виубси ахІен.

Жавгъар викІадли, илди дусмазиб нушала шаб сагали акІахъубси колхозлизи карерхур. Ликбезлизирра, гІур халатас абхъибси бархІехъла школализирра ручІули, багъудлумачира регІриуб. Гъанна ил нушала шилизир регІлара хІурматла адам сари.

IV.

Нуша гІинизла мякълар лерли, берхІила хІула дубурличичегиб, вацІала ца шайчибад тяхІуси цІуэри кабухъун. Нушани датдихъес къасбарра. Нуни шурухъи ИзибяхІяндличичІеръира. Ил бара ахІи валкІикІули ахІенри, къяш чІумали кайцІули вашулри. Сунени дила уркІи багъурли викІусиван, илини набзи иб:

– Набчи къакъаикІули хІейиши, гъалмагъ ГІяли?.. Вари пикримаикІуд, ну хІечила сайра пикриикІуси, машинабачив вашули бурсикайубси шагъарла адам сайри! Ну ибси чина-дигара ваайчи аркъяс...

Ца километрлацад гъуни ахъибхІели, нушаб ца катхІел лябкъуси бацІси пайтун дяхІ-дыхІли къаршибикиб. Ил чебаибхІели, наб гъанбикиб: «Се гІяхІ-си бишира, иш пайтун лаг лябкъуси биалри, нуша чекадиэс! ГІе, лагбяхІли биалри, ихи бацІлира хІебииши, вегІебш. ИзибяхІянд набзи мукІурхІейІули виалра, ишала къяш, дирхалачебли изули бургар...»

Нушачи каибхІели, пайтунчини хІябни дитІакІиб. Къалабати урчи итмадан тІашхІедизурну, ил нушачивад цакъадар катхІел шалгІевухъун. Илини урчи гІеладяхІли шурдариб. Нушаб гІевваили, салам гиб. Ил дила портфельличичили-биалра бигІи, гъанна бара баргибси секІайчиван, чекайзурли хІерикІулри.

– ИзибяхІянд! Иш саю хІечил МяхІячкъалализивад лявкъуси, халаси папкака вегІ адам? – хъарбаиб пайтунчини, сунела шинкъяван цІудара халати хІулби дила портфельличирад черхІейсули.

– Иш сай, гъалмагъ Муса, – иб ИзибяхІяндли.

– Кайирая, гъалмагъуни! Набзи колхозла председателли хъарбарибси саби, ИзибяхІяндличил варх хІябкъяйличив машиналичичІерли ца папкака вегІ адам хевну, чекатурли ка или. ИзибяхІяндра чекайи, урчани хІейхули хІейишину, – иб пайтунчини.

– ХІу вахъ дебали дила портфельличичІерикІухІели, наб гъанбикибсири, хІела илгъуна беткахъили-секІал хІерикІусилра ахІенара или, – ира нуни масхаралис.

– ХІу набчивад чевверхи, гъалмагъ! ХІела у баласри, ура ихъаси. Папка наб хІяжатбиркули хІебирар. Нуни дила «мучари» къачІала кабирхъули вирус, – масхара буриб илинира пишяхъили. Илини нушала някъби дуциб, яхши-хушдариб. Нуша чекадира.

ХІябни дитІикІули бара-хІилхІи тІашаибти урчи, нуша пайтунничи айибмадан, Мусани юргъали датдихъахъиб, гІур жявила макъамличил далайра вяшбариб.

БерхІи гІелабикилри. Заклизир зубарти рурхІули гъачамличир гъачам дахъдикІулри.

Лаг ахъибхІели, Мусани пайтун тІашаиб. Илаб нушаб гъалаб тІашли лебри чила-сабрил бацІси пургъунра. Нура ИзибяхІяндра пайтунничирад кадацІира. ТяхІуси, умуси дубурла гъава нуни халаси тІягІямличил гъигъбирулра,

ил дугила жагадешличиб хелибирули къунздикулра. Набзи ну виклула: «Эгъ, гьалмагъ Гяли! Иш къугъаси дугила тлагям чебаэс багъанданра ху иша ваклес гягнелири. Мяхячкъалализиб биалли беклил декларси тяхяр бирар. Дугели иш замана ванаси хулив майализи викили вирар, гьигъиклес гъава хебиули бирар. Гъанна чебаа: я майъа агара, я ванадеш. Гьигъиклен дигарцад, михъири гъабатурли».

Изибяхяндра нура пургъунна мякъла гъамдиубра. Илав варгира Къубай бикуси Изибяхяндла тяниш. Илала яхши-хуш таманхедиубли лералли, къакъличи гелакахъили бицибси гавлагра сайра Агъада-Малла дурайкиб. Декси дехли къухизахъурси ил гъакларикгули хилхи вашури.

– Ассаламу гялайкум! Къубай, хури, узикъар? Аллагъли ну арукахъес наб гъала ху вархъили валанри. Шукру Аллагълизи, сен гяхиси бетаурлил! – иб шадли Агъада-Маллани ва сунела гавлаг чебихъес вализур.

– Вагялайкум ассалам, Агъада-Малла! Амма ну хед Аллагъли вархъибси ахенра, хукуматлис дирцути колхозла бала духили районнизи вякъи, чарухъира. Хуни ил хела гавлаг иша чемабирхъид, я ху нуни аркуси ахенри, – иб къаркъили Къубайли.

– Гъу, гъу, узикъар! Бацси пургъун ахену, дати масхурти, ишди декли сари.

– Хуни дарган мезли бурибси хергъулрив, уввацли мякълавад!

Сунела къакъличибси гавлаг гъунила дубла кабихъили, Малла Къубайличивяхи шурухъун, дебали къабулхейкибсила тамаличил иб:

– Ху, дила нешла рузила урши, кайзурси узикъар ахенрив? Бацси пургъунничив ну шилизи арукасли хед бунагъ хебаэсгу?

Къубайличи херикгули, набзи ну виклула: «Вяхи се вайси адам сая иш!».

Изибяхяндлира балли иб:

– Гъугу, дати масхурти, чекати иш хела бацси пургъуйчи.

– Хуни хебалад, Изибяхянд, иш чи саял. Иш набзи чекатаба виклули сай. – Илхели ил, Агъада-Маллачивяхи шурухъи, дукаругиб ва имцабариб: – ну хела узикъар виъни багъандан, наб беклил бунагъ ахи, кери лебси ахенгу, ил сен хебалусири хуни?

– Астагъпируллагъ, тавба а, узикъар, ну багъандан ху сен жагъанаблизе аркусири? Ну аклубла шаригягла гъунчиб нуни хилипси барибси ахенгу. Нугъуна виадри хура, хябилра гяхиси биши!

– Хези бурасли, хела урши хуни Буйнакъсклизе учлахъес вархъири. Арукили, школализе ведери. Гъанна ил учитель сай, ахену?

– Сай. Сен виклусири, хед се зарал леба? – иб Маллани.

– Сен наб зарал хебируси, ил багъандан ну абад жагъаннаблизив кавлусе виасли! Ахенрав, бура гъари? Илкун дила узикъарла урши сай, – иб Къубайли.

– Ахенри, сен хед ил багъандан жагъаннаб бирусив? Чири хезе или виклусе? – виклули сай ил Къубайлизи.

– Ну вецну шура дусла гямруличивхели, дила дудешлизи ху викладе, школализе учлахъес дурхя урхъмархъид, узи-уршилис булан абад жагъаннаб бирар, бунагъ биур или. Набчил барх бучлес дурабухъунти дила зилан дурхъини чебаа гъанна, сегъунти гялимти бетаурлил, сегъунти халати хянчурбачиб бузулил. Ну илдачил варх Буйнакъсклизе учлес валкъаурхели, хуни дила дудешлизи ну витахъира, хябал бархи дурхъи туснакъварахъира. Дила балликъянаби биалли бучлес арбякъун, делчун, ну калунра тьп хела вайдешличивли. Ху ахи, чи сайри наб диргалаухъунси? Хела къанбачи халкъ

бирхаурти биалри, дила цІябси дудешван, гъанна нушала шилизив я тухтур, я агроном, я учитель хІейри. Сепайда, гъаннара бирхарули саби къадин хІечи адамти, кам-камти биалра. Наб, хІу узикъар виъни багъандан, халкълизибад цІахбилзули саби...

– Се леба нуни бируси цІахдеш, астагъпирулагъ, иш сейкІусив?..

– Се биъса хІуни бируси, хІечи бирхарути цІябти адамтала кам ишхъулри, хІялалли узули ахІенри. Колхозлизиб хІу акІубла ца къия бархІи хІебаради. Чи левал изуси, илис кІа бирулри, дяхънушадеш дирулри, шаригІятла ма-гъурти дирхъули, хъалибаргла ургар жалти алкІахъулри. ХІуни дирути вайти секІа лугІи касес чили вируси? ХІела яшавла бекІ гІинизра илди хІярамти хІянчурбазиб саби.

– Гужли чизилра селра хІебирахъис, илис Аллагъ бикъри сай, – иб Маллани, гІелавяхІли шурухъи.

– Адамли адам вирІявиргалли, илра бехІсурдеш агарли гуж саби. Гуж-зулму ахІену цІябти, дила дудешгъунти, адамти биргІябиргадли? Гъу, бура гъари?

– Ну хІечил дявта хІеркъус, – иб Маллани гІяшси тІамаличил.

– ХІеркъуд дявта. Амма нуни хІугъуна адамлис гІяхІсира хІебирис, – илини бяхъили урчи гъайбариб, белчІи далайра сайра айламаличивад шалгІевухъун.

Агъада-Маллази ИзибяхІяндли иб:

– Дигалли, нушачил аркури, ваши.

– Баркалла, дила гъуни ишабяхІ саби. Чи-биалра уркІилизиб иман лебси адам лявкъян, илини ну вархъІелтара.

Нуша аркъухІели, Агъада-Малла гъунила дубла сунела гавлагла мякъла кайили, нушаб гІелавад хІерикІули калун.

V.

Пайтун къалабали башулри. Нушала пайтунчи Мусани гІурра далай вяш-бариб. Иличи лехІихъес дебали тІагІямлири.

Пайтун кІиэсил хъябличи чебяхІихъули саби. Гъалли гъунчи чесадаибти хІябрала цІелдни музаличи тІашти бахъал адамтиван чедиули сари. ЦІелднала ухІнавад гъунчи, нушаб гъала, дураухъунси гІяшси къаркъа адам вагъариуб. Хъябличир багълабарахъес урчи тІашаибхІели, ил адамли, нушачи гъамиуб-ли, салам гиб.

– ВагІялайкум салам! ХІуригъари, Шангерай? НабкІун гъанбикиб мицириубли, хІяблизивад айзурси вебкІуран сай или, – иб ИзибяхІяндли. ЦІуба ката палтарра сайра хІябразивад лявкъуси ил чеибсилес се-дигара гъанбикеслира сабри.

– Сен дахъхІи калунрая, Муса? Хашкелди, – илини гъалаб-гъалаб дила, гІур ИзибяхІяндла някъби дуциб, яхши-хушдариб. Ну дарган мез хІедалу-си адамлизи халарили, суненира вайгІир ахІи хІедалути урус мезли набзи Шангерай гъайухъун:

– Вашала на дароге не устал, товариш... Автомашина ауле нет, поэтому эта линейка тебе послал. Ты не уругай нам товариш. ГІябдулварисхан нехариший малчик. Он тибе не первазил, отец уругал ГІябдулварисхан, агъ, агъ, агъ пулуха уругал!

– Иш дарган сай, Шангерай, хІуни хІедалути урус мезли гъайхІейкІули, нушала мезли гъайикІадра, ишини ункъли иргъугу, – иб ИзибяхІяндли Шангерайлизи.

– Дарган виалли, гъатІира гІяхІси саби, – ил дила мякъла пайтунничи кайиб. Набзи хабар бурули сай, пайтун ну кахъес бархъниличила, чула автомашина-

би шилизир кършихИедикили, наб гъала бархъес автомашина тиладибирули кЛел-хИябал унра колхозлизира балли чула колхозла председателъли телефон-низирад зангъдяхъниличила. ЦабехИтала машина хИядурли кършихИебикили, цабехИталара телефонничив жаваб гес адам кършихИейкили, хИейгалра, пайтун бархъили буилри.

– Пайтун бархънилисра хИушаб халаси баркалла. Пайтун хИебакИалри, дашули дакИес чевкъусири.

– Гъай-гИяйиб-гъай, хИерагу ца! Лебил шира цИахбирули хИилхИи калигу, нагагъ пайтун хИебархъибти днахИелри! ХИед се гъанбирк?.. – цабагъали учИулри Шангерай. ИзибяхИяндла гъайлизибад нуни багъурра, Шангерай колхозла складчи виъни. Ишцунра ахИи, колхозла председателъра вали, ишини бурни хИясибли, наб гИергъи машина бархъес умцИули кали сай. Ишди цИакъли чебетаибти адамти бургар ибти пикруми бекИлизи дашулри.

Шангерайли шила къакъалаб пайтун тИашаахъиб ва дила портфель сунези касес хапики, иб:

– ХъурабирехИе набчи, гъалмагъ ГИяли!

– Баркалла, узи, дила гИяхИял сай иш ИзибяхИянд.

– Набчи ваКИахъес дила гИяхИял вати, уртахъ Шангерай, – иб ИзибяхИянд-лира, дила гъай гИеббуцили.

Шангерай гъарахъиркули ахИен. Набзира ИзибяхИяндлизира ярга-яргали, ну сунечи укьяхъес, тиладиикИули сай. Ну ИзибяхИяндличичи хИерикИулра, сен-биалра дила сагаси гИяхИял сай ил, илала пурбан агарли ну ишичи укъес вирули ахИенра. Ил секИал багъур Шангерайли. Ил шурухъи ИзибяхИяндлизи тиладикИесвахИиб.

– Укъен гъатИи, ГИяли, ишини хИу ватес къасбирули ахИенну, – иб дила гИяхИяй хИейгу-хИейгули. Илала гИергъи ну Шангерайличил арякъунра.

Ну илала хъули ацИибмад столла чедила берклума бицИахъиб. Нерхлизир дерцибти мазала ва гИяргИяла диъби, дигалли чягъир, дигалли гИярякъи хИядурлири.

ХИера, Шангерайла хъули бара нуша духИнахъили-хИехъили лералли, ила вакиб, тяп хъа вегИгъуна ахъси ахИенси, вабза, гъабухъи чебиуси канира сайра, ургарти гИямрула адам.

– ИзрастИи товариш! Будим изнакоми, председателъ колхоза Тавбачиев, – иб сунела вабзадешличичи мешухИебикеси, чИяртИси тИамаличил къалаба-къалабали. Нунира «израстИи» ира. Шангерайли итмадан ну дарган виъни буриб.

Колхозла председателълира бурули сай наб гИергъи бархъес я чула колхозла, я унра колхозунала цалра машина кършихИебикниличила. Ну, Шангерайлизи къяйдали, илизира викИулра, пайтун бархънилисра баркалла или. Дукулра, дужулра ва ихтилатдикИулра. Тавбачиевла хИулби гъачамличир гъачам къакъадирулри, хИунтИенкайрулри, сунени лутИи-къуртИли дужути держла асар чеди багъарбулхъулри.

– ГИе. ВиштИини нушази хИебуралри, нуша бекИлил цИахкайублири, хИед гИягИиниси тахИярли гъунихИедаили! – иб председателъли.

– Нуша дерцахъибси ВиштИила арадешлис бужехИе! – викИули сай валкайкибси Шангерайра, председателъла гИеббуцили. ВиштИила арадешлисра бержира.

– Чи саяра ил ВиштИи? Илгъуна адам нуни чехИеирагу, – ира нуни.

– Ил хИуни хИелад. Амма сунени лебилра бала. Ил левгИев пергер адам сай, – иб Тавбачевли.

– ХІуни вагъесилгъуна халаси хІянчила адам ахІен ил. Райисполкомлизив узуси, камси хІянчила адам сай, – баянбариб Шангерайли.

– Ну райкомлизи ахІи, исполкомлизи хІявкъунра. Илини ну хІушачи лявкъни чинад багъурсири? – хъарбаира нуни.

– Набзи ВиштІини ца жумягІ гъалабал бурибсири МяхІячкъалализивад хІушачи ишгъуна адам лявкъян, хІядурли дирая или. ГІурра ишбархІи хІерейс телефонничив гъайикІухІелира буриб ит сай викІуси хІяким хІушачи лявкъули гъунчив сай или.

– Ну хІушачи лявкъни нунира багъурси дагри. ВиштІини сен ца жумягІ гъалаб багъурси, ил караматла вегІ хІейалли?!

– ВиштІи караматла вегІ ахІен. Амма илини багъурлири я хІу яра хІугъуна цархІил адам иша урхъниличила.

Ну илхІели пикриикІулра: «Марлира, иш колхозлизи лектор вархъес МяхІячкъалализиб ВиштІизи гъай бедили биэс?»

ГІур Тавбачиевли набчи шурухъи иб:

– ЦаврахІел нушала машина МяхІячкъалализи аркъян. ХІела хъалибарглис цІедеш, нуси, диъ нушани дурхъехІе. ГІурра хІушаб хІяжатси се лебал бура. Нушала складлизиб се-дигара леб. Нушани хІед селра ахІерахІебирехІе. ГІябдулварисханни илди сагъ-саламатли хІела хъули диахъу.

– Илцад секІал асес дила арц агара. Селра хІяжатли ахІен, – ира нуни дукаругили.

– Юх, се хабара? Ну арцлис викІуси ахІенра. Арц гъайдирути дирару? Пешкешдирути сари.

– Юх, сегъуналра савгъат хІейги, – ира нуни.

– ХІуни нушала уркІи аргъа. Лерилра ит хІела папкализирти секІал къянби сари... гІяшли дила лихІилизи викІули сай Шангерай, хъа гІямзила кабихъиб-си дила портфельличи тІулра бархъбарили.

– Мар саби, мар саби, лерилра къунби сари, – иб председателълира.

– ХІушала хІясибли, ну къянбала къачІаличил вакІилра иша?! ХІебиалли, хІушани дила лекцияби къянбази халдирулрая.

– Села лекцияби?! – тамашавиубли иб завскладли.

– Вати, Шангерай, вати! – викІули сай гІяшси тІамаличил председателъ, – чебиулрив, ишис хІу или викІули дигули ахІен, лехІахъи. Лектор сайра викІули сунела къачІализирти набчилара хІечилара нушала душмантани делкІунти къянала гІярзабачила нушази бархъли буресра дигули ахІен. Аллагълизи шукру, нушачи бусурман адам, иш ГІяли вархънилра. Нушачи уркІеци биру.

Нуни илдази аргъахъира ну лектор виъни, саби хатІабикни.

ИлхІели илди дебали гъузгъалдибиуб:

– Марлира, ВиштІи къянба угъару гъатІи?

– Юх, ВиштІини къяна хІебуру.

– ХІебиалли, ил чичив-биалра нушала шав дуги буркІули ургар, – илира или сайра, Тавбачиев бекІ гІяшбуцили дураухъун. Илис гІергъи Шангерайра дураухъун. Шангерайла хъунуй столла чедила умубариб ва наб кайхъахъес кровать чебаахъиб.

Савли ну айзайчи, сунела юртлизивад чинарил дураухъунси хъа вегІ, ну укунхІелира, чархІевхъун. Къалаба-къалабали ца чяйлара бержили, къацІи-чира къацІ-къацІики, ну, касили дила портфельра нура, дуравхъес айзурра.

– Дугира хІу хІярхІяли укади, ишбархІира хІевкулри, ГІяли. Ил беркайчил адам асувирусив?! Вари, хІерейс укес къанхІейубли вакІи, хІела хъали! – иб хъа регІли.

Нуни илис баркалла ира ва, хІерейс укес лявкъясра или, гъай бедира.

VI.

Ши ахъси дубурла бялличиб белшири. Хъар шайчиб халаси ургубари. Авлахъличир дузути машинабала пѳатарла тѳамри дикъулри.

Колхозла контора чинаб сабил хъарбаэс дигулра, шила бухъяна къакъа бацѳири. Цакамси гъуни ахъили гѳергъи къакъала итил дублав ца адам вагъариуб.

Илра конторализи аркъусили увухъун. Ну иличил варх ватихъира. Ил набтѳира гѳявадешѳира тѳемдикѳути цѳудара палтарчевси, ца-ургарти гѳямрула, хъячѳа-хъячѳаси адам сайри.

Наб дигулра лекциябала хѳекълизив колхозла хѳянчизартачил вягѳдалавиэс. Нуша кѳелра председателъла кабинетѳлизи адацѳира, Тавбачиев столла гѳела кайилри, Шангерайра леври ца шайчибси улкъайла къасиличи кайили.

Дила саламѳис Тавбачиевли гѳумпбизахъурли гѳядатѳисван жаваб чарбатур. Илини дяргѳибти хѳулбачил набчи хѳеръиб, ну кайахъес сунела столла янашаб ута чебаахъиб. Ну Шангерайличи дял-дялѳи уталѳичи кайира. Ну лехѳахъили илдачи хѳерикѳулра. Шангерайли набчи ца хѳулилра бархъѳебизахъур, набчивад дугѳялѳи ца шайчи хъяб балѳахъи, лацѳла бялѳлизи хѳерикѳулри. Тавбачиевра хѳекъли гѳимукѳибси хѳякимла хѳулбачил набчил вакѳибсиличи хѳерикѳулри. Колхозла илди кѳелра хѳякимла дялѳи цаван къябшдуцилри.

Набчил вакѳибси юлдаш, цигѳици селра хѳейѳули председателъла столла гѳала тѳашизур. Кѳинайс сунела дукѳлабси газетализи бергурси секѳал Тавбачиевла гѳала лайбакѳиб.

– Се саби, Къурбан, иш хѳуни хибси? Пялѳи буахъен ишад, – иб илини, ца някъли сунела къянкъ кѳапѳирули, итил някъли столѳичи кабихъибси секѳал вакѳибсиличибялѳи къужѳирули. Къурбай илала някъ, сунела тазаси качѳа гѳалабуцили, тѳашаиб.

– Сабурбара, гѳалмагъ председателъ, хѳези чедаахъес нуни хибти диъ-нуси сари. Хѳеръа хѳуни ишдачи сегъунтил! – илди сунези дергурси кагъар убасиб. Хъа бухѳна гѳяѳиубси диъла тѳем ламбухъун.

– Наб ишди чедаили се дариша? – иб гѳимукѳибси Тавбачиевли.

– Чедиулрив милкъи? Даг бархѳехъ нушаб, механизатортас, хѳушала колхозла складѳизирад дархъибти сари ишди! – иб илини багълали ва малѳямли.

Тавбачиев харчизур ва Къурбайчи гѳимукѳили вѳяв-чѳярухъун:

– Ишдигъунти няс секѳал кадирхъахъес ахѳен кабихъибси иш стол. Хѳези сайра ну викѳуси, пѳялѳи двахъен ишадли...

– Диъѳлизиб милякъ биалли, председателъличи гѳярзѳли вашусив? – иб, иличи хѳерикѳули, Шангерайли.

– Нушаб хѳушани хатѳадѳикили гъачам-кѳийна биалри ишгъуна диъ бархъибси, гъайра хѳейѳехѳери. Гъар замана иш тяхѳяр саби. Чуйна-чуйнара бурилра, трактористуни, комбайнерти имѳѳаси аргъѳлизиб хѳебуки кавлули саби, хѳушази гъайикѳес наб бетѳили саби или.

Илхѳели председателъли хапѳики кѳелра някъли диъра нусира касили гѳясидешѳичил гъакѳдариб. Гъаргѳи улкъайларад илди къакъализи ардякъун.

– Хѳушаб хѳебиалли авлахъличиб «Каспий» ресторан ибхъехѳе. Сен дебали цѳакъли шикъухъунсири? – ахъли тѳамадариб председателъли.

Кабинетла унза абхъиб. Тавбачиевли сунела столѳичирад къакъала игъубти диъра нусира някъларли ила ца хъунул адам арацѳиб. Тавбачиев илхѳели анар-ханариуб, дянгухъи, цухѳли тѳашизур.

Ил хъунул адамла бекѳла гъез букѳула гулмендила удирад чедиулри. Шинкъян цѳудара нед-хѳулира сарира, ахъ-ахъси къаркъа регѳи, шуцѳали дуѳла

гІямрулагъуна ил чераибхІели, нуни рагъурра колхозла парторганизацияла секретарь БяхІяндова Жавгъар риъни.

Ну айзурли бажардиикайчи, Жавгъарли сунела някъларти хъярхъли улкъайла къасиличи кадихъиб, сараили дилара Къурбара някъби дуциб, яхши-хушдариб, пишряхъили набчи дугъаризур:

– Нуни райкомлизи белкІунсири, нушачи колхозникунас лекцияби дучІахъес адапти башахъес тиладибарили. Се гІяхІси барилри хІу нушачи вакІни. Урдаличи аркъехІе – халкъ итаб саби. Багълабара цакамси замана, гІурра гъайдикІехІену, ну кайахъес набзи лишанра барили, сари ил хъулибтачиряхІ шуррухъун. Сунела пишбяхъибси шаласи дяхІла сипат хапли барсбиуб, цІяббиуб.

– Чили сари ишди диъ-нуси къакъала игъубти?

– Нуни игъубти сари, иш тракторчибала бригадирличи гымидухъи. ДетІили сари гъар бархІи ишдала гІярзаби, цархІил хІянчи барахъес ишдани пурсат лугули ахІен, – иб председательли, КъурбайчибяхІ лишан барили.

Парторгли, председателъла хІулбачи сунела хІулби вякъяили, иб:

– ХІу, председатель, вахъ дебали тІама ахъбуцили вјавмайкІуд! Бура гъари, хІуни виадри ишди дукадив?

Буреси хІебалули хІякизурси Тавбачиев мерличив ватурли, Жавгъар, КъурбайчиряхІ шуррухъи, гъай даимдариб:

– ИшбархІи бархІехъ урдаличиб колхозла парторганизацияла бюрола заседание саби. Колхозла председателъли буриси саби хъу иршнила ва дугнила хІекълизиб. ХІура вакІи ита, сјагІят гехІличив. ИлхІели бурид, хІушала шайзибад сегъуна гІярза лебал.

ИлхІели Тавбачиев уркІухъун ва къунтІурдариб:

– Гъайухъес ну хІядурли ахІенра. Ил суал гІелайзи арбухая...

Амма Жавгъарли илала гъай къабулхІедариб ва чІумали иб:

– Ил суал гІелайзи архуси ахІен. Арши хІечи хІерли калес хІедирар.

Колхозла председателъра складчира Къурбайс гІяхІти продуктуни дедес къалабакикиб. Нура парторгра колхозла парткабинетлизи дукъес дурадухъунра.

VII.

Нуша парткабинетлизи адацІибхІели, нушаб гІелавад сјертли Ибрагъимов ВяхІдра вагъариуб.

Илра нура дарх дучІули калунтири. Ил партияла Дагъиста обкомлизив узусири.

ВяхІид чеибмад, дугила анцІбукъ дила уркІилизи бакІиб: «Давлагаб, ишалра ахІену баягъи Тавбачиевхъали сунечи хІерли кабибси адам? Ишис хІедииши итди берклуми хІядурдарибти? Марлира, дурги къалли!» Гъачамлис нуни ВяхІидлизи селра хІеира – я иличила, я сунела къуллукъличила.

Дила акъуси замана шила клубла хІянчиличил тянишиэсли пайдалабарес къасбарра. ВяхІид вакІили гІергъи, парткабинетлизив вахъхІи кахІелунра, парторглизира илизира дила пикри бурили, ну илад клублизи арякъунра.

Клублаб яра урдаличиб лекция белчІес бархІехъ ахІи бетарули ахІенри, сенкІун лебилра колхозникуни савлиличибад бархІи ахъайчи авлахъличиб аршилара дугбалара хІянчилизи бархилри.

Амма хІерибаэс гъалаб зак дирихъма буциб, тјап гІебшнилаван дибгІянти забли урзесбяхІиб. Клубла мегъла хъалчличи чейгути забла кІунтІрала тІама къябудули ахІен, гъачамличир гъачам заб зумадикІули сари.

– ИшбархІи ургубала хІянчи букъбуун. ХІу хІела хІянчиличи балбикибси

бархи кършииубли хейадли! Гъари, ца ну парторгличил гъайулхъасну, хЕри гЕргъи хЕла лекция баресли колхозла членти клублизи бучахъес, – или, клубла заведующийли телефоннизибад Жавгъарлизи гъайиб.

Илди кИлалра пикрибарибси замана – сагIят хIябличиб лебил клуб хЕкъли хъячIбарили бициб.

Лекцияра таманбиубли, дахъал суалтас жавабтира дедили гЕргъи, парторгли, столла гЕларад аризурли, дила някъ буциб, наб баркалла гиб. ИлхЕли Ибрагъимов ВяхИдра набчивяхI гъамиуб.

ВяхИдра нура мякълабси хъули духИнадухъунра ва уркИи-уркИиларад ихтилатдикIулри.

– Валлагъ, ГIяли, хIуни дебали ункъли, лехИхъутас дигиаэсли, лекция белчЕс вирули уилри, хIули магаб! – викIули сай ВяхИд, дила хъуцIарличи някъ кабирхъули. Илала къабулхЕбарили, ну викIулра:

– Гъу, масхурти датину, лехIахъи, ВяхИд!

– Валлагъ-биллагъ, масхара ахЕн. Дарган мезли философия бухънабазира хIуниван аргъахъес багъандан гIяхIти устадеш гIягIнити сари, ункъли хIядурикЕсра чебиркур.

– ХIуни ну вахъ гапирулра, или хЕбурили, нукъсандешуни чедаахъадри, дебали дигахъаси, – викIулра нура.

– Валлагъ, гъалмагъ ГIяли, дила агара вайлашал хЕла лекцияличила буреси, – викIули сай ВяхИд. ИлхЕли Жавгъарра, хапли унзаларад рухIнарухъи, набзи рикIули сари:

– ГIур хЕбирусив ит гъалмагъли нушаб лекция, дуги-хЕри гъайикIалра, илала гъай анцIхЕдулкъан... – бикIар адамтира. – ГIурра лекция белчЕс нушачи хIу мурт вакЕс вируда?

– Ца жумягIли лявкъясра, – ира нунира,

Жавгъарлизи чилирил тIамадариб. Ил дурурухъунхЕли, Шангерайли ну унзала гЕла живарра. Илини набзи хърбаиб:

– Ибрагъимов ВяхИд хIуни ункъли валусив?

– ВиштIахЕйчивад валуси сай. Сен викIулри?

– ХЕчил варх ихра нушачи кес барагу, хурег хIядурбарилрану.

– Дигалли хIуни ваши а, хIу – хъа вегI, их – гIяхIял адам.

– ХIуни ваши а, хЕла хъали! – викIар ил гIяшли лихIилизи.

– Ну вашиикIули вирус, гIяхIял дила хъули арукес хIяжатбикибхЕли. Ну ишав хъа вегI ахЕнра.

– Нуни ил гъалав валуси адам ахЕн. Ил багъандан сайра къалли хЕзи ну викIуси, хЕд се бирара, ваши адли?! – Шангерайли гIурра набзи тиладибариб. ИлхЕли ну таманни шакикира тяп дуги нуван, ишини гъанна ишра арукес къасбарниличи. Нуни Шангарайлизи гIур набзи тиладихЕйкЕсли къантIли аргъахъира. Илала гЕргъи Шангерай ВяхИдличи гъамиуб:

– ХЕра, иш гъалмагъ ГIялира набчи сай хъуравиубси. Ваши, хЕла хъали, дила тилади мусиб хЕбатурли, хIуни беркунси къацIла дубли ну мискинирули хЕйишану.

– Бурулрагу, дила гIяхIял левси сай. Дебали халаси, вакИибхЕли хIябалцад баркалла биаб хЕд. Ну вакЕс хЕйрус, – ибхЕлира ВяхИдли, Шангерай иличивад чевиркули ахЕнри. Нура тиладиикIахъес Шангерай набчи хЕрикIули, някъли шайзи къячикIулри. Ну лехIкахъилра. ВяхИдли бегIла гЕргъира илизи чIумали буриб:

– ХЕла гIяхIял ГIялира ука, хIура арукъен. Ну яргала гIяхIял ахЕнра, гIяхIлачи варсикЕс, хIякъяс, – нушара илар датурли, ил хъуливад дуравхъун.

– Сай хІякјули гІергъи, нушачиб гІяйиб хІебирар, ваши нуша аркъехІену,
– пра Шангерайлизи.

Илини дяхІра дамкъахъурли, набчи дяргІибти хІулбачил хІеръиб:

– Ну хъули ахІенра аркъуси, икІаб дила къуллукъ агара, – иб илини къяр-
къли, хІейгесли. Илав ну ватурли, ил къалабали арякъун.

«ХІуцун нушала хъули укъен, нура лявкъяс, дила къуллукъ таманбиубхІе-
ли» илипра хІеиб набзи. «Ну хІерейсра хІевки, гушли виъни ишини балули
хІейэс. Балалри, гІяхІял гушли ватес сеннира къабулхІебарииши» викІулра
набзи ну. Ил чина къалабаикибсил илис гІергъи улкъайлавад къакъала хІе-
рикІулра. Сай биалли, вархъли сунела юртлизи ацІиб.

Ну къакъала дуравхъунра. Аргъ вязбикІули саби. Гушли, беркеси бирцуси
мер агарал халаси гъуни ахъили хІерикІулра. Тукен биалли гІекакіли саби.
Чизилра хурегличила хъарбаэс вирули ахІенра, цІахбилзули саби. Байхъала
километрличи бухъянбитІунси шила къакъа хъарла дурабухъайчи ахъира.
Къяшми мурхъли чятлизи гІеладикили сари.

ГІяхІдеш агара, гІелавяхІ чариубра. Чина къяш кацІасра, къакъалаб рамкъа
саби. Миъван дяргІибти чят дила дабрила лихІбазирад духІнаахъили, жинтІ-
дикІули сари. «Агъ, саби хІебариили калъ, гъархІебизурси архІя хІебиалли?!»

Колхозла конторализивяхІ чарухъи, председателъла кабинетлизи ацІира.
Тавбачиевлизи викІулра:

– «Сагаси яшав» колхозлизи укъес пайтун тиладибарес хІечи вакІибсира,
гъалмагъ председателъ.

Кабинетлизив нура сайра ахІи, чилра имцІаси адам аги. Тавбачиевли,
улкъайлабахІ бекІ балкІахъи, чина-саял гъарахъли хІерикІули, набчивяхІ
шурра хІяхъили иб:

– Пайтун агара, биалра, шагъарла лектортас транспорт бедес колхозличиб
чебси ахІен.

– Вашули укъясли, ишди дила дабри чятлизир черкаркургу, гъалмагъ Тав-
бачиев, – дила къяшмачи лишан барили, илизи дабри чедаахъира.

– Илис нуша ахІенра жавабкарти. Шагъарлизивад дураухъайчи хІуни
багъес гІягІнисиири, нушачир заб дарибхІели чятра дирни. Шимала гъундури
гъачамлис шагъарлизирван къирли дуцили ахІен, ил хІуни хІебалули уилри!
– иб илини, ну дебали мучлаагарварили.

Ишизи гъайикІнилизивад гІяхІдеш аги. «Бареси агара, верхІел киломе-
трла гъуни хъурали вашули ахъес хІяжатли саби», – пикриикІули, ну илавад
дуравхъунра.

Гъалар цугрикибси Жавгъарли ну тІашаира.

– БерхІи ихъули саби. ЖагІял чекатурли урхъури. Се хабара, асухІебирар,
ишди чятлизив хІу хъурали вархъес... – иб парторгли.

Ил дуги Жавгъархъалачив калунра. Наб илини гІяхІти гІяхІялдеш дариб.
ГІергъила бархІи, баягъи ит гІяхІси далайла уста пайтунчи Мусачил варх
«Сагаси яшав» колхозлизи арякъунра.

VIII.

Гъала гІебшнила замана сабри. Нура дила вахъІила тяниш ГІялира алхІят
бархІи, МяхІячкъала шагъарла анхълизир скамейкаличи кадиили, ихтилат-
дикІулри.

ГІяш-ГІяшси къаркъа вегІ, амма хъячІаси вабза адамли, нушала гъалавад
шалгІевулхъули, ГІяличи хІеръиб. Газетализи хІерикІуси ГІялини ил, итатІи
ветаибхІели, чеиб ва, у ахъили, илизи тІамадариб:

– Товариш Тавбачиев! Саламалра хІегили шалГевулхъулригу, набчи гымукІили-секІал хІейиши?

– Сен гымуркІусира гъари, чина хабара! Чевверхи, гми-гми-гми, гми-гми-гми, – дукаряхІили, ил някъ буцес ГІяличи савхъун. КІилинра яхши-хушдариб. Илини, нуша кІиличилра хІеръили, «тянишдиирая!» иб.

Тавбачиев, набчи шурухъи дила някъра чІумабарили, викІули сай:

– «ХІунтІена байрахъ» колхозла гъавкъя председатель Тавбачиев МяхІяммад бикІуси ну сайра, уртахъ!

– Гъу, гъанна хІу гъалавла председатель ветаурли, хІела мерличи чи катура? – иб илизи ГІялини.

– Жавгъар каратур.

– ХІукІун колхозла председателъли урегал-верхІел баз сайри виубси. Сен жявли хІянчи бархъбатуррив? – хъарбаиб ГІялини, пишяхъили.

– Мезлукъунани хІетурра.

– Шангерай сен сая?

– Шангерай туснакълав сай.

– Сен туснакълизи викибси?

– ЧеббицІес дигули, мезлукъуна ухІнакаахъиб.

– Ревизия-секІал барибу?

– Шангерайлис ревизия бариб, амма бархъли хІебариб. Бархъли баралри, ца кепекла секІал итичи кахІебилзи. Ит гъеч колхозла секІайчи къячилкуси адам ахІенри. Ревизия барибхІели биалли чум-сарил азир къуруш камдиубли сари бикІар. Валлагъ-биллагъ или, хъя барасра, набра Шангерайлисра дирути лерилра секІал мезлукъунала авара сарри, Ибрагъимов ВяхІидли итхІели материалти вайтІа ахтардидарнила гІяхІедеш саби. ВяхІид Жавгъарли валкІахъун. Ну ишбархІи вакІибсира. Ишав чилра лехІхІехъалли, дила мурад аргъхІергъалли, Москвализи аркъяс. ИтабкІун лехІихъур. Нуни дила харжбируси мас яра къацІ ахІерахІебирис. «БицІибсилис бицІес дирар сяхІла гъаруш дирути» бикІуливан, нушаб вай барибгас нунира ункъли чеббирцІис.

– Ягъари, Москвализи ветхІеадра, нушачибра баргишигу балкІли барибси ревизия гъаргбарести, бархъдешгІебти адамти, – иб ГІялини.

– АнцІбукъ ревизиялизибцун ахІен. МяхІячкъалализиб мажахІят баргиша бархъдеш барести, ишабгани сари ишди авара вяшдарибти. Ишдани сайри итхІели ит Ибрагъимов ВяхІид нушачи кусварибси... Москвализибад комиссия ГІалаббирис... Ишар лебтанилра Жавгъар сари гІерруцибси, нуша биалли селизилра халдирули ахІенра, чинаба бархъдеш? Ахтардибирахъес ункъли, чериахъис, чи сарил Жавгъар, ну чи сайрал.

– Секъяйда?

– Жавгъарла биография ахтардибаралли, баибси саби. Баладу хІуни, набзир сегъунти баянти лерал. Жавгъарла хала дудеш нушала хала мижитла будун вири. Ил валути чумал бухъна мицІирли гъаннара нушала шаб леб. Нуни илдачил ихтилатбарра. Илдани бархъли буру. Илдани набзи буриб, Жавгъарла хала дудешлис Абакар-Малла бикІниличила. Сунела хІябличи катІунси цІелдаличира тятп Абакар-Малла или белкІи саби. Ну хІябразив умцІули, илала хІяб баргира, чеббелкІунра илад. Набзи касили леб, – викІули, илини сунела някълабси, хъячІли бицІибси, сумкализи къутІ-къутІбяхъиб: – Ит вебкІибси тарихра балли касира. Бусурман тарих хІясибли ит вебкІилри азирлим хІябдарш ибил дусла зулхІижат базлизив.

– Гъалмагъ Тавбачиев! ХІебиалли, ил вебкІила верхІцІанну авра-шура дус дикили сари. Жавгъар акІайчи гъал дус гъалав вебкІили сай. Ил секІал

секъяйда диргалабулхъусив Жавгъарли колхозлис председателдеш дирнилис?

– Сабурбара, уртахъ Гяли! Гъчам дила лерилра дурутаци лехІахъи. ХІуни чебиид, Жавгъар се адам сарил... Жавгъар, лебилра нушала шантани бала, Агъада-Маллас шери рякъи калунсири. Агъада-Малла нушала шав хала будунни калунсири. Ил – кІиэсил факт. Ит замана Жавгъарли дин бузахъули, мавлид бучІахъули калунсири. «Дин – коммунизмала душман саби...» илди-гъунти коммунистунили биэс хІебирар. Гурра, Жавгъарла дудешла узикъар БяхІада бикІуси базриганра левсири. Бухънабани бурули, гъанна шуцІали дус гъалаб нушала шаб БяхІадала тукен буили саби. Халбаралли, ну илгъуна адам ахІенра. Дила хала дудеш урхІлис узуси хъубзара сайри. Граждан дургъбала замана дила дудеш ГІякъакъалав декІли вяхъили, някълизивад чулахъиубсири. Жавгъарла дудеш биалли ГІякъакъалаб биубси дявилизира вякъи ахІен, партизанра ахІен. Илди лерилра баянти Москвала комиссияли ахтардидиру, гур чебиэхІе, чила дяІ хІунтІендирарал...

ГІяличира иличира ну хІерикІулра. ГІяли сабурбарес хІейрули, къалабаикІули, хІятта бекІ гъакІирули чейулра. Тавбачиев биалли, сунела гъала хІерикІули, някъли гъакІикули гъайикІулри, чичилра хІерикІули ахІенри.

– Пашизи гъари, уртахъ! Аргъира. «Наши предки Рим спасли...» дикІути къузралагъуна саби хІуни бурусира. Чис хІяжатлив ахтардидирес хала дудешунала санигІятра хІянчира? Гъеч чисалра хІяжатли ахІен. ХІелара Жавгъарлара хІянчи саби хІясиббируси, ишбархІи колхозла хІянчи чидилли ункъли дузахъидал – бекІлибиубси тяп ил саби. ХІед гІяхІси нуни бурасли, вякъи хІушала колхозлизи, хІуни вирусигъуна хІянчи бирули, илав хІялалли узен.

– ХІу марли викІулрив гъари? Жавгъарлис гъалав, «хІякала къапІа барили», узен викІулрив? Юх, юх, юх. Ил секІал бируси ахІен. Я ну я сари – Жавгъар – кадикайчи, ну вирхІус, – иб Тавбачиевли ва, къалабали айзурли, нушачивад пяхІли ветахъиб...

Илала гІергъи ГІялини набзи сунела архІяличила бурибхІели сабри икІ чедибси хабар белкІунси.



Драматургия

Къасум-Бег
МИГЪРАБОВ



КЪУЛЛУКЪЧИБИ

(Хъарухъуд)

Дугила къанси замана. Амирла хъали, столличиб лампа. Сай, убла заманала жагаси диванна дубличи кайили, пикрумазив сай.

Столличиб леб абхъибси жузра. «Къарлизиб някъликала» биэсра асубирар. Леб газетара. Ил замана гъарахълирад гЯнцІ-гЯнцІти тІамрала иргъу: Я-я! Ишав сайра ну! Иша-а-в сай-ра! Эгъе-гъе-й...й!!!

Амирли бекІ ахъбуруц, багълали гъамиубли улкъай ибхъу, гъарахъси дубурличи хІерикІар. ВявикІусила тІама иргъули лерал. ГІекІили улкъай, хъа дайлава тІашилзан... гІяшли иру:

АМИР... Чи сай вара икІ халаси цІа бикъурли вявикІуси? ТІама гІямру ардякъунсилагъуна саби, баркъуди биалли хъяшалагъуна... Сен вявикІуси ил? ТалихІчевхІели? Яра талихІ агарсихІели? Виалли-декІар вявикІес гІягІнилив, ну ишав левра, дебали талихІчевси адам или?.. Гъм... ВеГІла децІличила-декІар вявикІес гІягІнилив?.. *(Илала гъай къябиули, унзализи къутІдирхъу, селра айчи, ил хъули айцІур. Багъесли саби ацІибси разиси хІяйчив виъни. Ил улкІули сай, дягІли гъакІбируси ахътерекван).*

СЯГИД. Приветствую, дила уртахъ! Вакъунсигъунаригу. Яра хІу чарухъниличи разили ахІенрив? *(Гъарахълив вявикІусила тІама аргъили, улкъайличи ветухъи, ил гІейкІу),* Эгъ! МехІур ухъна сай! ХІунира валадгу ил, Майсур-ази. *(Амир иличи разиагарли хІерилзан, амма ухъначила хабарли тамашаирахъу).*

АМИР. Се бетаурлив гъатІи илис? Кайи. *(ДиванничибяхІ някъ гъакІбиру).*

СЯГИД. Итавад, Афгайзивад урши хили гІергъи илала бекІ ласбухъун. *(ЛихІишканничи тІул чебуцили ласбиру).* Балулрив икІ чизи вявикІулил? Космоновтунази! ХІя-хІя-хІя! ИкІди, викІар, чеббулкІули саби икІаб урми ургаб цацахІели. ЧебхІебалкІахъес дубурличиб цІа бикъурли ил вявикІули сай, ишавра... ишавра или... Сен илгъуна пикри акІублил хІебалас илизиб... Дубурличи гъамли хІеррируси хъунул адам гІярзрикІули рашули сари шила Советла председателъличи, се бирусил хІебалули. Тухумтира лехІкахъили саби илала, илкІун зягІипли сай или. Белики илини адам кавшес, гІур се бируси? ИлкІун жавабличи витІхІейкІу. Амма балагъ кес вирар.

АМИР. Тухумтани се бареса?! (*Гъмили биџибси тАмаличил, хЛебагъахъес къайгъилизи вилзан*).

СЯГИД. Илдигъунти кабиркъуси больница лебси, ахІену гъари?

АМИР. Лебси саби... (*гІяхІцадхІи лехІкайхъур. СягІидличи хІерикІар. СягІид хІер чекасес хІейубли, диванничи кайрар*) Лебли хъалли асухІебирусив вегІла децІ азадли ахъес? Хъумартес къалли хІейрар, рурџари хІярхІялра биэсгу...

СЯГИД. Асубирусси саби. Амма сунела баркъудлумас къимат бедес хІейрули виалли се бируси?

АМИР. Илала дурхІя кавшили сай...

СЯГИД. Гъм. Илалацун ахІен къалли алхунси.

АМИР. ХІед се бурес дигулри? ХІела пикрили, игитла бебкІали алхи виалли, децІ хІебирусив? Узидешла кумекбирули алхунси, децІ хІебарили валтусив? Лерилра гІямру илгъунали калунри къалли хІу. Гердирули. Игит гъабзала гердирули. Гъанна хІу набчи вакІибсира ил багъандан сайри, юлдашла гердирули. Урки или хІебкІалра.

СЯГИД. АхІенрав гъатІи нуша юдашуни? НушакІун...

АМИР. Ге, нуша шел дус дарх калунра, амма итхІелира нуша декІартири, цала-цали хІергъути. ХІуни виадли гердиради дила аргъибсила, ну гІевурцусила... дигахъусила.

СЯГИД. Нуни селра иргъули ахІенра.

АМИР. Агъ, хІябилра иргъулри... балра балулри. ЧІянкІли хІед дигули ахІенри къабуликес. МутІигІвакІес дигули ахІенри, сенахІенну, ил барни, лерилра хІела гІямру хІуни къалпли деркІни марбарни сабну. Бархъдеш хІечиб чедибухъни уркигъаргли къабулбарни саби. ХІу виадли илгъуна ахІенри. ХІед гъачам бурили батаибси сеннира гІеббурцес дигахъид. Къалпси биъни баладлра, хІуни ил секІал бирулри, хІу чичилра мешухІейкили...

СЯГИД. Ну иша вакІибси, хІу чарухъни багъурхІели, дила разидеш багъахъес сайра. ХІебалулра хІу сен гъимукІилрил?

АМИР. ХІебалулрив?

СЯГИД. Вирхаи, хІебалулра.

АМИР. (*Халаси шала алки, столличи ветулхъан, касили иличибси газета гъабурцу. СягІидли ил хІербиру, гъар-се-секІал аргъили, вяхІлизив варсирар. Шайчи ласбатурли бекІ, мурхъли гъигъбалта*).

Аргъирив?!

СЯГИД. ХІу набчи вирххІеэс асубирар, Амир... Наб дигахъира вирхаурли, лебгІеб дигахъира, сенахІенну, ну лайикъли ахІенра хІела гъимиличи... набчиб гІяйиб агара. Ил кабяхъахъес набчи хъарбариб.

АМИР. Гъм... Чедибадли?!

СЯГИД. Дила мерличив хІу виадри, се бирадил хІерикІира?

АМИР. ХІела мерличив викІулрив? (*СягІидли селра хІейру. Ил гъанна паשמаниубсигъуна сай ила вакІиниличи*) ХІела мерличив ну мурталра хІейрус, я виубли хІейгахъира. Нуни яхІ-ламусличил вачурта виркъес хІебалас. ХІуни гІячихъли балулри нуни ит адамлизирад арц тІалабхІедарни. Илала дело цархІиллизи бедес хІядурбарилри нуни.

СЯГИД. Илини марбариб къалли... Гъм...

АМИР. Гъу, далтехІе иличила гъай... нуни аргъес вирули ахІенра хІу редактор виадли, чедибад хъарбарибсиличи сен хІерикІусирил?

СЯГИД. Ил газета ну вегІси дила ахІен кьалли, уртахъ. Ил чила орган сабил хІуни балулри!

АМИР. ХІу коммунист сайри. Партийный билет уркІила чеди селис кабихъибсив хІуни? Илала цаибил бяхІлизив Ленин сай... (*Къакъбарили... улкъайлавад хІерилзан*). Илра пардавлис бихуси саби гьатІи хІуни. ВяшикІес гьамадбиахъес...

СЯГИД. Дила пикрили, хІуни хІяжатагарті гъай дурулри. Къянала...

АМИР. Дурули виасли, се бирида гьатІи хІуни?

СЯГИД. Се биру ишгъуна аги-къяйдализиб? (*Айзурли ил унзаличивяхІ ватирхъур. Дураухъи, илди гІейкІу, умхъу кисала кабирхъу*)

Се барес дигулрив хІед? (*ГІелабахІ ганз кайцІу*)

АМИР. УрухмакІуд, къалмакъар хІедирис. Наб хІечил ихтилатбарес дигулра. НушакІун гьалмагъуни сарра. Ахирра-ахир мурт саррил дирутири. Наб дурес дигути биалли, нуни дурис... сеннира. СенахІенну, вегІла пикри бурес гІягІнили саби, селичилра хІерхІейкІули... селичилра. Или хІебиалли, адам машиналичи мешуиркур. Сукъурли, буйрухъуни тамандируси машиналичи. (*Ветухъи столличибси жуз кайсу*), иш жуз белчІунсив хІуни? Ишизиб ца биштІаси хабар леб, кІел бяхІцун дуцили. МягІничебси масъалаличила ахІен иш. Ца пулан дурхІяла ихтилатличила саби... сунела гІясаличила... гІямрули къадарбиахъубси гІяйсаличила. ЛехІизи... «ГІяхІцадхІи висули кали гІергъи, илини бекІ ахъбуциб, сунела мякълаб, сайван чІикъбитІунси гІясаличи хІеризур. Илини симкъикІули иличи някъ гьабатур... амма кахІесиб...

Чебаэсра хІейгулри! – ахирра иб илини, къяййчил, лебилра хамха, зерзербухъахъи. – Агъула чІичІалаван хІейгулри! ЧІичІалаван... СенахІенну, хІу лишан сабри... ну чулахъ виънилис бикъридеш дируси лишан! Нешла канилав ну чулахъли алкІухІели, жунабла уркІилизиб хІура бузули буилри... наб къадарбиэс. Барх-барх набчил бузули буилри хІу, лебгІеб наб гьамли, вацІала чирхълизиб! Илбагъандан хІейгулри хІу наб, иргъулрив? Иргъулрив хІуни?.. Гъайгъайра, хІергъулри! ХІелақІун уркІи агара... хІу жан агарси сабри. Дила къуллукъчи!.. Ну кахІейкахъес къарауйчибси! Гъачамалра дуцІухъунси ахІенра ну, вяхІ удили кайкили къянкъ бячалра, пикрихІебарили. СенкІун хІу лебри! ХІу! ХІу! ХІу!..

ДурхІя лехІкайхъур, бекІ чІябарличі гІяшбиру. – Амма лерилра дурес гІягІнити хІедурилра. – БекІ ахъбуциб, гІясалигІив умцІули, чуйнарил ита-иша хІеризур, ва иб: хІу, наб хІейгулри... (*Жуз къяпІбарили столличі кабирхъу*). Иличиб къутІкъуси баркъуди хІебалас нуни... ХІебалас, дурхІяли хІебалули сай викІулрив хІу, ил ихтилатли сунела къяш сагъхІебирни? Гъайгъайра, балули сай. Амма илди гъай дурес илис чараагарли гІягІнили саби. Паргъатиэс багъандан... уркІи паргъатбарес багъандан. Сай пикрумазив азадли виъни аргъахъес багъандан. ГІяса ишаб чІянкІли сабаб саби...

СЯГИД. Набзи се бурес дигулрив хІед? НукІун гІяса ахІенра. ХІура чулахъ ахІенри...

АМИР. АхІенра. Амма къуллукъ илизиб ахІен. Нуша иш ванзаличир лералцадхІи бархъдеш бурес чебиркур. АсукІебирар, чи-биалра вегІлис гІяхІхІелзни багъандан, лехІкайхъес. ВегІ адам виъни хъумартес. АсукІебирар лерилра вегІла гІямру цархІиллисцун багъишладирес, илала къугъни чекайсули.

СЯГИД. Хела гълав ну гъйибла вегІ ахІенра.

АМИР. АхІенри.

СЯГИД. Гур се дигули гътІи хІед набзибад?

АМИР. ХІу гъйибла вегІри, адам сайливан, гІямрула гълав. Хела гълав. Хела дигути дурхІядешла гълав. Адамдешла гълав. Горькийли ахІену «адам – ил у ахъли зайбикІули саби» ибси? Адамдеш ибси дев, дила пикрили, гътІира ахъли зайбикІули саби. Чилалра ихтияр агара ил ахъдешлис вершадеш дирес.

СЯГИД. ХІед гъанбиркули бургар дила сабурла ахир хІебируси саби или. Ну лехІкахъбси хІезивад урухІули я урузІухІели ахІенра. Набзир гъачамлис хІечи, гъалмагъличиван, диги лералхІели сайра. ХІу ил статья багъандан чевверхес хІейрулри набчивад... Нуни хІези бурира, набчиб гІяйиб агара или.

АМИР. Статьяла чебкад хІед чебиркур ил хатІаласи биъниличила багъахъни кабахъес.

СЯГИД. Се?! Секъяйда?!

АМИР. Нуни хІебалас секъяйда сабил ил бируси, амма хІед чевкъар ил секІал барес. Нуни хІези бурулра, коммунистливан.

СЯГИД. (Алзан. *Вачавархили хъутурулхъан*). Коммунистливан?! Се ири хІуни?! Ну дуравшибселис гъачамлис сай умули виэс чебиркур. Нуни сагали следствие барахъес тІалаббирис.

АМИР. ХІукІун танбихІлаварри! Чебахъири.

СЯГИД. ХІехъира... ДеркІибти хІябал дус нуни кепеклизира хІедирис. Дарсли диаб илди наб. КІукІайтани гъачамлис нушала дунъя цІумбикІахъули лебал биъни гъачам гътІи гъанбушнилизис халбирис ил танбихІ нуни.

АМИР. Чуйнара ил пикри бакІиб дила бекІлизира. Илбагъандан ахІенрив статья кабахъибсира?

СЯГИД. ХІечил къиянни саби гъайикІес...

АМИР. ХІечил гъайикІес дила иштяхІдухъи сари викІулрив хІу? Амма гІягІнили саби... ГІягІнили... хІези бурес багъандан. ХІу чи сайрил... Чичи мешуикирил... Чичи шурухъирил... Азадси творческий адам ахІи, хІу дуклуми дигубси къабулданничи мешули виъни бурес. Газета районна совхозунала ва колхозунала дояркабани дирзибти ниъла къадар ириъла иш заманаличил цугдуцибхІели сецадла имцІалил яра камли дирзилел бянти кадирхъуси кІапІиличи шурбатничила бурес... Райкомла секретаръли, халкъла контролла комитетла председателъли ва цархІилти хІянчизартани совещаниеличиб се бурибал буруси багъахънибала кІапІиличи шурбатниличила бурес... ХІу вегІти хІела дяхІлизивад хІу жявлил мяхІрумвиъни бурес... ХІуни дяхІликала бихулри. ЦархІилли хІези хІебуру иличила... нуни хІебурасли.

СЯГИД. Тухтурти гымбуркІути ахІен бикІаргу зягІиптачи. Се-дигара бура. (*Илала тІама руржар*). Гъм... ГІяжаибси гъунибаъни бетаур нушала.

АМИР. Гъуниваэс дигули вакІибси ахІенри хІу. ХІейъни нунира балулри. ХІу гІямруличил хІязтаиркъулри. ХІязталара ахир бирни хІебалули... (*Ца камси замана лехІкахъили, иру*). ХІуни Мефистофельличила хІебакъибсив?

СЯГИД. Чичила?

АМИР. Ме-фис-то-фель-ли-чи-ла! (*ЛехІдеш*). Эгъе-гъе-гъей-й-й! – чейхур дубурличибад тІама. (*КІелра улкъайличибяхІ ласбирхъур*).

* * *

(Зубариятла хъали. Барсбиубси агара, чЯнкІли столличибси хъабалар вавни цархІилти сари. АлхІят, уталичи кайили, музыкаличи лехІахъили сай. Зубарият кухнялизир сари. ТалхІянала вякъярла иргъули сари. Полотенцели някъби ушқули ил гъаррикІур).

ЗУБАРИЯТ. Чяй хІядурдаришав?

АЛХІЯТ. Дила иштяхІ агара. Баркалла.

ЗУБАРИЯТ. *(Уталичи карираp)* ХІу ишбархІи вамсурсигъунаригу? Се-биалра бетаурлив?

АЛХІЯТ. Селра гъм... бетаурси агара. Нуни аргъес вирули ахІенра се сабил наб гІягІниси? Се?! Юх, аркъяс ну. Селис гІягІнили адамтала гІярзаби ахтардидирули бурхІни дуркІес? Деклизиб къянаван илдала зугІлумази илхІес? Гъа?

ЗУБАРИЯТ. Цаибилли се иба?

АЛХІЯТ. *(ШайчибяхІ бекІ ласбатурли, къутІкъули гъинчІилзан).* Гъм... набчи дила гъимидулхъули сари. *(Алзан).* ЛебГІеб балхІебикибси хІянчи барира. Урузиэси...

ЗУБАРИЯТ. ЦархІилтани хІебируси барилрив гъари? Илаб хІед хІянчи гес ил къабуликалри, хІела аги вайтІа хІебири. Вирхаи набчи.

АЛХІЯТ. ХІечи вирхаурли барира нуни ил баркъуди. Балулрив, иличи ацІайчи дурес хІядурдарибти лерри. АцІибхІели... рирхаи... гъар секІал хъумкартурра. ДягІли ардухібтиван детахъиб... уркІецІидухъеси пакъирличи мешуикира.

ЗУБАРИЯТ. Се сари, хІела бекІличира, хІуни дурути? Балулрив чум адам башулил гъар бархІи иличи? ХІянчи багъандан? ЦархІилти тиладибачил! Ахъбиэс дигули, гІяхІил хІербиэс дигули. ХІу-декІар цархІилтачив вайсирив, яра?..

АЛХІЯТ. АсухІебирар ил барес. Иргъулрив хІуни? Гъугу, хІу пикрирухъен, жагали... пикрирухъен. АцІили – ну алавчар хІеризурра... хІебалас... сен хІеризуррал. Балули ахІенра саламалра бедирал. Кайахъесалра мер чехІебаахъиб илини наб... СенахІенну, дила куц чебаили, аргъиб, илкъяйда гъайикІесра набчил асубирни. СенахІенну, ну рангагарлири... Нуни ахирра къяраили гІянд, ну хІянчи багъандан вакІилра ира... ХІу, викІар, чинав узурли? Нуни бурира редакциялизив или. ГІур се хІянчи гІягІнилив хІед, викІар, папрус улкули. Нуни ира, ишаб райкомлизиб инструкторла хІянчи лебни багъурли вакІибсира... ХІези чили буриба, викІар ил дила дяхІла вякьизурли. Нуни иличила хІебалули, хІуни сен багъурсири? ГІур ну авъяхъира... се ирусил хІебалули... се бирусил хІебалули... Нуни ахирра аргъира, арукъес гІягІнили биъни. Баркалла или арукъес. Илкъяйда барра барира. Унзала мякъла ваили, ну иличи ласяхъира... ва тамашавиубра... Ил сунела пикрумазив вархилри... Гъалабси кагъарличи хІерикІули набчила хъумартурли. Кабинетлизив ну левалниличила хъумартурли.

Юх... *(ГъакІбурули бекІ)* юх... асухІебирар илкъяйда... шаддикъладирес. Гъарил инса сунела мер лебси саби...

ЗУБАРИЯТ. Сен-сен бургусив ил мер, вегІлизи, ма иш хІела сабину, каса викІуси агара виалли?

АЛХИЯТ. Сен агарси? Камхейрар... Хейаллира, селра хебирар. Урки селис гягниси? Илини бургу сунела мер... Саби гьуцѳбиклуси, чеббикѳбси. Амма чинаб-биалра хянчи бикахьалли херис гьамадли саби или... тиладиикѳули вашес асухебирар. Илгьуна манзил сабхели саби гьанна нушаб кьянси... Тиладиухьес балусилис хянчи беддугули, паргьатли лехкахьили ууси умуси хянчизар чехейухели. Хуни балулрив районна духнарти кьуллукьунала отделлизибти хянчизарти 90 процентцад педагогуни биъни. Райкомлизибра илкьайда саби... Асубирисив ил? Юх... юх... нушани хьумартурлира итав гямзилав лехкахьибсира левли виъниличила.

Ца бархи редакциялизи кагьар бакѳиб. Ишгьуна суалличил.

– Нуни се бариша? – Ил гьабза колхоз кабизурхейчивад узули калири. Херели хьуми далцули, дугели унци дукидикули уилри. Се сабри итхели колхозникунани кайсуси? Чула колхозла лебси... анкѳи, диъ, ниъ... Кьанни ил колхоз совхозличи шурбатурлири. Пенсияличи укьес замана баибхели, илала бузерила стаж хебиулри, сенахенну, колхозла лебилра архив беткахьилри. Собесла заведующий вирхули ахенри ил колхозлизив узули калниличи. Пикрирухьен. Илини тѳалабѳирулри бикьруми барх кахьес. Ил итхели узни марбарахьес. Херрикенгу ил адамла увяхидешличи. Се бирути нушаб илди бюрократуни? Илини кьалли балулри итхели адамти бузни. Агь, хябилра балулри. Юх, асухебирар кьянна адамличи тѳулби ургавад хериклес. Илала хурматцун барни камли саби. Урузклес гягниси саби илала кьатавтар някъбазивад. Илди иш ванзаличи мешути диъни багьандан. Ванзаличи.

Унзализи кьутѳдирхьу. Зубариятли ибхьу. Халаси сумка жаняхлизивсили хьули бухнайсу. Алхиятли илала някъцун чебиу. Вакѳибси, хед саламтира дуриб или ветихьур. Зубариятли сумка кьухнялизи арху. Алхият тамашавѳубли иличи хериклар. Кьухнялизирад ил чаррухьунхели, селра чехебаибсила гѳердѳу.

ЗУБАРИЯТ. Хебиалли ху узуси мер ца ити эси буили ахен. Бархьдешлигив умцлес, ил кабизахьес илаб вирули гѳергьи

АЛХИЯТ. Бархьдеш кабизахьес гьамадси ахен. Сенахенну, ил гьарилли сунеласун иргьуси сабину, ил гьарилла декларси сабину. Масала, ху... Сецад-дигара жагаси хьунул адам сарри ху, талихличи лайикьсира сарри, амма хезиб леб се сабил багьес хейрусси... лишан виклусив... сейлусив илис хебалас... хечивад адам убшахьуси. Кьакьбирахьуси халасигьуна секлал.

ЗУБАРИЯТ. *(Дурибти масхараван аргьили)* Се саб вара ил секлал?

АЛХИЯТ. Ху мурталра рархьли риъниличи умут биэс викѳулра. Дила пикрили, асухебирар хьунул адамлис хуван пикри-децѳ агарли херререс. Хед – хьунул адамлис тѳабигьятли гибси чебяхьси хьарбаркь лебси саби – нешдеш. Хуни иличила хьумартурлири.

ЗУБАРИЯТ. *(Лѳергѳер рачарирхур. Хулбазир нургьби дагьардѳирар).* Ну кьабулли ахенрав гьатѳи иличи? Гьа? Ахенрав? Хьунул адам гьарли- марси хериаллира, мурул адам сай гьийибла вегѳ... чянкли мурул адам. Гьарли-мартѳи гьубзни лебли биалли, илди хьунул адамти илдигьунти хебиэс хебирар. Се биру хуша шуркадухьѳи диадалли гайцѳукьуначи? Хушани тѳабигьятли хьарбарѳси чебяхьси хьарбаркь хьумартурли диадалли? Чис сабив илди хейгути, гьарли-мартѳи гьубзни? Бура, се гьабза вирусив чягьирла клел умеѳ держалли лезми хяливан сурбалтуси? Гьалабизуни дяхьэс

хлейруси? Бахъалгъунтани гъанна интеллигентный дешлис дарсдарили сари гъабзадеш. Хед гъанбиркули бургар ишгъуна гажа рираси или мурталра. Юх... хлу хатгаиркулри. Ну шери рякъунси наб дигусилис сарри. Дигахъаси ил наб. Ну сунесра дигахъусири или гъанбирки, Хебалас. Амма илини ну рицира. Къанниван. ХЯкимдешла уталис. Нешдешлизирад урухклули ахенри ну. Ахенри...

АЛХИЯТ. Хергъира.

ЗУБАРИЯТ. Хергъули виадли, бусягъат иргъахъис. Илала дудеш ревизор вири. Давлачевси вири ил. Се-дигара барес ахъри лебси. ГЯрмияла къянази херхъиб илини ил. Чуйнара милициялизи викили верцахъиб. Сайра ил серхурси вири. Уруххлекли се-дигара барес. ГЯхЦадхИи хъули хлекили ца бархИи чарухъун... битибсигъуна куцличил... гъанкли велкъайчи усули калун, чевсаргъибхели, иб: хечивад ну аркъула.

Чина? Сен? Се багъандан? Ита-иша рухъунра ну... Амма пайда хебиуб. «Дудешлис илкъяйда дигули саби» иб. Къанниван вакИли илала дудешли буриб: хЛуни виклар, ил хунклизи уцес херирулри. Хъалицла хердарес... илкъяйда калалли, илини се-дигара лебку дила бекличи. Ну ухънавилра. Базра хедикили, ца хЯкимла рурси кариили, паргъатвариб. Аргъирив? Наб ил дигни багъандан, нуни хъулив даим хейхИни багъандан, ну вайси ретаурра.

АЛХИЯТ. Хейгули ризэс гЯгИли сарри хлу илис. Дигули виалри, къаршидеш дири.

ЗУБАРИЯТ. Хебалас... *(Рисирар) АлхИят, се бирусил хебалули, вачавирхур. Кухнялизирад шин хили, гъадурцу).*

АЛХИЯТ. Черрерхи, Зубарият, децлагахъира хед нуни...

ЗУБАРИЯТ. *(Зубарият, разихериубли, ласрирхъур)* ЧЯнкИли тиладимайкИуд... паргъатрияхъес. Наб хейгахъис илдигъунти гъай. Ну бурсириубсира нуни ну паргъатрирес... *(Камси замана лехИкахъили, дамрирар).* Илала гергъи наб адапти бахъИи калун хейгули. Илдачи рирхес херирули. Багъла-багълали бурсикариубра.

АЛХИЯТ. Зубарият, сунези, Амирлизи, хъарбаэс цахбизур наб, хЛуни хебуриду сен туснакъварибсирил ил?

ЗУБАРИЯТ. Амир? *(Гама барсбирар. Ил гъанбушибхели ил разириубсигъуна сари)*... Сенахенну, ил ряхИму агарли вархъси вирухели. Сунечира валли. ЛебГлеб бархисси дело уббухъун ит. Илини бузахъуси. БехИбихъисси бибГЯн-хъяшси секИайчибад сабри, ца трактористла гЯрзаличибад. Сагаси трактор асес илизирад кИдарш къуруш сасилри совхозла директорли. Сунени директорли ахенри, илала адапти бири, илдигъунти дяшбашуни сайсахъес, сунес хЯнчурби дирахъес, буцибти. Иличибад бехИбихъиссири... Пур, илини машинти дирцини якъинбиуб... Пур биалли – цедеш...

АЛХИЯТ. Цедеш...

ЗУБАРИЯТ. ИтхИели Амирличил ну тьянишриубли рахъИи риубли ахенри, илбагъандан лерилра дигЯндешуни хедалулри. Дила пикрили жамигъатлизирад цедеш асира или документуни дарили, совхозли планна чеди дедибти цедешла баянти кахедикахъили... чусдирули буили саби... илдани... Риклулагу, лерилра дигЯндешуни хедалулра... Ил хабарли лебилра район клухбухъахъун... Сенахенну, гъай-мез лерри, сай цабил

секретарьра иличил вархваси сай или... Илцад мурхъси, къиянси уббулхъни хЕбалули, Амирли иличил барх ца гъатИ дело бузахъусири, ца бригадирла. Илини арц сайсули руилри, хЕбузути хІянчизартала уми нарядунази кадиркахъули. ХІера ил бригадирли къяш гъабатур илис. ГъахЕбатурну, илизи гъабатахъур. Секъяйда бирарал хЕбалас, хапли Амир такъсирчиличи шурухъун ит манзил... селра кумеклихЕбиуб... селра. Директорла дело тІашаиб... такъсирчидеш бугагни кабизахъурли... ГІур се бетаурал хЕбалас, убла хІянчизарти саби гІяхІулали бубшес бехІбихъиб. Улкализиб бухъунси сагаси, аргъес хЕйруси дягІлизибад урухбиуб биэс... Гъанна ил замана кабикайчи хЕтурли, дураили сай... хЕбалас се пикрибарилл... Бархъли бурасли, наб дигахъира ил паргъатиубли. Ил чарухъни багъурла дила урКІи къакъали саби.

АЛХІЯТ. Хъумартурли дигулрив гъари хЕд ил анцІбукъ

ЗУБАРИЯТ. Ге, хъумкартурли... ХІуни дила пикрили, балули ахЕнри чичил дяхІ-дяхІли къаршиикилил ил. ХЕбалулри. Цулби кадикили хъалли хя хяли кавлуси саби бикІаргу, илдира лехІли хЕбуар. Бархъдеш кабилзахъа или...

АЛХІЯТ. Бархъдеш?.. Бархъдеш саби-сабил кабилзусив? Юх, хІу хатІариркулри. Ну лехІкахъили, хІу лехІкахъили, цархІил лехІкахъалли... Ил вавалихЕбирхъур. Илбагъандан ургъес гІягІнили саби. ХІяжатбикалли, жанра ахЕрхЕдарили. ХЕд гъанмабиркахъид нуни ишди гъай ца ити дурулра или... – гъайгъайра, илди ахътиван сари – илди ахъти гъай гІямру харждарес виъни – иш ванзаличиб вегІла адамдешла чебла чебахъни саби.

ЗУБАРИЯТ. ХЕбалас. Шалаличи, шаладешличи хЕрхуси ургхЕргар. Амма аги-къяйдали хІули бурсибирули саби цІябдешличира. Къисматлис мутІигІирули сай...

АЛХІЯТ. Амир вирулигу мутІигІхЕкІес? Ил вирулигу лерилра рангани багъандан ургъес... ХІуни балулрив дунъяличир лерти верхЕл рангцун диъни? Калунти лерилра илдазир алКІути сари.

ЗУБАРИЯТ. Рангани се дикІутив ишар?

АЛХІЯТ. Жагали пикриухъалли аргъес къиянни ахЕн, гъарил адам ургъуси вегІла ранг багъандан виъни. ВегІла ишара багъандан.

ЗУБАРИЯТ. Нуни цацахЕли хІуни дурути иргъули ахЕнра. Гъанна селра хЕргъира. ГІяйиб мабирид.

АЛХІЯТ. Селис гІяйиб бирусирив?.. ХІу набчирад черрерхи, ардякъунти гІямру гъандикахъили или. Нуни балуси ахЕнри хІу гъачам хъаллариубси риъни. Рирхаи набчи, ахЕнри... Гъанна иш ихтилат нуша- ургаб бетхЕурси биалри, белики, ну хЕла гъалав мукІурвакІесра асубири – хЕчи, гІядатла хъунул адамличиванцун ну хЕрхЕйКІниличила. Гъанна хІу рирхмаруд... ца ити буруси сабину. ХЕбурнилизи халбаресра асубирар... ХІу чераибмад наб гІяхІризурри... ГІяхІризурри ахЕнну... Ну имцІали хЕчила пикриикІаси... Гъанбиркуру, гъачам шагъарлизир къаршидикили? НукІун ила хІу багъандан вякъунсири. Инаразибад багъурли... хІянчиличи диги имцІадиуб дила. Шадиубра. Белики, илди хъуланазібад ит халаси шаласи хъул акІесра асубири, амма се-сабил диргалабухъун...

ЗУБАРИЯТ. ВегІла хъуланас буйрухъикІес вирни... ил...

ЛехІдеш.

(АлхІят къайгъиличил, зузбитІахъи хъяб, лехІихъур).

... Ил цаќъси адам сай. Ну илкъяйда хІерирус. Дигахъули гІергъи – вегІлизивад вегІ верцес гІягІнили саби. Левилра вегІ ведили илди хъуланала арилизи.. буйрухъикІни... ил... НушакІун адамтира.

АЛХІЯТ. Гъанна балулра хІела тІабигІятлизиб бегІлара диргалабулхъуси се лишан сабил.

ЗУБАРИЯТ. *(Зубарият бурусиличи илцад-декІар лехІахъили ахІен).* Гъу...

АЛХІЯТ. Муриси бикІар илгъуналис... хІу гыммаруркІуд... Дила гъай хІела тІабигІятличила сари. ХІела шалубачила... Рирхаи. ХІед мурталра гъамадли хІебирар... сенахІенну, мурталра черкарурхес хІядурлири хІу... Гъими буцес хІебалулри.

(Ил замана унзализи сагали къутІдирхъу. Зубарият, дуцІли гъамриубли, ибхъу. Амир хъули айцІур. АлхІят чеили, салам луга).

АМИР. Ассаламу гІялайкум.

АЛХІЯТ. ВагІялайкум салам. *(Айзурли някъ бурцу. Гъачам Зубариятличи, гъачам Амирличи хІерикІули.* ХІела някъ цацабирули мубаракварес дигулла.

АМИР. ИшбархІи байрам...

АЛХІЯТ. *(ГъинчІизурли)* Балулра. ХІела кабизалачевдеш багъандан, цІумадеш багъандан. ХІечила белкІесра пикрибарилра нуни.

АМИР. *(ХІулбази хІерикІули иру).* ГІягІнили ахІен.

АЛХІЯТ. Сен?

АМИР. Илизибад селра бетхІерар, цаибилгъуна. КІиибилгъуна, дигулра набчила хІушала редакторли белкІи.

(Зубарият тамашала хІерли иличи хІеррилзан)

Тамагавк игъес хІебалусила бекІличир демдрира дяхъурбира камхІейрар.

АЛХІЯТ. Бархъли бурасли, нуни гъайла мягІна хІергъира, или биалра, вирхулла илдазиб мягІна лебли биъниличи. Гъанна биалли ну чарулхъас.

АМИР. Илцад жявли? Белики, калиши... Гъа, хІела командировкаличила хІебуриду?

АЛХІЯТ. *(Калес сабаб бикили, разиси тІамаличил).* Бурис. Сен хІебуриси? ХІушани сен-сен къабулбиридал хІебалас гъанна нуни буриси, амма илаб нуни чебаибсили ну къагъизахъурра. Дирхаирая набчи, дила аргъалалис декІеи бяхъ чекасес чебикиб. Адамтани се-дигара бурули буили саби, амма нуни багъурси селичилра цугбуцес хІейрар.

ЗУБАРИЯТ. ХІела жайчира бура, лихІби эмхІелаван халадиулину.

АЛХІЯТ. Бугагарти ученикуни кабикахъили школализиб ца комлект акІахъублири. Иргъулраяв хІушани?.. Гогольла поэмализибван... ученикуни агара, амма списоклизиб абзур класс леб. БелкІи саби мицІиртиван... Арц багъандан хІебуриси агара къалли цацабехІтани.

АМИР. Директор сейкІив?

АЛХІЯТ. Ит-иш бурули калун, гІяхІдеш бетхІерни багъурхІели, асес пикрибариб. Гъар-се секІал дигІяндарадли пашманхІейруд или буриб. Амма

нуни илизи аргъахъира дунъя авмузан хЕбиъни. Ца директорлицун барес вируси хІянчи ахІен ил. Ил илав рахажлизиса ца мявацун сай. Багъудила отделла заведующий командировкаличив сайри. БекІ бухгалтер больницализиди каркъиб ишбархІи. ИхтилатикІуси манзил аргъайзивад ухъун...

АМИР. Селра хЕбирар. Аргъайчила итхІели пикрибикІес гІягІнилири. Гъанна къанни саби. Илдигъунти бяхъяни чекасес гъанна илдала цакаъ биули ахІен. ХЕбиулихъар се бирусив, хъумуртули биалли дунъя журуга биъни?

ЛехІдеш

(ГІяхІли кален или АлхІят аркъян. Амир улкъайличиди гъамирар, гъарахъси дубурличиди хІерилзан. Зубарият рачарархили сари. Се сабил бурес дигули.

ЗУБАРИЯТ. ХІу итхІели ишгъуна къанси манзил сайри ацІибси.

(Амир ласирхъур) Дураб забли ургъулри.

АМИР. Ургъули бишиши, викІулра. ХІуни набзи ибсири итхІели, хІу уруххІекІуси уилри или.

(Зубариятли бекІ къухІбуруцу. Гъанбик гІяхІхЕбизни багъесли саби)

Ну хІела илди гъайли пикрумази гІелаушира.

ЗУБАРИЯТ. Ил дила хатІа сабри, сенахІенну, набчила хІезиб вайси пикри акІуб итхІели.

АМИР. ХЕбалас, Зубарият. Сен вайси пикри акІубал хІела, амма ну дебали пикриухъунра итхІели се багъандан хІуни илкъяйда ирил. Балубли ахІенри чизивад уруххІес гІягІнисирил...

ЗУБАРИЯТ. Нуни или ибси урхІла гъай-мезличила сабри, хІу виадли пикриикІулри бекІлил цархІил секІайчила.

АМИР. Се багъандан вакІирал нунира хЕбалулра. Ит дуги къунзикІули вахъхІи калунра ну, гІур... хІела унзала гъалав вагъариубра.

ЗУБАРИЯТ. Телевизорличиди хІеррикІулихъар нуни селра иргъули ахІенри. Пикруми царайгІир сари.

АМИР. Нунира иргъуси бугаги.

ЗУБАРИЯТ. Наб дигулри хІечи хІеррикІес, илбагъандан хІечи гъамли кариира. Ну хІечи хІеррикІес рирулри, сенахІенну дила ута хІелайчиб гІелаб сабри. Ну хІечи шайчирад хІеррикІулри. *(ИтхІели саби кабишбтиван кабирар)* ГІе,гІе ишкъяйда сарри кадибти. Телевизор итхІели ит гІямзилаб сабри.

АМИР. ХІечи ласирхъес ну уруххІулри итхІели. Се сабри нуни аркъухІели ибси?

ЗУБАРИЯТ. АркъухІели? БусягІят... Гъа!.. ХІу къаршили ахІенрив гъамли гІурра гъаввакІасли?..

АМИР. ГІе, гІе... тяп илкъяйда сабри. ИтхІели хІу набчи хІеррикІули гІинчІризурри, гІур бекІ шайчи ласбатурли ири: ну хІечилаван хІу набчилара пикриикІадли, хІед дигухІели вашен.

(Зубариятли дяхІлици хъутри чедуруцу, цархІил хъули ретулхъан).

ЛехІдеш чебилхъан. Амирли улкъайличиди гъамиубли, сигарета кайсу.

Сцена билшан

* * *

ХтеризурхИели, ишаб хИербирути талихИагрти адамти саби или гъанбикесли къалли. Ца гИямзилаб чарнай, гИянулби. ЧИябарличир мазала чумал гули. Унзала ца шайчиб къянари. Лацличиб вайтIа ухуси чарагъ. СубхИянна мачни садирхъули тIаиси хъунул адам. Амир хъули айцIур, гИяшли хъехIбуришу. Хъунул адам уркIрухъи ласрирхъур.

АМИР. Иш хъали Кумсиятла ахIену?

КУМСИЯТ. (Ретухъи чирагъла шала имцIабиру). Саби, гИяхIял. Ну Кумсият... (Буруси таманхIебиру. СубхИян михъирличи гъяжбарили, гIеларяхI ритIикIур). ХIу?! (ГIяшли шивкIиврулхъан). ХIед се гIягIнили?

АМИР. УрухмакIуд. ХIед вай барес вакIибси ахIенра ну. ХIезибад наб гIягIнисира агара. ХIу черазе вакIибсира.

КУМСИЯТ. Дила талихIагриличив чевдукарвахIес?!

АМИР. АхIенра. ХIу урхIла някъбазиси ярагъ риъни нуни балулра. ИтхIелира балулри.

КУМСИЯТ. Се дигулри гъатIи хIед набзибад? Дила гъанна селра агара. Селра. Цайли цаси уршира илдани чеввалкIахъун. Чула арилизи уцили сай. Дила разидеш – чархла арадеш саби, сенахIенну, лерилра калунти гIямру Аллагълизи рулгес дигулра. Набчивад чевверхахъес. СенахIенну, гIямрулизир дахъал такъсирти дарира... ХIу набчи тамашавиубли ургуд илкъяйда рикIули или. Азирнара дурибти дугъби сари илди нуни. Азирнара. Нуни балулри хIу льявкънира, сенахIенну, хIу убяхIдеш хъумуртуси ахIенри. Ну хIела гъалар гIяйибла регI сарра, илбагъандан тиладибирулра: чевверхи набчивад!

АМИР. (ГъинчIизурли) ХIед гъамадли ну чевверхахъес дигулри. Гъамадли. Наб багъес дигулра чи сайрил хIези буйрухъикIуси. Иргъулрив хIуни? Ну вирхули ахIенра хIуни гъар-се секIал аргъниличира. АхIенра.

КУМСИЯТ. Тиладибирулра хIези, мабурахъид ил убяхIси баркъудиличила набзи. Наб гIядабли саби ил гъанбикахъес.

АМИР. ХIела гIяхIдешличибли, итав, мурталра цадехI цIуба ранг ахIи селра гIур чехIебуси мерличиб наб ункъли бири рикIулрив хIу? БибгIан-хъяшси ца секIалра убхIебатурли гъар-се секIал дурахъес вакIибсира ну. Гъу! ЛехIахъилра...

КУМСИЯТ. ГIяхIси, хIед дигули гIергъи, бурис, чIянкIли хIу вирхай набчи. Ит бархIи ну хIядуррикIулри хIези гъар секIал дурес. Гъар секIал! Сарлихъар... ИлкIун нуни пикрибарисси ахIенри..., агарти ялчнас наряд бирес. БекI бухгалтерли сабри илгъуна гъанбик набзи бурибси. Гъала-гъала ну къабулхIерикира, амма гIур къабулрикира, сенахIенну, рурсила тIалабунимцIадикIулри. Ит аса, иш аса рикIули... Ахирра-ахир, мутIигIриубра хIярамси хъуллис... Илкъяйда гIеларикира ну деклизи... хъяблараайчи. ГIур къанни директорла хъябличи хIуни бул, чебушибхIели, илдани ну пайдаларарра. КъабулхIерикес дила чара агни балули. БархIехъ бекI бухгалтер вакIиб хIябдарш къуруш хили. Илини буриб се-дигара барили, илди арц хIела кисала кадихъес гIягIнили биъниличила. Пгергъила бархIи,

ну рякьунра прокурорличи, хІуни арц тІалабдирулри или бурес... Илини, илдала лугІурби черасили, рархьира. ГІябуйчи чебяхІкахьибси хІякала кисала хІу дуравхьунхІели, арц кадихьес ну бажардириубра. ГІур бетаурси хІунира балулри.

АМИР. Нуни балули ахІенра, сен илгъуна убяхІдеш барес хІу къабулхІерикес хІериусирил, яра хІед гъанбиркулрив хІу танбихІлахІерарили ралтари или. Гъа? ХІукІун неш сарри. Неш.

КУМСИЯТ. Илбагъандан сарри ну хІерриубсира. Дила рурси сарицун кавлухІели. ЗугІлумазира тІалабуназира илхІи...

АМИР. Ну уркІи-уркІилавад вирхулра хІу талихІагар адам риъниличи. Вирхулра. Амма уркІецІидухьеси ахІенри хІу. СенахІенну, лерилра хІела гІямру къяна сари. Илди чехІебаибкъи, пикрибарибси муэр саби хІела. Нуни балулра сен-сен хІу бригадир ретауррилра. ШакикІулра. Ил субхІянра хІуни някълизи касибси, хІела гІямрула къалпдеш аргъили, Аллагъ чевверхахьес ахІен. СенахІенну, гъарилла Аллагъ ишав сай. (*УркІиличи тІул чебуриу*).

КУМСИЯТ. Нуни балули ахІенра се бирусил. Ну гІяйибла регІ сарра хІела гъалар, илбагъандан хІечил гъайрикІес наб гІядябли саби. Наб хІечил къабулрикесцун саби калунси.

АМИР. Наб илкъяйда дигули ахІенра. ХІела баркъуди марбареси – баралра марбареси леб биалли, бура.

КУМСИЯТ. ХІуни ил балулри.

АМИР. Юх, ахІенра.

КУМСИЯТ. (*ДуцІрухъи ракІили гъалар тІаширилзан. Гъяждарили михъирличи някъби, рисули иру*) Сабаб цацун саби. Наб хІяб буркълри итхІели. ХІяб. Калунси гъакІрухьес сабри. ГъакІрухьес. (*Къакъбиру*).

АМИР. Се ирусив хІези? ХІушала къушумла адамличи хІекъли балбикибси баркъуди саби. ВегІла гІямрулис урехи акІубхІели – цархІил гъалакъаниличиб гІяхІси селра агара...

КУМСИЯТ. Итди набчи иш балагъ бакІахьибти селизилра хІебарили судлизи бедлугаси нуни, сепайда, набчи бирххІерар.

АМИР. Сен?

КУМСИЯТ. (*ЦархІил хъули ретулхъан. Кагъар хили чаррулхъан*). ХІеризи.

АМИР. (*БучІа гІяшли*) Мурт гибсив иш? (*Тамашавиубли*).

КУМСИЯТ. Ириъ.

АМИР. ХІуни балулрив иш се сабил?

КУМСИЯТ. ШакрикІулра.

АМИР. Се багъандан гибсив иш? Гъа? Се баррив хІуни, ишгъуна справка геси?

КУМСИЯТ. Суд барили, хІу арукили гІергъи, дила паргъатдеш детахьиб. Ну русес хІерирулри. ХІянчиличи иштяхІ бетяхьиб. ХатІа аргъили хъалли вегІличил вегІ жаликІнилизібад се гІяхІдеша кумекбареси агара виалли?.. Ну илкъяйда сарри. ДецІрикІес ахъри хІебикІуси агиличи ретикибхІели нуни гъар-секІал дурес къасбарра... Вирхаи набчи, хІебалас.. Ца бархІи набзи пенсияличи аррукъяхьес буриб, арадеш вайтІа биъни багъандан. Комиссияличи ралли хІярукъяхъи, гъар секІал чули дариб.

АМИР. Сецад кайсулрив гъанна хІуни, лехІкахънилис?

КУМСИЯТ. Се бариша, дила гъай цаІакъагардариб биалли?

АМИР. *(Шайчи)* ХІерагу ца, илди селичи шурбухъил? Араси заГипсилизи халирули сай, духуси – мехІурлизи... Се-дигара барес хІядурли саби, се-дигара... селалра гъалаб тІашбизес пикри агара... чІянкІли хъямбикІес! ЧІянкІли билгІес... Илдани хІебалуси леб биалли, ил чІянкІли адамдеш се сарил хІебални саби.

(Кумсиятлизи)

ХІушани ну бегІла дигуси, бегІла ну сунези гъуцІикІуси адамлизивад мяхІрумварра. ХІушани ну дудешлис хІейгиварахъира. Илини ну уршидешлизивад къябкарра! Иргъулрив хІуни? *(Ил замана гІяйниб машина тІашибилзан Кумсият дурарулхъан. ДуцІли хъули рухІнарулхъан).*

КУМСИЯТ. Ил лявкъули сай иша! Се гІягІнилира?..

АМИР. Чи?

КУМСИЯТ. БекІ бухгалтер! Нухсар!

АМИР. Ну чина дигІяникиша!

КУМСИЯТ. Сен?!

АМИР. ГІягІнили саби.

КУМСИЯТ. Ита хъули ветухъен!

АМИР. Ма иш, касану, дигІянбара. Илизи чемабиахъид. ГъайрикІен селра бетІеурсиван! Иргъулрив? Ну агарсилизи халбара. *(БиштІаси авмузан секІал бедили, хъули ветуцІур)*

(Нухсар айцІур)

НУХСАР. Бахъ цаІябли леб, асухІебирусив чирагъ алкес?

КУМСИЯТ. Ишира нуни чехІебиуси агара.

НУХСАР. Сен саррив? АнцІхІебулкъулив?

КУМСИЯТ. Сен анцІбулкъуси? НукІун мехІур сарра. МехІуртас анцІхІебулкъан.

НУХСАР. ХІу дугІли гъимрукІулри. Ну хІу гъимрукІахъес вакІибси ахІенра... Урши чархІевхъуну.

КУМСИЯТ. Урши дила ихтиярлизив ахІен! ХІушани гІяхІил балулрая ил чинав саял.

НУХСАР. Ну вацІли вакІибсира или гъимрукІили риадли, хІу хатІариркулри. *(Кисаларад дурасили арц гъадурцу).*

КУМСИЯТ. Се дирутив илди наб? ГІягІнили ахІен! Ураса.

НУХСАР. ХІуникІун балулри, нушани хІу рархъІералтни. Каса, урузмакІудну!

КУМСИЯТ. Тиладибирулра хІези, ну ратаба! Иргъулрив? Наб хІела арц дигули ахІенра, я...

НУХСАР. Гъу! Се я?.. бура гъатІи?.. Сен лехІкахъилри?.. Бура я хІу хІейгулри или. ХІези нуни ца секІал буришав? ХІези ибси бирадли, хІед ункъли бирар. Ну вирхули ахІенра итгъуна Кумсият илцадра рарсригъниличи. ХІукІун хІелукъуси риради!.. я уммайли, я дигайли... Гъа? ХІя-хІя-хІя-хІя... *(ДукелцІи, къицІдарили, тІашиу. Гъамирар. МуцІурла бехІ буцили сунечи ласрирхъяхъу)*

ХІу гьатІира жагариублири, Кумсият. ЧІянкІли илди палтарли хІела кегІебси кабиз бетихъахъули саби. (*Алавчар хІеризурли, икафличчи гъамирар. БухІна арџла пачка кабирхъу*). Гъу, гІяхІси, хІед цундеш дигули гІергъи, цунни руэн. ЧІянкІли хъуммартид! ЦІаличил масхурти дати. Гъанна гъундури вайти сари. ХІела урши биалли шофер...

КУМСИЯТ. Се?! Урши!? Илис се бетаурли?

НУХСАР. Селра... селра бетаурси агарану, уркІмарулхъуд. Ну ца ити вакІибсира... Аргъирив, дуравхъи сай ит, мегълукан.

КУМСИЯТ. Чи?

НУХСАР. Амир, викІулра. Ил иша гъаввакІес асубирар. Нуни далас илизи дурести. Ил паргъатхІейрар, дила пикрили. Урехи балахъалли, бура прокурорличи аркъяс или. Аргъирив? Илини барес вируси агара. УрухкІес мер агара. Итди делоби Асавли гІекІили сари. Нушаб гІягІиниси гъанна цадалгес саби. ЧІумали каризи... ЧІумали. ХІедкІун паргъатти гІямру дигулри... Гъундури биалли гъанна вайти сари нушала дубуртазирти. Гъу, ну чарулхъас. Баркалла. Хъуммартид.

(*Ил аркъян. Амир дураулхъан*).

АМИР. Биха, нуни хІези гібси.

КУМСИЯТ. (*ХІевала бягІуси дулгъалабад дурасили, луга*). Се сабив ил?

АМИР. Селра... (*пикришкІули*). Гъанна лехІахъи набчи. Ил хІечи гІурра гъавикІур, сенахІенну, илди хІу лехІкайхъниличи бирхули саби. МяхІкамдеш хІедарадли, гъарбарес хІейэси бетарар. ДугІли ахІенри илини вайти гъундурачила бурибси. Набчила хъарбаалли, бура, вакІиб или... аргъирив? Бура хІушани ибсиван барая или.

(*Унзала гъалав тІашилзан, гІяхІцадхІи хІерикІули кали, дураулхъан*).



Проза

Ибрагъим
ИБРАГЪИМОВ



ЦІАЛИЗИБ ВА ХІИЛИЗИБ

(Хъарахъуд)

ХІямзатли жаваб чарбирули ахІенри: илала хІер сунези расунси ХІялиматла гъаргдухъунти, лугІянти дулай някъбачиб сабри.

Рурси шакрикиб. Илмадан урузриубли, ХІямзатла някъра батаили, мякъла гугрииб.

– ХІу урухриубсигъуна сарри?

– ХІейгибизур... ГІур илгъуна мабирид, ХІямзат.

– ХІебирис, эгер Буйрала бяхІлизи гІур дуки хІеракІадли.

– ХІу масхурта угъулри, дила уркіи биалли баргудули бара калун.

– Селра хІебирар, Дибга гІяяла издаг. ХІугъуна рурси багъандан, чидил-дигара лусенничи айцІира...

ХІялиматлис буреси кахІелун, гъузгъалдириъни чехІедаахъес багъандан, ил удиб, гъвгъав шурми-ургаб, даим цагъуна аги каибси хІеркІличи хІерризур...

* * *

ТпабигІятла гъарил лишанра адамтала гІямрура секъяйда дархдасунти сарил? Анхъчини гІебшни назикси цІедешла мархІя убалта, шинни балха, янилизиб бугІярдешли гужхІебарахъес багъандан цІукли алавбиру. Хебла цаибти бурхІназир илини кІинчІби салхІахъу, гІур уруз-урузли гъалар-гъаларти кІари гъардикІахъу. КІиэсил дус цагІяхІил батбулхъан, мякъи ванзализи мурхъдиркур. Халакабиур. Сирилизивси дурхІяли бачІниван, гъаваличи къялуби гъадалта. ХІябэсил дуслу атхІеблизиб биалли мярхІялизибад биштІаси галга бетарар. Ца бархІи савли ил дяхІила пуслигъунти вавнани вахбиршу. ИлхІели ил бикІусиван билзан: «ХІеръая набчи, секъяйда къугъали батбухъирал. Нуван къугъаси жан дунъяличиб гІур лебси ахІен. Гъанна ну хІядурлира дунъяла бутІа касес, илаб дила ну-бегІси гІямзи биахъес. ХІядурлира адамлис къуллукъбарес. Бахабая гІурра ряхІматли, шалабикІахъая наб берхІира. Наб хІушала биэс дигулрану, къабулбарабая, эй, адамти?»

Илди бурхІназир ХІялиматра цІедешла ил жагъси галгаличи мешули сарри. Чарх-бекІ жайраннаван кунклири, хІулби цІала къялтуба иртутиван, рурхІули

сарри, уркіи заблис гІергъи зурхІябван пархбухъири. Ил ца мерличир камси заманалисра паргъатли руэс рирули ахІенри: нешличил, зилан рурсбачил, узи-уршиличил тІашхІеризурли льякъирикІес хІядурлири.

Хачабани-декІар чехІебаэс рирару рурсилизиб акІубси барсдеш? Тамаша ахІену, гьалар гІянручІ сунени гужли чериргъахъуси ва тилади-бусравтачил дуки рурхъуси, гІергъити бурхІназир, сари чераргъайчи, азбарлизирад гІежа-къяйра дуракаили, ургубализи аррашулри. ЧаррухъунхІелира, ухъала пьякърикес къалабали ахІенри, зилан рурсбачи шадир аррашулри, дай дуги баайчи чархІерулхъулри.

«Аман аллагъ, се бетаурси рурсилис, гІяхІдешлисалра биаб ил барсдеш, – рикІулри Хачаба сунези сари. – Илала дуру-дирутачи хІеррикІухІели, дила рурси рарсрарили, наб урхІла кили ахІенара или гъанбиркули саби. Рулгас, се бетаурлира дила ХІялиматличил? Дигай-секІал дихъили хІериалли? Чичи? Нушала Дибга гІяялизив дигай дихъеси гІулухъа чейули ахІенра. Нартгъунти саберхурти кІел-хІябал урши, гІяя чедибяхъялра, баргес хІейрар. Ца аллагъ, багъес дигахъира дила рурсила тІабигІятлизиб акІубси барсдешличила. Чуйна ил гъайрарес алавракІирал, ца се-биалра масхарара бурили, «вай, дила неш, хІу цакъли ригахъури къалли» или, хъябруцрикили, байра дарили, селра-декІар уркіи гъаргІебариб. Биалра, ХІялиматла дяхІличиб разидешла берхІи пархбикІули чебиухІели, набра гІяхІил саби, уркіира паргъатли саби...»

БерхІи гІелабикибхІейс, ХІялимат гІежа-къяй азбарлизи хъурадарес бажардирикиб. Терхъа лацличи лагбатур, чеббатурли дилигай къярдаличи чебяхІкахъиб. Азбарлизир неш чехІераили, ил хъули арацІес къалабахІерикиб. Шимла халаси хъитІаличи кариили, пикрирухъун: «Талхъа урши ишбархІира дакІухІевхъун. ГІяяркъянадеш дархъдатурли ургар. Нуни итхІели гІуркъбяхъни багъандан хІейалли? Хала хІеркІличи увяхІихъуси гъунчи хІеррикІули, хІулбира дамсур. Абдал рурси хІериасли? Илис ну чи сарра? ВацІализир къарширикибси, гІежа-къяйла гягІрикІуси цІуръа рурси. Къугъати гъай дурес илис жагати рурсби чула Гъазагабра баари бургар. Вай аллагъ, иличила пикрихІерикІус рикІулихъар, рирулрав гъари? Сеналра уркіиличирад чераркъули ахІен ХІямзатли дурибти. Илала саркъибси хІерра, хІулби чекайхъасли, гъалабилзули саби. Се бетарули набчил? Сен иличи хІерлира ну? Сен наб дигулра гІурра талхъа урши чеэс, иличил гъайрухъес? Гъаникалли, уркіи далайбикІес бехІбирхъули саби...»

Ва, ХІялиматли, шаkra хІерикили, гІяш-гІяшли далай бехІбихъиб:

**ВацІа-хІяри дархили,
Къапланна гъуни дурцан,
Гъанна чехІейулира
Рарили ну верхІдарман.**

**Тялурбала арсланван
Хапли дураикили,
БецІли цІуб мукъараван
Уркіи барх арбухири.**

**Дай закибад берхІиван
Ванали пишяхъили,**

**АтхІеб диркъул дяхІиван
Ветахъири вацІили.**

**ХІу вакІибси дякъличир
ХІулби сари гІяярли,
ХІебалас, рирусалра
Чардарес ав агарли.**

**Дугилис гІергъи бархІи
ХІебуар хІебакІили,
ХІебалас, гІур чум бархІи
Аркъутил хІечи хІерли.**

– Уркѝ маберѝ! Се сари хѝуни дучѝути?! – къакъла гѝелабад чехибси нешла тѝамали Хѝялимаг уркѝаиб.

Ил хѝитѝаличирад харчригур.

– Вай, неш, се саби хѝуни бируси? Ну ребѝахъес дигулрив?

Хачабани, гъинчѝрилзули, рурси кѝапѝруѝиб.

– Дила хѝебла чатѝа, хѝу ребѝили дила гѝямал бирару? Уркѝрухъунрив? Черрерхи.

– Неш, гѝур илгъуна мабирид.

– Хѝебирис, хѝебирис, паргъатрии... Ну къакъаракѝилри, рурси дукирад рамсурли раѝили сари, рикѝули. Хѝу биалли далуйтази ахъили раланри?

– Дила далуйти бегѝ гъалар иргъули хѝериши, неш.

– Илгъуна гъачамалра хѝебелчѝунри, дила булбул чатѝа.

– Сен илгъуна рикѝулри?

– Гъалаб агарси, дигайла, жагъдешла...

– Дила неш, хѝуни пикридирути?

– Пикрихѝедарес леру хѝела хѝябѝубти?

– Уркѝиличи даѝибти гѝядатла хѝябѝубти сари.

– Вари, марикѝуд, нура илцад хѝедалан ахѝенра, нунира далути сари гѝяшикъунала тѝимир-химир. Хѝуни белчѝунси далай карѝайла ѝѝали алкунтала саби. Эѝ, дила рурси, хѝура гѝяшикъ-мага риубли хѝериши?

Хѝялимаг урузриубли нешличирад ѝиила тѝядириѝиб.

– Урузмаѝуд, дила рурси, нуни иргъулра, – иб гѝурра Хачабани. – Гѝяшикъриънира дигай дихънира ѝѝахдеш ахѝен. Чѝянѝили гъала-гъала пикрибара, хѝела някъбази бикеси сабил ил арслан, иличи ургъур чехъес рирудал, хѝерирудал.

– Неш, хѝябилра хѝергъести гъай лер хѝела.

– Аргъа гъатѝи! Хѝу багъандан ахѝенрав?

– Дила арслантира ургъуртира агара.

– Ну къалли агара хѝерикѝус... Дила рурси, наб хѝу духули пикрирухъи дигахъира. Абас рат, бахъ-бахъла хѝялани хъилизир дяхъибти сари. Хѝед илгъуна биубли хѝейгахъира. Галгаличи хѝеръили барда кайсуси саби.

– Паргъатрии, неш, нунира бареси балас.

– Набра дигуси ил саби, дила къакъба...

Азбарлизи унраличирси Хѝялимагта зилан рурси Гъидаят араѝиб. Ил гъярѝа, амма дикъурти чарх-бекѝла регѝ чехъери сарри. Хѝялимагличир дусманира халаси риъни багъеслири. Дяхѝла къугъати лишанти халаси къянкъли ѝиила урѝѝаѝадирутиван сарри.

Зизи Хачабази нешла шайзирад саламтира дурили, ил Хѝялимагличи дугъаризур:

– Хъумартурли хѝериши? Кумсиятхъалачи шадир дукъес вягѝа ахѝенрив?

– Сабри, сабри, – ил нешличи хѝерригур.

«Неш, набра ила рукъес дигулрану, рархъаба. Уркѝиагармарираба. Гъаман шадир рашули хѝеришагу?...» – аргъиб нешли рурсила хѝерра ва дубхѝехъиб.

– Гъидаят, камсиван сабурбара, палтар дарсдирисну, – Хѝялимаг кѝибиб дерхѝличибси тавханализи черяхѝяхъиб.

– Къанси бархѝехъ рурсбас шадиб-гъундури гѝяхѝти хѝедирар, – разиагардеш балахъули, иб Хачабани.

– Зизи, нуша жявли чардулхъехе, хьаллариубла нуша Кумсиятличи шадир дякьи ахенра. Жириклули сари...

– Хьаллабиубти чула мерличиб балтути бирар: илдала чула сагати гямру лерти сари.

– Балулра, зизи Хачаба.

– Эй, рурси, ЩурмигЯ махьи гьамли ахен кьалли? ХИушала хабуртани дай дуги биахьу... ХИялимат жягЯлра савли жявли дуки аркъуси сари.

– Илар дахъхИи кахИевлехе, зизи.

– ХИед нешли ихтияр барибу?

– Барибси саби.

– ПеладяхИ чардухъес уруххИекИудаяв?

– Кумсият рикИи, илала мурул ПалхИятли нуша гьунирдалтара.

– Сеннира илдигъунти архИяби рурсбачи лайикъти хИедирар.

Гьидаятли гИур дубхИехьиб. Хачабани, мурчИала бушкалара касили, азбар ушкес рехИрихьиб. ИлхИелира, сари къабулли хИериъни иргъахьули, ил сунези сари тIашхИеризурли рухИнаручИулри...

ХИялиматра Гьидаятра, чула Дибга гИяличибад цагИяхИил гьарахъбикиб-хИели, цIяббирес бехИбихьиб. Гьунчир цализи ца дурути кадерхурли, зилан рурсби гИяхИцадхИи лехИкахьиб: итира илдала саби- бегИти пикрумира лерри. Хабурта ругъусира имцIаливан ХИялимат сарри. Гьидаятла дахъал гъай хИедири, замана-замана суалти хьархИедаалри.

Гьунила дублабси гИинизличи баибхИели, ХИялимат тIашризур. Илис гьан-бикиб, неш черакИили, къябаибси сунела далай. Сенрил дигулиахьиб, зилан рурсира лехИихъахьули, даимбарес.

– Гьидаят-рузи, хИед ца далай белчИишара, рикИулра?

– БелчИен, наб хИела далуйти дигахъис. Тамашара рирулра, хИуни илди сен-сен цаладирхъутил?

– Нуни цаладирхъули хИерирус, сари-сарил уркИиличи дашар.

– Наб сен хИедашутти?

– Жан рузи, ил секIал нуни хИебалас.

ХИялиматли гИяш-гИяшли тIама дурабатур:

**Кьиргьула саркъиб хИерли
Дай уркИи дайдахьили,
ГИяяла манай улугъ
Балтулирив тIутIули?**

**Варъала хИябал гъайли
МухИли мурибарили,
Ургуба умцIул гурда
Балтулирив тIяйдили?**

**ХИебалулрив, эй, урши,
ГИянручИ шалда чебиргъни?
ЧатIнала агурбани
Ну гьаргала аррикни?**

**ХИебалулрив, дай дуги
Закиб бац тIашхИебилзни?
Ца нурла чурилизи
Нура ремхули биъни?**

**ХИейрули гИергъи вакIес
Гьарахъси архИяличи,
Дархъа, гъари, саламти
Кадатес михьирлизи.**

**Багъи, гИурра Хала хИеркI
ТIашкабизурли ахИен,
ГИурра Буйрала бяхИли
Я гъай иргъули ахИен.**

Гьидаят рархкья рурсила далайличи тамашахІериуб. Илизи ХІялимадли чумал бархІи гьалаб уркІи бурибсири. ГьатІи чизи буриса? ГІяялизиб илала гІур зилан рурсбира аги. Нешлизи асухІебири: илини хІергъи ва, мехІур хьулани дархъдати или, маймайрарес асубири.

– ХІямзат цалра бархІи гІур дакІухІевхъуну? – хьарбаиб Гьидаятли.

– Юх, нушагъунти мискин пякърти се бареса?

– ХІукІун уздентала сарри, ХІялимадли. Набзи нешли бариб, хІела дудешра Гъзагала талхъунтала къамла вирусире или.

– Вирусире урги... Ну гъанна цІуръа рурси сарра.

– Жан рузи, хІу къакъамарикІуд... ХІямзат сеннира хІечи лякъян.

– МажяхІят... ХІу набчила ругъес дигулри, Гьидаят, хІела хабурти дигІандирулрив?

– Се хабурти?

– ХІедалусила гІермадирид. ХІукІун Зелимханнис, хІела узикъарлис, ураркъибсири?

– Агъагъай, рузи, сагаси хабар хІебиалли? Иличила хІуни бегІ гьалаб багъурси саби.

– Гъамли мекъ бируси ахІену? Иличила сен хІебурулри?

– Бируси ахІен.

– Нушала Дибга гІяялизиб лебтанилра балули саби: гІебшни, бикІар, Зелимханна хьулри дам-дяд думжар.

– Вай, ишди халкъла лезмуни!

– ХІебиалли, илкъяйда ахІену?

– АхІен, жан рузи, нуни узикъарлизи ца дус хІерли уахъес бурибси саби...

– Ца гІяхІдеш, Зелимхан хІела узикъар виъни: ил хІечи лехІихъур, хІед хІейгуси хІебиру...

Гьидаятлис сунечила ихтилат хІейгусигъуна сарри. Узикъарлис хьаллариэс илала пикрумазиб лебсира ахІенри: нешли гуж-гужли къабулрикахъибсири.

«Гьидаят, дила рурси, – бурибсири илини, – гІямрулизир вегІлис дигути мурталра хІедирар. Зелимханнис шери хІерукъядли, гІур чис аркъяда? Чи лева хІу багъандан нушала унза-ганзи лукахъуси? Нушала къапІагъуна гІяялизиб гІулухъабире бахъал лебли хІебиэс: ца някъла тІулбачиб бейгІес вирар. Камси биалра, вегІла лебдеш вегІла някъбазиб гІяхІси бирар. Зелимханхъала верхІел бархала хьу леб, маза-мас лер, гІяргІя-дагъа лер. Уздентала къам хІебиалра, вайтІа хІербирули ахІен. Нушара илдала къамла сарра, ахъли гІяхІдикІес хІедирехІе. Илбагъандан, дила рурси, хІечил гІямру деркІес пикрибарибси Зелимханнис баркалла рикІули, паргъаткарии...»

– Гъай аман, рузи, Зелимхан дила узикъар хІейубли, урхІ виубси виалри, – къан-къанни иб Гьидаятли.

– ХІед ил хІейгахъулрив гьатІи?

– Узикъарлици се дигай дирути? Дарх гІямру деркІни ахІенси..

– Сай?

– Сайра набчи карцІли убкІусигъуна ахІен: базцадхІи нушачи шадив вакІили ахІен.

– КъакъамарикІуд, Гьидаят, илкІун нушала миналичив ахІен. Нуни бакъира, диркъалици напакъа баргес арякъи сай или. АхІену гьатІи?

– Сай... Ну гъанриркули риасри, базла баз ила виаркахІейри.

– Хиу децмариклуд, Гьидаят, лявкъян хлечи Зелимхан. Гур хлушала гьар секлал гьунчидиркур... Хиуша талихчерли хлердирудая...

Сунела рархкязи или риклулихьар, Хиялиматла уркиличир цархилти сарри: «Дила укИи-хИял Гьидаятлагъунти ахлен. Хейгусилис, гЯмру керхайчи цунни каласлири, шери хИякыра. Узбикьурас шери башнира, хИятта ил гЯдат дусмадли бузахъули биалра, нуни аргъес рирули ахленра. Илгъуна гьамси адамличил диги-хЛери сен-сен дарес вирусИ? Ца ухъалаб гьанкИра ихъули, илдани дуркИути гЯмрура мяштИдарести ахлен. Гъай дарман, бекИлил ахлен! Наб хЛейгахъира, къадармабаиб, я сегъунтилма мас-хазналис ил секлал барес къабулхЛериркира... Хиямзатра, талхъа урши хЛейубли, рягИят хъубзарала виубси виалри. ИтхИели музаухъун виалра, белики, тИабигИятлизив хамси ва чехусанси виэс? Белики, ил ца гЯдатлисван къаршиикибси виэс? Къугъати гъайра дурили, хИясратли хИулбира хЛердарили, ну пьакырла уркира арбухили, сунела Гъазага пяхъикиб виэс. Ну илис цайналра гьаналра рикирал, ца аллагъли багъаб. Дила абдал бекИ, наб къалли ил ит бархИиличивад мурталра мякълав левхИеливан сай. Ца дуги ил муэрлизивра чеира. Хала хЛеркИла итатИбси авраглизив, валчагъра бекИла уди кабахъили, ускаи варгира. Вай, хИабилра къугъасира кайзур къалли! ЯхИбарес хЛериубли, ляжиличибси хИяналичи тИулби гьамдарира, малхИямли хИяршбарира. Ил чеваргъиб, хапикили дила някъ буциб ва иличи гьар-гИегъили чуйнарил байдариб. Гур хИулби черхЛейсули набчи вякъизур. Ну илини се бурул хЛерлири, бетхИеур: гьанкИлизирад чераргъира. Хиямзатли муэрлизиб гъяжбарибси балуй някъ хЛербарира, иличир уммайтала хЛерзи даргес дигухИеливан. ХИятта сунтИра рикунра, илала Тем някъличибад чебихухИеливан... МехИур пишни хИедиалли? Неш риклуливан, нура духучан ахленра...»

* * *

Хиямзатлис илди бурхИназир ихталатуни, шадибгъундури, гЯярти тИашаэс чебуркъуб. Дудешли ца бархИи ил сунечи живариб ва иб:

– Урши, замана баили саби хИед дугИла пишни тИашаэс. Хиу талхъа урши сайри, хИебиалли, хИедра дила къуллукъуни дагъес, талхъандешла арзу-хИял къабулдарес гЯгИнибиркур. Ну ухънакаилра, ишбархИи левра, жягИял наб се бетарарал, ца Аллагълишун бала. ХИядурии нушала къуллукъчи НухИкъадичил, хИела юлдаш Жапарла дудешличил, архИяличи дуравхъес.

– Ну хИядурлира, дила талхъан. Асубирару багъес, сегъуна архИя набчи хЛерлил? – селра-деклар хЛергъули, жаваб чарбатур Хиямзатли.

– Хиушаб нушала мулкличирти лерилра махъурби-гИяябази даэс, илабти уздентала лебдеш чебаэс ва ахтардибарес чебиркур. ГЯгИнибиркур ванзурби, ризкъила сабухъуни, мицИрагла къадар, гъайла къантИа, лебдешла лайикъси сияхИ барес. Илди баянтаци уцуми РяхИимхан хЛерли сай. Илини вархъибси чяпарлизи дурусти баянти диахъути сари, гур биалли бекИ талхъайс кабизахъурси напакъа Баршамайлизи биахъуси саби...

ХИябал бархИила бухИнаб, урчиличи мурдали, Хиямзатра къуллукъчи НухИкъадара Гъазагала талхъандешлизи кадурхути лерилра махъурбази ва гИяябази баиб, гЯгИнити баянти дучиб ва сияхИлизи делкИун.

«Гъу, гьанна акъуухъира, гЯярличи-секлал дуравхъасли ахЛенси, – пикриухъун Хиямзат. – ВацИала издаг ХИялимат рахли чераишагу? Гьар ил гьанрикибхИели, уркилизиб берхИи алкунхИеливан, пикрумИ шаладирули

сари. Мискин-пякьир риалра, ил гЯдатла рурси ахIен: я ил гьанбикуназирад ретихъули ахIен, илини дурибти гъай, биштIаси занкъарайла тIамаван, набзир тикрардикIули лерал. Дигулра наб ил гIурра чераэс, гIурра илизи гъайкавхъес. ХIялимаг раргесра чераэсра вируси ца мер саби – Хала хIеркI. Буйрала бяхI. Нагагъладан сунела гIежа-къяйличил дуки рашес даимриубли риалли...»

Иш гъакIлис ХIямзатли урчи балкъаахъур: «Сен биалра, нукIун талхъа урши сайра, мурталра хъура-хъурали ургубакад гезкайкIес хIейрус...»

Юх, бетхIур илис дуравхъес: къапула гъалар неш дакIурухъун.

– ХIямзат, дила урши, хIед чиналра дуравхъес бетхIерар...

– Сен или рикIулри, неш, талхъа хъарбаркъуни тамандарибти сари.

– Нушачи бакIибти гIяхIли чехIебаили, дураулхъулрив?

– Чи гIяхIли?

– Баршамайлизибад бакIибти нушала адамти. ХIела адавзи ХангIяхIмадла кулпет. ПатIимаханум, илала рурси, хIела рузикъар Айнабика. Тухумдеш, дила урши, гъарахъдикахъес асухIебирар. ХIед Айнабика гьанхIериркулив гъари?

– Илди лебилра балути саби, неш. Айнабикара гьанриркур, хIятта хIябэсил дус чехIераили виасра

– Илисрагу ну рикIусира...

– ХIу рикIуси бирис, неш.

– Жан урши, ца чераадри хIуни Айнабика, сегъуна чехъери ретаурлил.

Илгъуна истак рурси гуржи талхъара хIерургар. Бати урчира, гъаввакIи дудешла кIалгIялизи. Илди ила хъуракабиубли леб, илди хIечи хIерли саби...

Илгъуна хабарлис гIергъи ХIямзатлис, дигаллира хIейгаллира, ургубализи дуравхъес лайикъли хIебири.

Марлира, неш хатIарикили ахIенри: Айнабика чераибмад, ХIямзатлис вирхаэсра гъамадли ахIенри. Муртрил никIа белхаагар рузикъар гъанна хIули черасес хIейэси исбагъи ретаурлири. Диркъала берхIили дубсила гавгъар чертIибти дяхI, цаличил ца дархдикибти миршгъунти нудби, галгаличиб бара салхIунси ваваличи мешути кIунтIби... БекIличир дарайла шиниша къапIара, илала чебкад баткаили, архIяла цIуба кIанара сарри. Хъябличирад михъирличи ца мурхъила, ца дурхъаси магъила кIел баки жибжирдухъири. Къукъубала хъарличи биуси бухъяна хIевали рурси гъатIира ахъсиван ва халакараибсиван чериахъулри. Айнабикала ца някълизиб парчали някъишбарибси биштIаси тавра лебри. Акъуси итил някъличир дурхъаси кулехара цацун тIулекара лямцIдулхъулри.

Нешла узи ХангIяхIмадла хъунул ПатIимаханун гIядатласун ралкъаурлири, илала къугъати лишантира, дяхI дархъдатурли, жявилл чинарил гъарахъдикибтигъунти сарри.

ХIямзатли гъамиубли Айнабикала ва илала нешла някъби цIацIадариб, кам-гъамти яхши-хушра дариб.

– Издагай-рузи, хIела ХIямзат хIилхIи вагъурра: сегъуна нарт ветаурлил? – иб ПатIимаханумли, лехIдеш къябиули.

– Жан аллагъ, гIямру аркъули къадин, дила ПатIимаханум, – жаваб чарбариб Издагайли. – Нуша духънакадиулра, дурхIни жагъбирули саби. ХIела Айнабика, сари аллагъли рат, чис хабарри илгъуна исбагъи ретагънила?

– Ге, гIямру тIашаэс хIейрар...

– НахIа Дербент къала бархъбатурра рикIуду, ПатIимаханум?

– Чина гIямала, хIела узила амру набра дурхIнасра хIукму саби. Барша-

майлизи бегІтачи чардухъунра. Сунела бунагъ-хатІа урдуц, хІела дудешла юртлизи хъуракадиубра.

– Ил бегІла гІяхІси саби, дила рузи. Гъар гІяхІлад рякъунхІели, пкъир неш сарицун чериули, уркІи цІали игусиван бирар. Бикаханумра калунси риалри, иличил цундеш дуртІахъес... Се биру, ЧевяхІсини баахъибси къадарлис амин дикІни ахІенси, нушани гІур се барес дирутира? ХангІяхІмадалра варх кибси риадри?

– ХІела даргла узичил, дила Издагай, илгъуна ихтилатра бетаур. Се рикІи-ша, къабулхІейкиб: дудешла тІутІила унхъри, сай агархІели, лайкадакІили калири, илди ца мадарла куцличи душес арха-кархили, гъазализив сай.

– Баркалла биаб сунес: дудешла рухІ разидирар.

– Нура или рикІулра, ХангІяхІмадли дудешла васиятра таманбариб къалли?

– Дила гІязиз узи, сунечи аллагъ разивъ! ХІебиалли, чІягъирчила хІяракат бархъбатурли валан?

– Бархъбатур. Дербент къалализибти хужаимтас, сабиркуси хІекъра сасили, чягъирла чармуни урдатур. Сецад пайда бирулихъар, ил бунагъла хІяракат сабри. Нура разикариубра, уркІи паргъатли саби.

– ХІялалдиаб сунес, хІябилра духуси барили сай...

ИхтилатбикІути ПатІимаханумра Издагайрацун ахІенри. Тахличи цаличи ца гъамли кабиили, ХІямзатра Айнабикара чуласун лякъир бемжахъес бажардибикилри.

– ХІямзат, хІед гъанбиркулив бегІ гІергъи хІу нушачи шадив вакІибхІели бетаурси?

– ХІябал дус гъалар детаурти лерил гъанхІедиркур.

– Нуни биалли хъумургули ахІенра. Нушала азбарлизибси бухъна Къаплан хІечи чебухъунсири... ХІела шалбар гъярбердибсири...

– Амма ХІямзат хІед нуни гІяхІдеш барира: бетаурси чизилра хІебагъахъурра, шалбарра бирбубра.

– Айнабика, дила хабурти гъандиркахъулри... ХІечил бетаурси бекІлил гъанбушес хІейгулрив?

Айнабикани дукелцІи тІашаиб.

– Ил се хабара?

– ХІу татауызир куртІряхІниличила.

– Жан аллагъ, хІу вайти пишнар виради, узикъар... Татауизи хІуни къужрарили карикибси ахІенрив?

– Сарри, хІу наб дирглума ругъухІели, «ляжибутІ, ляжибутІ» или черхІериркухІели. Ил масхара сабри...

– Масхара бегІ лебри: татауызир гІяндриркули бара калунра.

– ХІерикири къалли. НуникІун рерцахъири.

– Рерцахъира, аммаки дила бегІла дигуси начи хІеберцахъири. Ил татауызибси хІеркІли арбухибсири... ХІябилра хІу урцІаси виради итхІели: чуйна гІелабад чури битІакІири, чуйна карикахъира...

– Гъу, Айнабика, гъаннара набчирад черхІерерхурли лералрив?

ДубхІехъили, рузикъарли хІулби гІяшдуциб: ил ХІямзатла пишначирад черрехнила лишанцун ахІенри. Ил рикІусигъуна сарри: «Се леба черхІерерхес? ИтхІели, хІу мякълав левхІели, набра гІяхІил сабри. ГъаннакІун - хаслира. Сегъуна гІулухъа ветатурлирил? Гъанна цалис ца «узикъар-рузикъар» хІедикІахІелра, гІямал буэсгу. Дубуртази гІяхІлад ракІниличира пашманхІе-

риубра. ХІядурлира сецадхІи-дигара хІушачир гІяхІладли калес. Дигахъира хІечил уркІигъаргли гъайрухъес. Дила дурестира лер, гъанбиркули саби, хІелара дургар. Нушала дурутира декІарти дирар. Юх, хъяшнала ахІи, хала-кадаибтала, гІямруличи цархІилван хІердикІутала... Иргъулрив, ХІямзат?»

«Иш рузикъарличил ихтилатикІули виаслира, уркІи къалли Хала хІеркІла итабси гІяялизиб саби, – сунеласун пикрумазиври ХІямзатра. – Гъанна ХІяли-мат сунела гІежа-къяйличил дукир рургар? Ца жунабла галгалиу геркарухъи, далуйтара ручІули, сунези сари хабуртара ругъули. Ил Айнабикагъуна ахІен. ДяхІ-някълизирра рузикъарван жагаси ахІен, илини чесадуцибти палтарра имцІаливан уршбалайчи мешути сари. Аммаки, ил чераибхІели, иличил гъайикІухІели, наб гІяхІил сабри, дигесли сабри. Дила уркІира, сунела унза абхъили, илизи жибикІусигъуна сабри: «Эй, букІун рурси! Эй, вацІала издаг! АрацІигу хІу набзи. Дигулра хІу мурталра дила рухІнар риубли. Дугелира, хІерелира, хъулирра, дурарра, хІятта гъарил гъигълизирра... Айнабикала хІеранира иргъулра. Юх, илди рузикъарлагъунти, гъамси тухумлагъунти ахІен. ЦархІил мягІнала ва цархІил къасла сари. Юх, гІяхІдеш хІебирар: Айнабика наб ахІерси рузикъарлицун ризс рирар...»

Издагайра ПатІимаханумра, дурхІначибад тядидили, льякърбикІес даим-биублири.

– Издагай, хІу лергІер дубурлан ретаурлири. Баршамайлизи ракІадлира, чаррухъес къалабали рируд.

– Ил бархъси саби: пукъа чина белшаллира, бикІар, арцайра илди улгу-мина сунела дирути сари.

– Амирбег талхъан ветаурхІели рииши, рузи, хІу илкъяйда пикрирухъунси?

– Аллагъличира, ахІенри. Цуриша махъилизир сархІелил, ишди мер-муса дила детаур. Рирхаи, ПатІимаханум, наб гІямрулизиб лебгІеб гъарбизурси саби: набчи уркІи изуси, ну дигахъуси мурул къадариуб, халаси игъбар биуб. Лебдешличи мурткІал карцІриубси ахІенра. Мас-хазна дигули риасри, хІунира балуливан, дила дудеш Сапарбегра, сай аллагъли алжанализи кат, яшавла вегІ вири. Чевверхаб набчивад, илискІун ну дубуртази рархъес дигуси ахІенри?

– Набра гъандиркули сари итди бурхІни. Чум-чумра баршамайлан гІулухъа лебри хІези арам-карамбикІути.

– Лебригу, сепайда, илди чехІебаира, илдала хІедакъира. Амирбег гъанни къагъли сарри...

– ХІябилра вархили лев хІела талхъанра?

– Рирхаи, ПатІимаханум, ца бархІилра кІялгІялизив хІевъар, махъурби-гІяя-бази вашес, рягІят адамтачил къаршииркес дигули сай. Ну рикІулра: «Ягъари, дила Амирбег, гъанна хІу гІядатла узден ахІенри къалли? ХІу Гъазагала шила ва верхІел махъила талхъан сайри. ХІянчи дарести баари къуллукъчибира леб. Талхъа халгІятра чесабуцили, уцуми РяхІимханван, тахличи кайили сен хІевъусири?» ИлхІели, дила рузи, ил вачаирхъули сай: «ХІябилра гІяхІил биши, талхъан хІейубли, ну дила Цуриша махъилизив калунси виаслири...» Нуни иргъулра, вай, цІакъли иргъулра дила Амирбегла уркІи- хІял...

– ХІебиалли, Издагай рузи, Амирбегли сунела талхъандеш дахъхІагарли ХІямзатлис аманатдиру?

– Диру, гъайгъай, ЧевяхІси Аллагъ сейкІулил... Бахъли бурасли, нушала ХІямзатра талхъандешличи карцІсигъуна ахІен.

– Селра хІебирар, пикриулхъан... ИлкІун гъачамлис левгІев жагъли сай?

– ВиштІалира ахІен: хьунул риалли, мурул сай, – хапли Издагайли ПатІимаханумла някъ шалкІубад буциб. Ца шайчиряхІ ритІакІахъили, тІама гІяшбирули, иб: – Нушаб пикридухъес замана баили ахІенара? ХІеръа итди хІум-гъумкабикІути дурхІначи?

Ахирра ПатІимаханумлис аргъес бикиб сари гъанна бикайчи сабурагарли хІерти дугъби. Дурхъати дугъби! Илгъуна хьулличил ахІенрив гъатІи, рурсира рарх кили, гъарахъти дубуртази раибсира?

– Дила Айнабикара нахІа чехъери ретаурли сари. Ил секІалра пикрихІе-бираси, эгер нушачи сукни башути бахъбаили хІебиалри...

– Марли, рурси ураркъахъес бажардирикилрив, ПатІимаханум? – уркІрухъи хъарбаиб Издагайли.

– АхІен гъари! БакІибти гІяхІли гІелабяхІ бархъира... Сен биалра, дила рузи, набра мякъи мурхъти, къама ахъти дигулла... ГІур бурасли, дила Айнабикачи уркІи изуси адамра илала мякълав виубли дигахъира.

– Дила ХІямзат сегъуна калзули?

– Илдигъунти багъадурти, дила рузи, азиртазибад ца-цали бирар булцІути.

– ХІебиалли, ил хІуни Айнабикас лайикъли чейули раланри?

– Нуни чехІеэс рирусу, илкІун талхъа урши сай. ХІела урши сай, дила ахІерси Издагай. Сунечи уркІи изеси узикъарра сай. ХІябилра гІяхІил бииши...

– Нунира ил секІал гъалабал пикрибарибсири. ХІушачи раэсра, гъайка-рухъесра къас лебсири...

– Гъаннара къанни ахІен. Илкъяйда барадлири, Издагай, набра гъамадли бири. ХІу пикрирухъен, хІела узи ХангІяхІмад хъалибаргла бекІ сай. Илис дигахъу сай халаварили... Наб гъанбиркули саби, нушаб гъатІира гъуни гъаргли бири, эгер хІечил варх хІела мурулла – хІела талхъанра - нушачи гІяхІлад вакІалри...

– Лявкъян, нуни Амирбегличил ихтилатбирис.

– Баркалла, чІянкІли ца масъала гъатІи лагбирхъули къадин... Илини ну цацахІели къакъарикІахъулла, дила рузи.

– ХІу селичила рикІулри, ПатІимаханум?

– Се ахІенну, Издагай, нуша къалли ца мухІлиларад гъайдикІулра, цадехІ хІулба хІердикІулра, нушала дурхІнала аги сен-сен биэсара? Дила АйнабикалакІун цархІил пикри лебси ахІен. ХІямзатла?

– КъакъамарикІуд, ПатІимаханум, дила уршилара гъачамлис уркІилизи арацІибси чехъери лерси ахІен. ИлкІун дила хІулбала гъалав сай?

– Вай аллагъ, биалри илкъяйда...

– Бирар бирар. ХІеръа хІуни илдачи, – Издагайли узила хьунул, тахличи кабиили, дукІлаур лагъниван хІум-къумбикІути дурхІначи ласратур. – Илдани хІу рикІуси масъала арзибсиван билзули саби. Яра хІу гъачамлис васвасрикІулрив?

– Нуни се буриша...

– Илди нуни, дила ПатІимаханум, гъанна гъатІира цаличи ца гъамбирахъис. Итира или, Издагай уршилизи жирухъун:

– Эй, ХІямзат! Тахличи виаркайили уулрив?

ХІямзат харчизур.

– Неш, хІела хъарбаркъ таманбарес хІядурлира.

– ХІядурли вегІ леври? Рузикъарра чекаруцили, хъулив уулрив гъари?

– Аркъуси мер лебли хІебиэс, неш?

– Леб, дила ахIер. Рука Айнабикара, укьен ургубализи. Чедаахъа нушаб ахIерси хайдакълан исбагъизи нушала улгу-мина. ДурабкIун хIушази ду-цIрумла берхIира жибикули саби.

Нешла гъайли ХIямзат разивариб: илис итира хъулиб анцIбукъес бехI-бирхъулри.

– Нуша дукъеси мер хIуни гIебхIебуриду, неш?

– Вай, хIябилра хъяшала гIердарес дигахъид хIед. ХIу чина гIяяр вашулри? Рука Айнабика Хала хIеркIличи раайчи. Ихтияр хIезиб саби. ЧIянкIли ру-зикъарлис анцIмабулкъахъид...

– Аргъира, неш.

Ца урчи бабгисси биштIаси пургъум Целда бехIличи гIашбизурхIели, гIабигIят кIайбизурси, мицIир жан биалли дяхIцIилиу пяхъдиркуси манзил сабри. Савли чула дучIанти макъамтира делчIи, арцантира лехIкахъилри. Гъачамличиб гъачам цIакъбикIуси буцIардешли вацIа-къадара мукIурдакIахъ-ибтиван сарри: чузир жан гIашдизуртвиван, кIари сурдухъири, хамти галгубала къялубира дархли уди хIердикIулри. ЧIянкIли Целда бехIличибад хъатлабван чебиуси Хала хIеркI буцIардешлизибад урухъиубсигъуна ахIенри, гъалабван адам хIяйранвириси вихла макъамра вяшбарили, къадакад дуцIлири.

Ил буцIарси бархIи дяхIцIилиу дигIянкIерикибси букIун ХIялимаг сар-ри. Буйрала бяхIла чедибси ахъси музаличи кариили, къиргъулаван бугаси хIерличил илини хапли Целда бехIличи дурабикисси пургъумра, иличибад кабацIибти кIел жагъилра хIисаблизид кайсулри...

* * *

– Гъидаят, жан рузи, гъар секIал дукъдуун, цIали дигуб, хIеркIли духиб... – савлила дягIван къалабали дурарикисси ХIялимагтли рархкъя уркIаиб. Саламалра хIегили, унабурхI ахъибмад, ХIялимагтли иличи гъайла рамч бяхIчиаибсигъуна сабри.

– Се сари цIали дигубти, дукъдуунти, хIеркIли духибти? – илини, паргъ-атриули, ХIялимаг кIапруциб.

– Ил хIевахъус ракили сари илдаци... Ил къикъимай ракили сари... Нуни чераира... КIелра чебаира...

– Чи сари ракибси? Сен хIу илцад рачарархиссири, ХIялимаг?

– Айнабика! Илала рузикъар! Жан асаб сунела!

– Чи сари Айнабика? Нушачиб илгъуна ура лебси ахIен.

– РикIулрагу, ХIямзатла рузикъар. Илди Баршамай бикIуси Хайдакъла шилизид хIербирути саби.

– Нуни ил секIал бегI гъалаб иргъулра. Баршамайлан рурси ХIямзатла рузикъар севан ретаурси?

ХIялимаг, циила ряхIятриубли, паргъатли гъайрухъун:

– ХIура хIедалуси лерри? ХIямзатла неш Издагай ралусив? Гъазагала талхъа хъунул?

– Ралуси сари.

– Ил ИздагайкIун баршамайлан сари.

– Аргъибси ахIен.

– Нуни аргъибси саби. Нуни илдала лерил лутIи-къама далути сари... ХIера, ил Издагайла узила рурси сари Айнабика, ХIямзатла рузикъар. Ца чераадри хIуни? Дурхъати халгIятунани бегIбарисси кIуркIур. Ил илдаци

гЯхЛад раКили сари. ХЯмзатличил, сунела узикЪарличил, гингишуни дехИдихьили сари...

– ХЯбилра гЪар секИайчи риуси лерри, ХЯлимат? ХЮни илди сен-сен дагЪурри?

– Нуни ХЯмзатра Айнабикара, гъанна тяп ил хЮван, чебаира. Урчила пургЪумличиб даг Целда бехИличи бакИиб... Абзур бархИи барх къунзбикЮли, лагъниван къумкабикЮли, калун. ХЮ рирххИеруд, рузи, наб хИейгибизур, някъ хИяртбарили, паргЪатли руэс хИериубра, дархЪадатурли гЕжнира, дигИянни илди лебихИи рякъунра. Удикариира...

– Жан аллагъ, хЮни дирути...

– Гур се бариша, цахли биалра, илгъуна бетаур...

– Илди шакбикалри... Илдани чераадри...

– ШакхИебирки, чехИериира... Чула хабуртазиб, чула хИяланазиб илдас чилалра авара аги. Ну илдачи илцадра гЪамриубра, хИятта кам-гЪамси ихтилатра аргЪира.

– Ихтилат къалли хИед дигеси хИебурги?

– ГЪайгЪай, аХенри... ГЪайрикЮси имцИаливан ил Айнабика бикЮси къикъимай сарри. ХЯмзат илини дурутачи хЪяшаван лехИихЪулри, хЮлбала дураиркули, рузикЪарличи карцИиубсигъуна кайзур... ХИерхИейкIес-декIар вирибу ил? Ца хЮни чераадри, гЪари, ил хИевахЪус! ПачяхИла рурсиван хамли сарри...

– КЪалабамарикЮд, ХЯлимат, сен биалра, Айнабика ХЯмзатла рузикЪар сари. Илди–ургарти бархбасунира тухумдешлацун диэс асубирар.

– Юх, тухумти илкЪайда гЪайхИебикIар. Балулрив се рикИибал Айнабика? «ХЯмзат, хЮ нуни чуйнал муэрлизив чеири...», «Дила уркИи хИечи баэс жибухъун...», «ХИечи хИеррикIес, хИечил гЪайрикIес набра дигула...», «ВакИи, гЪари, хЮра гЯхЛад...», «Гурра гъандиркахЪехИе нушала дурхИядеш...», «ХИейгахЪира, дила узикЪар, урхИла хЮлбани хЮ ясируцили...» ГЪу, чис дуроти илди гЪай? Асубири Айнабикала гИявадакибти гЪай пикрихИедаресра, эгер ХЯмзат, дугели бацличи цунси бецIван, иличи аЪкъяхъили хИейалри. Айнабикани гЪарил бурибсиличи ил ванали пиширхЪулри. Ца Аллагъ, хЯбилра гЪархИебилзуси лерра...

– ХЮ уркИиагармарируд, ХЯлимат. Илаб бетаурси агара: анцIбукъ хИед хЮни халакабирулри.

– Вай, дила рузи, сенал наб гИядабли саби.

ГЪидаятли ил, някъ буцили, чИябарличибси гИянайчи карилахЪиб. Анкъилабси цIара балбарили, сарира илала мякъла карииб. ГЪидаятла бегИти хЪулиб аги, гИянручИличил чула хИянчиличи ургубализи дурабухЪири...

– Жан, ХЯлимат, ишбархИи хЮ сен хЪулир калунсири? Дуки-гЪуни?

– Неш рархЪира... ГИямрулизиб бегИ гЪалаб нешлизи, хЪябшлира или, къяна бурес чебикиб.

– Селра хИебирар, рузи, цацахИели илкЪайдара бирар. КъакъамарикЮд, нуни хИед кумекбирис.

– Кумек? Сегъуна кумек?

– ХИела вас-ваъала мартил, аХенал багЪес рирус.

– Секъайда?

– РархЪаначи ГЪазагала шилизи аркъяс.

– ХЯмзатличи? ТалхЪа кIалгИялизи?

– ТалхЪа кIалгИя наб хИяжатли аХен. Илдала унраличир дила нешла рузи

Сабият-адай хІерриуси сари. Илала уршира лев, вецІал дус виубси дила узикъар. ХІямзат живарахъес рирус...

– Дила дудеш викІуливан, къуйрукъ хІебагъурли, бекІ багъес хІейрар...

ХІялимат гІянайчирад ахъриуб, гІур, Гъидаятличи хІеррилзули, иб:

– Нура хІечил рарх раКІасли?

– Абдулта маругъуд! Къагъриублирив? Гъазагала шилизи? ХІямзат чеэс?

– Черрерхи, Гъидаят, ну цацахІели хІехараван ретарултра... Гъари, ну хъули аркъяс, – иб ХІялиматли, дурарухъес ралрилзули.

– Рукъен, рукъен, ну хІечи ляркъяс...

Ил бархІи ХІялиматлис, бикІуливан, беЦилизи бикибси мукъарлисван сабри. Илала паргъатдеш таманни буири: хъули пяхърикили, рархкъя раКІайчи хІерли руэс ахъри чинабри? Замана-замана гъаргала дурарулхъулри: яра Буйрала бяхІла удир гІежа-къяйличил гІяйкариубси нешличи хІеррилзулри, яра дуЦІ гІашаибсиван дай закиб кІайбяхІибси берхІиличи, хІулби изесдяхІяйчи, вякъкаризурлири, яра, ласряхъили, Дибга гІяялизи лябкъуси уркурла гъунчи аъкарирхъулри.

«Халкъласун динди бемхесалра балуси риасри, – рикІулри ил. – УрхІла рурсбани диркъу–далуту нуни далули ахІенра. Далуту дуки-гъуни сари. ЦацахІели нешличи гъмира дулхъули сари: ил мах чебигъунси, зилан рурсбиван, нура хъули кахІературси, дурхІядешла жагаси дунъяличирад гъарахъарибси. НабКІун ишдигъунти гІямру дигули ахІенра. Сен иличила нешли хІебалусил, я багъес хІейгусил? Жан аллагъ, хІябилра игъбарагар акІахъубли лерра?..»

ХІялиматлис сари риштІахІели хала нешли бурибси гъанбикиб: «ВеГІла мурад бетерхахъес дигусини, ЧевяхІселизи тиладибарили, балга бучІуси саби. Балга хІебалусини даршал «Къулгъу», «АлхІям», «КъульгаГІузу» дучІути сари ва илди нушала дурхъаси МяхІяммад–идбаглис гъадиггет дирути сари...» Ил гъанбикли ХІялимат гІурра гъаргала раахъиб, буркъа къичура убушили, шайчирикиб ва урКІиличир «Къулгъу-алхІямта» ручІес рехІрихъиб. Сепайда, лерил делчІес ралкъХІеурли лерай, гъанкІ чебакІиб, ва рускаун.

– Буслус, набчи хІерли-декІар руили ахІенри? – гъаргала черяхІяхъибси Гъидаятли ил чераргъахъиб.

ХІялиматли, харчризурли, къаркъала гажиннизирад шинра чертІули, дяхІ дирциб. Рархкъя рурсиличи хІерризур.

– Черрехи, Гъидаят. Гъу, се бурида?

– Се буриша? – циила хумарси кабизра бирули, иб рархкъяни. – Дила хІед кІел хабар лер: ца гІяхІси, ца вайси. Чидил гъалаб аргъес дигулрив?

– Вайси башахъен: набчи бакІибси, бикІуливан, урхІиличи хІякъян.

– Урухмарируд, илцад вайси агарану.

– НахІа дунъяличир гІяхІги хабуртира кали хІедургар...

– Жан ХІялимат, архІя гъархІебизур: ХІямзат я кІалгІялизив я Гъазагала шилизив аги, ил чеэс хІебикиб.

– ГІяхІси се леба?

– Се ахІенну, ХІямзатла рузикъар Айнабикара илала нешра чула Баршамайлизи чарбухъи саби...

– Сен илцад жявли?

– Ил секІал, рузи, нунира балули ахІенра.

– Ил хабарлизиб се гІяхІдеш лебли?

– ГІяжаибси лерри? Се гІяхІдеш бирара, гъанна хІела ХІямзатла мякълар хІу рикІуси рузикъар-къикъимай агара. Иличила ахІенрив хІу къақаракибси?

– «ХІела ХІямзат» марикІуд гъари? ХІунира се-дигара бурулри: ил дила мурт ветаурси?

– Ветаахъа гъатѠи! Гъуни гъаргли саби, хѠед диргаларухъеси Айнабика илала мякълар агара.

– Баркалла, рузи, ну багъандан хѠу инжитриубри...

– Инжитриъни селра ахѠен: набра дигулра, ХѠялимат, хѠела мурад бетурли.

– Нуни селра бареси чебиули ахѠенра, дила набчи гъимира дулхъули сари. ХѠяагарти пишни ахѠену нуни дирути?

– Юх, наб илкъяйда гъанхѠебикиб. Пикрирухъен... ХѠу нугъуна ахѠенри: гъайра далад, баресира балад.

– Вай, Аллагъ, нуни далути се лера? – декѠли гъигърухъун ХѠялимат.

– Гъу, дила рузи, гъанна ну хъули аркъяс. БегѠти чарбухъайчи набчи хъардарибти хѠянчи тамандарес гъягѠнили саби. ГъяхѠли кален!

– Баркалла, – иб гѠурра ХѠялиматли, рархкъя гъунирралтули.

Хямкдарили къапура, Гъидаят аррякъун. Селра белгибарес я пикрибарес ралкъхѠеурли ХѠялимат гъаргалар тѠашли лерай, къапули гѠурра назикси жикъла тѠама каиб. Гъала–гъала багълати гунзри, гѠур тѠама чехиб:

– Лерраяв, эйхъали?!

Ганзухъличирад ХѠямзатла дяхѠ гъардакѠибхѠели, ХѠялимат уркѠрухъи карикули бара хѠилхѠи калун. «Гъуя, аллагъ!» или тѠамара дурабушили, лерси мерличи гугрииб.

– Асубирару, ХѠялимат? – саламла мерличиб хъарбаиб ХѠямзатли, гъаргала чевяхѠихъули.

– ХѠу? Нушачи? Се-къяй-да? – маъ-маърухъун рурси.

– Ну сайра, урухмарируд. НукѠун хабарлизибси дурхѠни къяриуси аждагъа ахѠенра?

– Асубирар, амма...

– КъакъамарикѠуд, ну вахъхѠи хѠевъус, ита-иша хѠерилзули, сайра тѠягѠямагарси агилизив виъни иргъули, ХѠямзат камсиван кѠайизур. ГѠур, мякълаб хѠябкъяшан ута чебаили, кайиб.

– Лебил ургуба чедибяхъира, Буйрала бяхѠлизи ваира, вацѠала издаг раргес хѠейрули, инжитиубра... ХѠу биалли, нешра буцѠар цѠали руцѠахъули, тяхѠуси хъули пяхърикили руилри.

ХѠялимат, хапли дурайкибси талхъа уршиличи хѠерхѠерикѠули риалра, бараван ряхѠяткариублири. УркѠи къалли, михъири баргаэс дигусиван, къалабали тѠимхъбикѠули биалра, хѠелили сабри: «Жан аллагъ, ил иша лявкъян или чис гъанбиркусири? Марлира, ХѠязатличила урези-урехи нешли хѠедаркъибси сай бикѠни бархъси буили саби. Ургуба умцѠурли сай, Буйрала бяхѠлизи ваили сай. Ну раргес, чераэс дигули... Шукру биаб Къудратла вегѠлизи? ХѠебиалли, илини гѠежначил дуки рякъунси дила нешра чераили сай. Илар ну хѠераргили, хъулирра ну цацун риъни балули, иша дурайкили сай. Рулгас, нешличил гъайкавхъунара? Рахли илизи набчила ца гъайра дурабикахъили виалли, неш шакриркур, гъай-мезли дила бекѠ жургъбулхъахъа... Гъуя, дила гѠямал мадуъ, нуни се бируси гъанна? Ну се рикѠусира гъанна ил талхъа уршилизи? Сеннира итхѠеливан, вацѠала сиртличирван иличил гъамадли гъайкарухъес хѠерирус...»

– Эй, издаг! Эй, ХѠялимат, хѠуни ну цѠударли чейулав? Ну вакѠниличичи гъимрукѠилрив?

– АхѠенра, – иб гѠяш–гѠяшли ХѠялиматли, амма, сецад дигулихъар, ХѠямзатла дяхѠличи хѠерризес хѠериуб.

(Хъархъуд – гѠурла номерлизиб)

Хадижат ХИЯБИБОВА



ЧАРБУХЪНИ

(Хъарахъуд)

– Ягъари, Хаинутин, Иманничил хІура вархли сайлихъалли, я ца дяхъи бетхІеурли, я ца хІярхІя чехІегили калунри къалли. Се саби ишаб биубси? – хъарикІусила сегъунти сарил ташмишъала лертиванри.

– ТІямкъла тІама бакъибмад, нуни багъурра къачагъуни нушаб укабиъни. Иман гъавухъун удивяхІ, нуша аркъуси шайчивяхІ. Ну нуша дакІибси шайчивяхІ дуцІухъунра. Наб гІергъира чумал хІярхІя игъуб, амма дила игъбарлис цалра чехІегиб. Иманнис се бетаурал нунира хІебагъурра, наб се бетаурал Иманнира хІебагъур. Ну дуцІухъунра МяхІяммадличи ва къалабали хІушази багъахъурра.

ЦацабехІти шакбикІулри, Хаинутинни балу-балули Иман кавшахъниличи. ЦацабехІтани «Сен?» суал кабалтулри. ЦацабехІти бекІлил бирхулира ахІенри. Нешла узи Мажидлира Хаинутин гІевуциб, ва иличиб сегъуна-биалра такъсир лебниличи лерти ташмишъала детахъахъиб. Иманна узикъар, хозяйствализив парторгли узуси ГІябдурашид, Хаинутинничил къяркъли гъайухъун:

– ХІу къачагъуначил вершилрии. ХІейадри, хІед сегъуналра зарал хІебиубли, Иманна чархлизир 16 дяхъи хІедири?

Хаинутин хъями-цІама иркъули маркайрулри.

– Ил секІал якъинбирар дунъяла бухъяндешли. ИлхІели хІед се бетарарал чебиид, – къантІкадариб ГІябдурашидли. Хаинутинни ца гъайэс хІейуб.

ГІябдурашид Иманничив игитси сайри. Сунени бируси, ируси дяхІ-дахІли бирусир, ирусир. Узикъарла ламус хІебихІести гъай дурулри илини. Хаинутинни сунечил ГІябдурашид къяркъли гъайухъниличила Мажидлизирра буриб. Буриб къачагъ ХІясаннизира. Лебилра тухумтанира, лебилра къачагъунанира ил секІал багъур. Замана аркъулри. Хаинутин ГІябдурашидлис лявикІулри, иличил гъалмагъикес къайгъилизиври. Мажидла урши чулахъ МяхІяммадкІун ГІябдурашидла хъулилад, дугъанничибад хъаван, увицІули ахІенри. Илди гъаман барх бири. ГІябдурашид хІял гъалакси сайли хъалли, урхІлис вайтани иркъуси ахІенри.

Ца бархІи чулахъ МахІяммад ГІябдурашидличи, МТС-лизи трактор хъучи букес гІягІнили саби, ваши кумекбарес или, вакІиб. КІелра урчачиб мурдали арбьякъун. МяхІяммадли урчи ГІяхІяйчиб батур, сай тракторличи кайили хъ-

учивяхІ гъайбариб. ГІядурашид биалли, урчиличив сайри. Хъула дубличи ваибмад, ГІядурашидличи гъая лайбакІили, витІакІили, урчиличивад кайкахъиб. Кайкибсиличи Мажид четІяхІухъун. Хаинутиннира чулахъ

МяхІяммадлира къяшми къалабали дигъун. Сунес бетаурси багъес пикриухъахъесалра хІетурли, бекІлизи урцул бяхъили къагъвариб. ГІур кавшиб. Жаназа урчиличи чебихъиб. КахІебикесли гъаяли бигъун. Урчилис чумал гІярчумаг дяхъиб ва батаиб. Урчили аргъибсиван, бархъли сунела вегІла къапула гъала тІашкабизур. Савли жявли хІяйван-къача дураэс аризурси Къисхалумли кавшибси мурул чеваили, вьвдеш ахъдуциб. Мурул адамтани къаркъала урчиличибад чебкасили, ванзаличи кабихъиб. БекІлизир чумал дяхъи лерри, гІур биубси аги. Хъули арухиб. БебкІалис дирутира дарили, хІяблавариб. Ил баркъуди, гъайгъай, къачагъуначи чебушиб. ГІядурашид каршули гъарахълиб мазала дуки бакІибти кІел ятим дурхІяли чеиб. Урухбуибти дурхІни чула мазара дархъдатурли, вацІализи къадубала гІела дигІянбикиб. Я Мажидли, я Хаинутинни, я чулахъ МяхІяммадли илди хабархІебариб. ДурхІни, хъули чарбухъунхІелира руржули лебалри. Илди чули чебаибси секІал, чизилра хІебурес вьгІдалабиуб. Буресра урухлири. ГІядурашид кавшибти хІябалра бякъи илала балгІяличира тІашкабизур. Амма илдазивад цалилра имцІа гъай хІеиб.

НКВД-ни Хаинутин тІалабвариб.

– Къачагъунала ургав хІела узикъар ХІясанра леври или нушази буриб. Ил хъули вашули вьэс гІягІниси сай, гъанна бугІярбируси замана илди вацІурбазиб хІебуар. ВакІибхІели, нушази багъахъа. ЦархІил чи вакІалра, багъахъа. Хаинутинничи къачагъунала хъулрала мякъла къараулдеш барахъес хъарбариб:

– Дила узикъар ХІясан къачагъвиубли виалли, ил нуни кавшили, жаназа хІушази лугас. ВатІайс вершадеш дарибси узикъар наб гІягІнили ахІен, – Хаинутинна жаваб чІумасири.

– ХІед ил кавшили гІягІнили ахІен. ХІуни ил кавшадли, хІед цархІилти къачагъуни гІергъикабиркур. Нушани ибси бара, хІед имцІа шикъ гІягІнили ахІен, – иб гъести гІямрула военныйли.

– ГІяхІна. ГІяхІли бетаэси бирехІе, – иб Хаинутинни. БархІехъ къанни ХІясанхъайчи Хаинутин ацІиб ва илизи хъули хІешахъес буриб. Илис гІергъибикниличила багъахъур.

Школализи дурсри кадирхъес Россияла гъарахъси мерличирад сагаси учительница ракІиб. Илини урус мезла дурсри кадирхъулри. Вера шилизи ракІибмад, Хаинутинни сунечи аррукиб. Илис ца хъали декІарбариб. Хаинутин сунела хъуна дудешла хъулразив сайри хІериуси. ГІяшурала цархІил я узи я рузи аги. Неш-дудеш бебкІили ятимриубси рурси сарри. Илала бегІтала гІяхІси юрт, юрт-алав мер-муса лерри. Вера шилизи ракІибхІели, Хаинутинна 3 дурхІя лебри. Верани илдас кумекбирулри. ГІяшурасра кумекрикІи. Хаинутиннис Вера гІяхІризур ва иличи вашес кайиб. ГІяшура гъала-гъала шакхІерикиб. ГІур шакрикиб, амма чула ургала вайхІебиахъуб. КІелра хъунул цабалги хІербирулри. ГІяшурани илдала ургарти хІедалусила дирулри. Илини балулри хІябал биштІатира сарира сегъуна даражаличи биркурал, эгер сунени тІама-гъама ахъдуцалли. Хаинутинни Вера карийниличила хабар дигІяни шилизи гІяйкабиуб. Чуйнара гъамтигъунти тухумтани ГІяшурази хъарбаиб. ГІяшурани нуни балуси агара или къантІкадири. Верала сегъуна сабрил аппарат лебсири. Илра бухили ахъси мерличичи рякъи, чилилра хІергъути секІал дурулри. Хаинутинни ил секІал бусягІят хабарбариб. Верани буриб, нушала гІяскуртани гъаладяхІ гунзри кацІили сари или. Милицияла хІянчизарти шимази башули, къачагъунала хъулрала мякълаб укабирутири.

Унзализи кьутІбикІули, абхъахъили унза, хъулри ахтардидирулри. Къачагъуни биалли къяпІурбазибад дура арбашули, илдази биркули ахІенри. Ца къачагъла хъалира ахтардибарил чарбулхъухІели, сунела хІяжатдешлис уди челгъути палтарличил дуракавхъунси Мухлис МяхІяммад милиционергани, къачагъ ургар бикІули, игъубли кавшиб. Мухлис МяхІяммад дургъбазивад чарарибсири изала башули. ИлхІели къачагъуни милиционерти чарбулхъуси гъуйчи укабиили саби. ГІявшила шилизиб къачагъуни хІебаргил чарбулхъути милицияла хІянчизартас гъунила кІелра шайчирад къачагъунани ца чекъур. Бахъалти цагъакІли кабушили, калунти гъаббухъун. Къачагъунира Хайдакъла мер-мусаличиб тІашхІебизурли, Табасарантлизидурабикиб. Табасарантла милиционертира сахъли укабиили буили саби. Илдани игъубли кІел къачагъ кабушиб, ца биалли вяхъиб. Кабушибти ца – ерсилан Къзанпа, ца ирчІаман Халикъ буили саби. Къзанпа МустІапала гІяхІси гъалмагъ ва дебали серхурси, урехиагарси къачагъ сайри. Кабушибти гъалмагъуни вегІ-веГІла шимази арбухиб. Ерсиллизиди вяхъи къачагъ МустІапани Къзанпала нешлизи хъя барили сай, Къзанпа кавшибси милиционерла бекІ кабухес.

– Ил нуни гІяхІил хІясибварра. Нуша чесадаайчи мугълатагарли гъаббухъун. Пергъидухъунра. Сепайда? Виркур ил дила някъбази. Виркахъис! Илала бекІ чеббяхъили, хІела гъала кахІебихъасли, ну гъабза ахІенра, – иб МустІапани, рисуси Къзанпала нешла гъала тІашкайзурли.

Темирбулат сунела гъалмагъуначил ВарситІла шилизи Халикъла бегІгачи гъаввакІиб. Милиционерти, гъайгъай, кавшибси къачагъла хъулрала алавчарли жумягІличибра имцІали укабиили калун. Ил секІал къачагъуназира багъахъурлири. Диханти гІяхІил бузулри. Темирбулатли Халикъла гІелабтази багъахъур ламус хІебихІниличила.

Сунени сунечи хъарбарибси хъарбаркъ таманбарес халаси къиян чебаиб МустІапани.

Милиционерти башуси гъуни илини балулри. КІелра шайчир билгълуми лерри, ургаб, гамиван барил ветахъиркуси мер сабри. Галгубара къадубара алавбарибси шинна кІавлизиди ухІнаухъи, МустІапа, вайла чеди адикахъили цІукра, хІябал бархІи укайили кали сай. Ахирра дакІувиуб баягъи ит сунела гъалмагълис игъубси милиционер. Иличил ца гъатІи милиционер леври. МустІапани вархси милиционер бусягІят игъубли кавшили, ахъли тІамадарили сай:

– ХІу алавуцилри. КацІи урчиличивад, наб някъ-някъли вяхІили, хІела цацкъ ахтардибарес дигулра. Ярагъ ца шайчи лайдакІа. Милиционерли тапанча чІяхІбариб ва тІама дарибси мерличиди кІийна игъуб.

ГъалабяхІ урчи дуцІбаресухъун, кІел къачагъ автоматуначил гъала тІашбизур. Милиционерли урчи гІелабяхІ ласбариб, илабра къачагъуни тІашлири.

– ДуГІла авара дати, кацІи урчиличивад. ХІед игъес нушаб къулайли саби.

Милиционерла кахІецІес гІямал аги, ил гъар шайчивад алавуцилри.

– ХІу набчивад удихІейкадли, кахІевшили вархъиури. Удиикадли, хІела бекІ чеббирхъуси саби. КІелра бяхІили, милиционер кункли кайкахъили, МустІапани къукъуби михъирличиди чедуциб.

Милиционерли бекІ ласбарибхІели, гъунила итил шайчи хІулби хІердизур. Лебилра гъуни къачагъуна буцилри. Илдицад къачагъуни бургар или илис гъанра бикибси ахІенри. Илала хІулби тІашдизур чула шан ГъуршутІличи. Илкъяйда бекІ чеббяхъили бухибсири МустІапани Къзанпала нешла гъала. Неш уркірухъун. Сари неш ва хъунул адам риънили биши, илала уркіи ца гІяжаибли гъажбууб. Дарг далли ласдухъунтиван диуб. ХІулбала гъалаб цІябдеш дакІудиб, ва някъла ишараличил душма бекІ сунела гъалабад

убасахъиб. Илабад чарбухъи, къачагъунала къукъя ЧибяхИнила шилизибяхИ батбихъиб. Къачагъуни тамашали милиционертас гъанагарси мерличиб дакIубири. ЧибяхИнила шилизирси парторг Разият гъарритIес гIягIнисири. Разиятли уввелили ца къачагъ милиционертази кавшахъилри. Разият рупес къачагъуни шилизи чуйнаалра бакIилри. Хъулир рургули ахIенри. Шантани дигIянриурли. Амма ил лерси мер балахъутира лебри. Мягъямала ХъатIимала хъулир лер или багъахъурли, къачагъунани ХъатIимала хъали алавбуциб. Унзализи къутIдяхъиб.

ХатIимани Разиятлис дигIянрикеси мер буриб, сари унзализи гъамриуб ва ахъли иб:

– Разият! Нуни балулра хIу риъни. Гъалар хIу ракIахъили хъалли, гъанна ракIахъес хIерирус. Къачагъуна багъурли саби. Илдани нура хIералтара. Дила жан наб ахIерли сари. Набчи хIу гIур мякъяд, ракIили хъалли, нуни унза ибхъхIебхъис.

Къачагъуни цаличи ца хIербизур ва илабад арбъкъун. ЦархIил ташмиш-бикIуси унзализи къутIбикIескабииб.

– Дила хъулир агара, – иб бухIнабад, къутIбикIути чи сабил багъурли.

– Абхъа унза, хIябъчи лебай! – вявла ахъси тIамали хъа регIличи ружери бакIахъиб. Унза абхъиб. Лебил хъали убил-чебариб. Гъарилра гIямзи умцIур, амма Разият хIераргиб. Ца гъатIи хъалира умцIурли, шаладикили, къачагъуни пяхIли бетахъиб. УмцIери чуйнаалра барибсири, амма Разият рупес бирули ахIенри.

Разият сунела хъулирра дигIянрикурли. Чумал къачагъли лебилра илала хъали убил-чебарили ахтардибариб. Раргес хIебиуб, дуракабухъун. Илди арбукъес балбизурхIели, Разият зармела рухIнарад дурарухъун, бурхличи байрахъван тIашкаризурли тIамадариб:

– Урухтусани! Ну ишар сарра, ватIа хаинти! Ламус-хIяя детахъибти, хIя-жарти! Халкълис балагъла, къачагъуни! ХIуша игитунни диубти диадалри, ишар хъунул адамтачил дургъбази кахIедяхIили, хIушагъунти мурул адамтачил дургъиарая! Ишар цIакъти детаурлирав? ЦIакътира гIяхIгъубзнира дергъла майдайчиб саби! Ил секIал гъарилли балуси саби.

Илала тIама бакъибти шанти уркIбухъун. Улкъайлабад, унзала гIелабад, дура къаршибикибти луцрала гIелабад дигIяй хIербикIулри. Бухънаби гъимичил Разиятлис бургъулри. Бурги сур-сурдирули, баресил буресил хIебалули тIашлири. Къачагъуначи чебухъес идала цIакъ аги.

ИлхIели хъали урчала мурдаба алавбариб. Чумал къачагъ бурхличи аба-цIиб.

Разият къачагъуни сунечи гъамбиубхIели, гъархIерухъун. ТIашкаризур ва гъатIира ахъси тIамадариб:

– Набчи къячмадиркудая! Наб дигулра хIушани ну ишар карушили. Игъая! Сен тIашлирая? Карушабая!

АбацIибти авал къачагълизибад ца иличивяхI ватихъиб.

– Набчи къячмадиркудая! Ну рашес риурла!

Разият кункли ганзухъ лебси мерличиряхI дуцIрухъун. Къачагъли гъатIира кункли илала рай буциб ва ганзухъличивад увяхIахъиб. Ванзализи карихъиб. Разият сари руцибси къачагълис хункIа рирхъулри, рургъулри илала нешлис, илгъуна хIяяагар хIяжар варкънилис, рургъулри рузис.

– ГъаларяхI ратрихъи! МухIли баткаес устадеш дуили сари. ХIед гIягIниа-гартани хIериркъули, цархIилти хъунул адамтани дирути хъали-цIала хIянчира дирули карибси риадлири. Ратрихъи гъаларяхI!

Къачагъли ил гIурра къужрариб.

– Парторг сари, гъатѝ иш! Парторг! Сецадхѝи кавланал хѝушала партия, чебиид!

Илра или, ца къачагъла урчила гъала каратурли, аррукили арбякъун. Гъай-гъай мерла адамтани органтази багъахъур. Ца бара гъалаб къачагъуна биѝѝибси ши, гъанна милицияла хѝянчизартани биѝѝиб. Къачагъуни чинад бакѝибал, чина арбякъунал бахъхѝи хъарбиѝи. Халкъ урухлири. Се-биалра бурес бирули ахѝенри. Бахъалти чехѝебаира бикѝулри. Ахирра Разиятла тухумтани лерилра чедаибти, далути дуриб. Илди Разиятличи гѝясилри. Амма Разиятли балулри сари къачагъуна хѝералтни.

Качагъунани ил гъарахъли ваѝлала дайлабси хъули рукили каратур. Разият гъала-гъала чѝумали каризур. Урехиагарли илдас рургъулри. Чуйнара гъаррухъес къасра бариб, амма илис къарауйчив гъаман ца къачагъ валтулри. Разиятличи хъарбирули буили саби беркала бирахъес ва палтар-къяш умули дихѝяхъес. Гъала-гъала селра хѝебирули кали сари. Гѝур гашили мутѝигѝрарили рииши, гъар илдани ибси бирескарииб. Качагъунани хѝянчи хѝебарили къаѝлугули буили ахѝен. Ил дигѝянрируси пукъни гъаман дарсдирулри. Ца сунес къараулкайибси къачагъличил Разият гъайрухъун:

– Ну карушес карукибси, сен кахѝерушили ралтусира хѝушани?

– Хѝу карушес чилалра пикри агара, – иб къачагъли. – Нуни хѝебалас, гѝур сегъуна буйрухъ лябкъянал.

– Хѝушабра буйрухъуни дирутив? Наб гъанбикиб хѝуша дугѝдерхур вай-нукъяби, сегъуналра буйрухъличи хѝерти хѝедургудая или, я хѝушаб чизибадра урехи агара или. Ну бурхличи араѝѝили вьвдарибси – хѝушази карушахъес сарри.

– Хѝу карушахъес буйрухъ биалри, итхѝели каруршусири. Хѝу чис-саррил миѝѝирли гѝягѝинили рургуд.

– Чи сая, гъатѝи, хѝушаб буйрухъикѝуси? – Разиятлис тамашабизурси илдас буйрухъикѝуси левни, ва ил чи саял вагъес иштѝахѝудухъун.

– Ну виштѝаси адам сайра. Нуни чи саял нушаб буйрухъикѝуси валуси ахѝен. Нура буйрухълиувсира. Набзи ибси ахѝи, нунира барес хѝейрус.

– Нуни хѝушаб урухтусани хѝязлис ибси ахѝенри. Хѝерая ца. Чила-биалра хѝушара арилиурти дуилрая, – дукарванругили иб Разиятли.

– Дила мерлав цархѝил виалри, илди гъай хѝези хѝедурахъи. Наб хѝу дебали гѝяхѝрилзулри. Хѝу чераибмад, дила уркѝи хѝечи кабизур. Эгер ишди къабул-бикалли, нуни хѝу кариэс дигулра. Набзи дурили хъалли илдигъунти гъай, цархѝилтази мадурид, – иб къачагъли ва дебали мякъла гъамиуб.

– Тилади саби, – иб Разиятли, сунечи гъамхѝейахъес някъ гъалабуѝили. – Ну хѝед магъар дихъахъес къабулриркус. Магъар агарли, дила мякъла гъаммайруд.

– Вари, вари, урухмакѝуд. Нушаб къадагъа лебси саби, хѝечи къячхѝедикахъес. Хѝусен къалабали шуряхъиб, ца халаси къаркъаличи, Разиятлис къакъ гѝелали кайиб. Разиятлизирти руржни ва урехи детахъиб. Гъар замана, дугелира хѝерелира, чи-биалра челхъан сунечи или рирусири. Гѝур се гѝягѝинили ратурсира ну? Чи саяра ну гѝеррурцуси? Дила гъалавла мурул Къасум хѝейалли? Илѝун колхозла бухгалтер сай. Бухгалтер сайли хъалли, илини районна хѝякимтас балли буйрухъикѝес бали. Илра нуван къачагъуначи къаршиси сайри. Нуни бакъира илала узи Мяхѝяммадра къачагъиубли сай или. Амма ишди къачагъунала ургав цайналра чехѝеира. Мяхѝяммад къачагъиубли виалли, Къасумлара бархбас бургар ишдачил. Юх, илѝун хѝяким сай. Хѝебургар сегъуналра бархбас, – пикририкѝулри Разият.

Сунес сегъуналра зарал хѝебарили, чѝянѝли беркалара бирахъули, умудешра бирахъули ралтниличи тамашариублири. Разиятли балули сарри

цацабехІ хІякимти къачагъуначилра гьалмагъбикили, милицияла хІянчизартачилра гьалмагъбикили, гІимслизиб милякъван, хІербирули биъни. Тяп илкъяйда уили сай сари декІаркарикибси Къасумра. Саби цахІнаб хІербирухІели, илдала хъулир гъар замана гъай дирутири. Цаличил цали дахъал далули, цалис ца мутІигІхІебикІули кабизур хІякимти буили сабри. Цали ибси итилли уббирхъули, дусцадхІи хІербиуб. Жалани камдирули ахІенри. Илдала гъарилла хІякимдеш ахълири. Цалилра иргъули ахІенри хІякимдеш хъалицІализир дирути хІедиъни. ДекІарбикиб. ДекІарбикибхІели аргъиб саби цалис ца дигни. Къасумли Разият чаррариб. Камсиван гІяхІли калун, гІурра жалтира гъайра дехІкадихъиб. КІел базцадхІи кали, гІурра декІарбикиб. ДекІарбикила дусцад дикилри.

ХІера, Разият къачагъунала ургар хІеррирескарииб. Дугели чули дирути далтути дурухІели, Разиятли лерилра дикъулри. ИмцІали илди саби-ургаб татар мезли гъайбикІулри. Илди мез Разиятлира гІяхІил далулри ва илдани дурутаци лехІихъулри. ХІусенна гъайра дакъиб:

– Наб иш хъунул адам дебали гІяхІрилзули сари. Пурбан биалли, магъар дихъахъес дигула.

– ХІу хІела дагъриличив сайрив? Ил урхІла магъарла хъунул сари. Ихтияр лебси ахІен илис цархІиллис магъар дихъахъес, – буршуси тІама сай Къасумлайчи мешулири. МяхІяммад ургар или, уркІиличи бакІиб Разиятла. Къачагъуни къанни дугели бакІилри. Илини илди чебаили ахІенри.

– ХІу, ХІусен, гІяйкайэс пикри бургар. Даг багъахъургу Советунала гІярмияли Сталинград азадбатахъурли саби или. Нушаб гъанна гъар мерличир гъунби гІеркІу. ДахъхІи нушара хІерхІейрехІе, – гІяшси тІама хъунул адамлайчи мешулири.

– ХІу, Чарак, бекІли уркІиагарвиубли уилри. Илди къянала хабурти сари, нуша урухдарес дурути. Чамсурварала къачагъуна хІябал бархІи гъалаб бахъал милицияла хІянчизарти кабушили саби. Илди нушани лебилра агарбарес дирехІе.

– Диур хІушаб хабуртази ахъес. ЖягІял жявли адилзутира, – вявбариб гъайбикІути цархІилли. Камси лехІдеш кали, хурла тІамали хъа бухІнала бицІахъиб. Разият рахъхІи русаэс хІерирули калун. Илала бекІлизи, Советунала гІярмия гъалабахІи башули саби, ибси калун ва разириуб, сарира азрадралтара или. Къанни русаи хъалли, илди къачагъунала ургав МяхІяммад левал багъес, жявли аризур. Къачагъунира жявли абизур. Марлира, илдала ургав МяхІяммадра леври. МяхІяммад вагъурмад, иличи дуцІрухъи, хъябруцрикиб.

– Гъуя, хІура ишав левли, ну ишдази руцахъирив?! – тІама ахъли дурабикиб Разиятла.

– ХІуни нушала гьалмагъ милицияла хІянчизартази уввелили, кавшахъири. ГІяйиб хІечиб саби. Илгъуна такъсир хІезибад кабикили хъалли, хІу кахІе-рушахъири нушани. ХІела мерличив цархІил виалри, бусягІят каршусири.

– ХІукІун нушачил варх комсомоллизи керхурсири. Нуша комсомоллизи кадерхес хъурали аркъухІели сарригу хІела узира нура цаличи ца гІяшикъдиубти, – Разиятли чула комсомолла гІямру гъандикахъиб.

– МехІурхІели сарри нуша комсомоллизи кадерхурти. ИтхІели нушани иргъуси аги, – иб МяхІяммадли.

(Хъарахъуд бирар)

Поэзия

ХІябиб КЪУРБАНОВ



АБА ГЪАНРИРКАХЪУ

Замунти дакІиб дургар
Сецад-дигара вайти!
Аммаки дакІхедакІиб
Дахъ гъаннаван удахІти!

Дарманбарилигу халкъ
Агрума, налогуна!
Пакъирла пишяхънира
Саб висусилагъуна!

ГІяхІхедиралра гІямру
Ца гъакІли, ца гъачамли,
Се гІяхІси чебиулив
Даим мискин адамли?!

КъутІкъути балагъ-къадар!
Ихъути къиян-жапа!..
ГІурра чуйна уршбази
Гъанрикахъесал аба?!

Дявтазив алххІелхунси
УбкІулигу гашазив!
ГІурра се чедиахъул
Тамандарес нушази?!

ДебкІахъили, кам архъес
Азир гІямал вяшдиру!
Бардеш акІахъес или
Дячи, букІри ласдиру!

ДерцІес дарман уркІбази
ДуцІарти цІа адилкъа!
Ца бяхІличиб хІебуар
Хъям-къацІла хІярам улка!

Нуша жявли дубкІули
ДахъхІи калахъес бургар
Пенсияла дусмала
ИмцІабируси къадар?!

Аман, дахъхІи калесра
Къиянни бирар нушаб!
Ил имцІабирусира
ИмцІали хІи держес саб!

Гъари, цахІнаб улкалис
Се биублив, се камлив?!
Сен мискинтирав нуша,
Саркъи ишцад сакІубли?!

Селра камси агара!
Гъар секІал лер дари!
Гъарли-марли агарти
Мардеш, хІялалдеш сари!

Чум Жаллад пучбиуба?!
Чумли ламарт бариба?!
БетхІеили чятлизи
ИлхІун гъарилла гІярба!

ХІялалдеш хІедарибну,
ХІярамбиаб чус хІябра!
Тяп нушаб чулагъунти
Чедуркъаб чус лар-къябра!..

ХІялалдеш диру или
ХъуликІнира дугІла саб!
Кебасалли ахІенси,
Селра хІелуга нушаб!

Ил секІайс бикъридешлис
Кайсис дила пенсия:
Илра чус чеббяхъибгу –
Чинара инсап-хІяя?!

Къаклабад къацІла кесек
Къяббарнигъунагу ил!
ХІебалас, «ил хІеберки,
Саби бебкІаб» викІусил?!

ЦахалрахІебилзули,
«Арц агара» бикІаргу!
Саби «арц лер» бикІуси
Замана мурт биубси?!

ХІерагу, арц ардухес
Вай кризис бакІили!
Вачурта биркъулив ил
«Дунья исис» бикІули?!

АрхІебухиб ца кепек!
Кризис – сабаб саби!
ХІяким-хъулкначиб верхІна
Кризис гъалаб саби!

«Вор в законе» бикІути
Нушалацун саб лебти!
БилгІнила устадешли
Законный бетаурти!

ВилгІяхъесра ихтияр
Бедибси буилигу!
Или биубли гІергъи
Хъулкначиб гІяйиб лебу?!

Арбуха цахІнаб хазна!
Ца-кІилис пайра бара!

ХІед ил ихтияр гибси
Законра бай-байбара!

Нуша дисулра: «вегІебш
Арц чина ардашуги?!»
Ардашни камли саби!
Арцурли сари илди!

Арцурли сари дура!
Къяшмала къел хІедатес!
Банканази – ванати
Пукънази дигІяндарес!

Минимумла дурарад
Халкълис арц кали ахІен!
Минимумлара аба
РубкІар жягІял-царахІел!

Максимум адикахъес
ХІякимтас хІябдехІ арц лер!
Чебааллира биур
Мискин адамли доллар!

Алшараблицун бужар
Кайсанти максимумти!
Даили, имцІати сар
Мискиннис макъсуманти!..

Илдигъунти аги-хІяй
Диги я дигай далтав?!
Варсирулигу адам
ВерхІна бархІила ухІнав!..

ХІуша къаркъаларая,
Дила абдал дубурти!
КІантІихІедикІудая,
Се бакІалра чІумати!

ХІуша тІаш-лехІли дуъни
Халал яхІла лишан саб!
Дуньяла хІял багъурли,
Даргдердеси тяхІяр саб!..

АкІубла дисули сар
Удир хІушала хІуркІби!
Бурсидиубли сари
Бисаличи къутІкбути!

ХъанцI миъли кIапIдарайчи,
Илдас гъанкIра хIебирар!
Дегъубли детахъайчи
Бисара катхIедурхар!..

Къакъадеш хIебагъурси
БархIи хIебакIиб набра!

Абала канилихIиб
ХIебалас бакIибалра!

Гъай-аман-гъай, виралри
Гъанна ила чаризэ!
Чера хIебаибсиван
Терсси дунъя хъумартес!

МУХIЛИЛА ЧЯТ

Гъанна гъар дигусилис
Шинкъяра къаламра лер,
УркIили бурцули саб
ЦацабехIла бекIла мер.

Нагагъ бекIличиб уркIи
Халали уббухъалли,
УркIилис гъандикибти
БекIлис дугIла сар къалли.

Я шинкъяли ужули
Пагъму имцIахIебирар,
Кани шинкIабакIили,
БекI гъатIира къагъбирар.

Къаламли белкIес гъалаб
Дев кIаламхIебиралли,
Пикрилис гIевветаэс
Замана хIебургалли,

ВегIла дузабла «тази»
ЭмхIезира хIебулхъан,
Мурдасра лардяхъили,
Хясализиб гербулхъан.

ДелкIалра рурхъул хIили
Яра мургъила хатIли,
ДацIти дезни урдулхъан
Абъяхъ мухIлила чятли.

Чула мерличирти хIи
Жанван дурхъати дирар.

Аммаки хIила дамгъни
Дебали цIахти дирар.

Майали лукIнигъуна
ХIекъси тяхIяр хIебургар.
Велкънила майалара
Тем, башни цархIити сарар.

Бузерила майали
ЛукIанти камли саби,
Тяп хIи кертIути къяйда,
Майа ахIерли сари...

ХIера декIси бабза жуз
Дураиб гIурра цала –
Язихъдирулра хIулби
Лебил ил бучIутала.

Арц дедили – багъалис
Дураибси саби ил.
Ил бучIахъесра багъа,
ХIебалас, бедлугусил.

Нуша зигардикIулра:
«ДучIули ахIен жузи».
Нушани хIевчIан дугIли
Урцулра гIяйиблизи.

Халкъличиб ахIен гIяйиб –
Жузла чятличиб саби,
Някъби чятли дясяхъес
БигхIебигули саби.

Тарихла Бяхъяни

АХЪУШАН ГІЯЛИ-ХІЯЖИ

Ахъушавадси гІилмуртала кандидат, ГІябдуллаев ХІяжимурадла «Али-Хаджи Акушинский» бикІуси жуз Дагъистайчила дурадухъунти жуззазибад мягІничебсилизи бейГес вирар.

Россияла ГІилмуртала Академияла Дагъиста гІилмула центрла историяла, археологияла ва этнографияла Институтли къабулбарибси ил жузлизиб Ахъушан ГІяли-ХІяжичила, илала гІякълуличила, диннис мардешличила ва кагібти баркъудлумачила чебетаахъили бурули саби.

Ил жуз белкІес ГІябдуллаевли пайдаладарили сай дахъал архивла белкІани, гІилмула хІянчурби, документуни.

Халаси къадрила ва мягІнала жуз белкІес бажардиикили сай жагъил гІялим.


Ахъушан ГІяли-ХІяжи акІубси сай Ахъушала шилизив 1847-ибил дуслизив. Илала дудеш Мямма Ахъушала Халамижитла будун сайри.

Ахъушала шилизибси мактаблизив учІули кали гІергъи ГІяли-ХІяжини бусурман динна гІилмула шайчирти багъудлуми чедицІахъиб Дагъистайзибти машгърти гІялимти Ахъушавадси ХІяжилагІяличив, Ташкапурлизивси ГІябдуряхІманничив, ГІяндила шилизивадси Ибрагъмличив, ЦІудахъаривадси Иљяс-устазличив учІули.

ГІяли-ХІяжини гІяхІил дагъур кІарахъала ва къумукъла мезани.

Сай валутала гъай хІясибли, ГІяли-ХІяжи паргъатси, сабура, гІяхІти хІял-гІабигІятла, халаси гІякълула адам сайри. Иличи Дагъиста гъар мерлабад чула суал арзес адамти башутири, ГІяли-ХІяжини гъар вакІибсила гъайличи лехІахъес замана бургусири, гІяхІси гІеббурусири, динна, шаригІятла тяхІяр-къяйда иргъахъусири, адамти саби-ургаб цабалги, дигичебли хІерби-ахъес, бунагъла баркъудилизи аХІехъахъес, цалис ца диргалахІебулхъахъес бурусири.

ГІяли-ХІяжи 1890-ибил дуслизив хІяжлизи вякъунсири. ХІяжлизивад чарухъи гІергъи дин бузахъниличи, шаригІятла тяхІяр-къяйдаличи дебали



чекайзур. Ахъушала Халамижитлизив гъайулхъухЕли илини бурсиличи лехлахъес бахъал адамти учибиркутири. Гяли-ХІяжи цархІилти шимала халкъличилра гъунивиусири ва динна, шаригІятла гъуйчи кабизахъес, вайси хЕбарахъес, хатІахЕбикахъес гЕвугъусири.

ШаригІятла законтачи чекайзни иргъахъули саби ца ишгъуна анцІбукълира: Гяли-ХІяжини, сунени арц дедили, Темир-хан- Шурализибси М. Мавраевла типографиялизир шаригІятла тяхІяр- къяйда ва законтни кадерхахъурси жузла авал том дураахъиб 1911- ибил дуслизир.

1918-ибил дусла январь базлизив лебил Дагъиста 3-ибил съездличив Гяли-ХІяжи Дагъиста Шайх-уль-исламли викІиб, салтІалан Узун-ХІяжичив ва хІуцІан Нажмутдинничив гъалав чеили. Илис сабабли бетаур Гяли-ХІяжила халаси хІурмат лебни, лебилра Дагъиста халкъли ил марварни, ил-ванзурбала хужаим, дурзамтала вегІ, мас-хазна дучибси адам ахІи, мискин халкъ гЕб-бурцуси, гІядатла динна агълула вакил, гІякълучевси, сабурличил вяшиклуси ва маслигІятбарес балуси адам виъни багъандан.

1918-ибил дусла май базлизиб, граждан дургъби демжурси манзиллизиб, Гяли-ХІяжини Узун-ХІяжизи ва Нажмутдиннизи аргъахъиб, сагаси правительстволочи къаршиси илдала дяви сунени гЕббурцули хЕйъни.

Алавчар кадиркути анцІбукъунас бархъси къимат бедес балуси ва челябкълализиб се бетаэс асубирарал пикрибуси Гяли-ХІяжи Совет хІукуматла къаршикартала шайчи кахЕйзур. Илини пикрибариб Деникинна, турканала, Англияли дархъибти гІяскурти имцІали урехила диъни, ва илдас къаршидеш дарни чарагарли биъни.

Гяли-ХІяжини бархъли чебиули ахІенри Дагъистан пачала Россияла рягІятдешлизиб биъни, Дагъистан мутІигІли буахъес багъандан урусла пачани гІяскурти кадатни, Дагъистайзиб биалли азирти адамти мискиндешлизиб, къарциндешлизиб хЕрбирули, илдала гІямрула даража дебали гІяшси сабни. Ил сабри Ахъушан Гяли-ХІяжи большевикуначи къаршили кахЕйзнилис цаибси сабаб.

Дагъистайзив, хаслира динна агълула ургав Ахъушан Гяли-ХІяжи халаси хІурматла вегІ адам виъни пикрилизи касили, иличи революционерти башесбахІиб. Гяли-ХІяжичи бакІиб МяхІяч Дахадаев, Жалалутдин Къоркъмасов, МяхІяммад ТІалхІят, Гялибек Тахо-Годи, СягІид Габиев, Нажмутдин Самурский ва цархІилти революционерти. Илдани чула мурадуни ва къасани иргъахъутири мискин халкъ багъандан, илди пачала рягІятдешлизибад уббухъахъи, багъудиличи, арадеш гІяхІбиахъниличи, дурхІни абикъес шуртІри ва имканти гІердуцниличи дяхІчаибти сари или. Школаби, больницаби абхъес, адамти хІянчиличил гЕббуцес ибти большевикунала къасани дархъли чедаили хъалли, Гяли- ХІяжини аргъахъиб сай бекІлил къабулли хЕйъни, эгер Совет хІукумат динничичи къаршили биалли...

Шайх-уль-исламла маслигІятличи лехІхЕхъили, Дагъиста бурги Бакулизи арбкъунси замана пайдалабарили, Нажмутдин Гоцинскийли Темир-Хан-Шура буциб, илав сай халал ветаур.

Ил замана Узун-ХІяжи Ахъушан Гяли-ХІяжичи дугъаизур, сунела адамтира дураили, Лавашала ва Цудхурла шимазирад гІяскурти чедицІахъили, большевикуначи къаршиси Гоцинский гЕвуцес Темир-Хан-Шурализи вакІахъес.

Гяли-Хіяжини ил вѳкуси хѳбариб. Илис Дагъиста адамти цабехІли цабехІ кабурушуту дявти гѳрдудес дигули ахѳенри.

1918-ибил дусла апрельла 19-личиб ХІунтІена армияли Темир-Хан-Шура акъубатахъур ва илаб майла 2-личиб Уллубий Буйнакъский бекІливиубли Военно-Революционный комитет акІахъуб. МяхІяч Дахадаев Дагъиста военный комиссар вариб.

Ил бархІи дурабухъунси ВРК-ла дугъабизлизиб багъахъур Дагъистайзиб Совет хІукумат кабизахъурли биъниличила.

Ил дусла ноябрьлизиб, Дагъистайзи туркани бакІили, Бичераховла гІяскуртани Порт-Петровск ва Темир-Хан-Шура дуциб. Ил манзилла бархибдешличила гъанбиркахъули, ГІялибек Тахо-Години бурусири, кІибехІ душмантачил дургъес цакаъ атхІебиухІели, Деникинна гІяскуртачил заманалис даршудеш багъахъурли, Бичераховла гІяскуртачи къаршили дургъес пикрибарра или. Амма ГІяли-Хіяжини аргъахъиб, ил барес асухІебирни.

1919-ибил дусла майла 2-личиб ГІяли-Хіяжила бекІдешлиуб Ахъушаб Даргала жамигІятла собрание бетаур. Иличив ГІяли-Хіяжи вики:

– Нушаб Дагъистан берцахъес гІягІнили саби! Къзакъунира илди гІеббуцили бакІибти турканира гъабяхъес багъандан нуша лерилра цадиэс гІягІнилира. КІел къял лерсини ца бицили, кІел бархала хъу лебсини ца бархала бицили, ярагъ асая! Дагъиста азаддеш багъандан дургъули дебкІни гъалаб саби, чила биалра рагІятдешлиур хІердиэсличиб!

Ца базла гѳргъи, 1919-ибил дусла июньна 2-личиб Даргала округла центрли сабси Ахъушала шилизи Дагъистайс бекІдеш дарахъес урусла пачани катурси генерал Халиловла буйрукъ бакІиб: «Деникинна гІяскарлизи 20 дусличибад 40 дусличи бикайчи гІямрула мурул адамти бархъая!» Ил барахъес ца жумягІла заманара бедиб.

Ил буйрукъ пикрибарес собрание бучиб. Иличиб гъайбухъун Ахъушан ГІяли-Хіяжила урши МяхІяммад ва ГІяли-Хіяжила секретарь Сулейбан-Хіяжи. Илдани аргъахъиб Халиловла буйрукъ таманбарес саби къабулли хІебиъни. Собраниели илдала пикри гІеббуциб ва Деникинна гІяскарлизи адамти хІебархъес ибси хІукму бариб.

Ахирлизив гъайухъи, ГІяли-Хіяжила урши МяхІяммадли буриб: «Саби бѳкуси хІебарибхІели, Халиловхъалани нуша паргъатли хІедалтара. Илбагъандан гъанна нуша душмантала сегъуна-дигара авараличи хІядурли диэс гІягІнибиркур».

ГІяли-Хіяжини хІукму къабулбариб, гъар юртлизиwad ца адам хІясибли гІяскарлизи каэс ва Лавашала шилизи бакІахъес ибси.

ГІяли-Хіяжини аргъахъиб, дявлизи кадерхес къалабадикес гІягІнили ахѳен или. Генерал Халиловлис гъалабихъиб:

- 1) Дагъистайзирад гІяскурти ардукахъес;
- 2) Дагъиста духІнарти къуллукъунази секъяйдалра гъудурхІебикІахъес;
- 3) Халиловла правительство марбирули хІебиънира аргъахъиб.

Илдигъунти тІалабуначила багъурли, Деникинни ва ил гІевурцутани аргъиб чус Даргала округла шайзибад кумек хІебирни.

Дагъистайзиб къиянси манзил сабри. Деникинна гІяскурти Дагъистан буцес ибси къасличил чедухъири. Цашайчибад турканира бухІнаберхурлири.

Илгъуна агилизив дебали хІяжатлири гІякълучевси адам, суненира бархъси

баркъуди гѣббурес балуси, гѣмрулизиб бекѣлибиубси мурад аргъес ва ил сархниличи халкъ бяхѣчаэс бажардивиркуси.

Илбагъандан челябкъла гѣхѣил пикрибарес балуси Ахъушан Гѣяли-Хѣяжи дурабад Дагъистан буцес бакѣибти гъармукабачи къаршили бургъути большевикунала шайчи кайзур.

1919-ибил дусла июньна бехѣбихъудлизир Дагъиста дубуртазир Деникинна гѣяскуртачи къаршидеш цѣакъдиуб. Ил замана Гѣяли-Хѣяжи, вайлиу ханжалра бигъи, сунела уршби Мяхѣммадличил ва Гѣябдуллагъличил халкъла гъала дуравхъун. Илини шанти ва Даргала округла лебилра халкъ жибариб Деникинна гѣяскуртазибад Дагъистан азадбарес дявличи ахъбиахъес.

Гѣяли-Хѣяжила бекѣдешлиуб Ахъушаб бучибси гѣяскар Лаваша бакѣиб.

1919-ибил дусла июльла 16-личиб Дагъиста Шайх-уль-ислам Ахъушан Гѣяли-Хѣяжини Добровольческая Армияла командующийличи ультиматум гъалабихъиб. Ил ишгъуна мягѣнала сабри:

1. Деникинна гѣяскурта дуцибти Темир-Хан-Шура ва Дербент акъудатес ва гѣяскурти Дагъиста дура ардукес;

2. Дагъиста духѣнарти къуллукъунази гъудурбикѣни тѣашаэс;

3. Дагъистайс гъуни чебиахъес адам катнила хѣкъллизибси чула буйрухъ уббяхъес;

4. Илди тѣалабуни детхѣдерхахънилис гѣяйиб Добровольческая Армияличиб чебаэс;

5. Хѣукму 24 сѣгѣятла бухѣнаб таманбарес.

Деникинна гѣярмияли ил таманхѣбариб. Илбагъандан Шайх-уль-исламли Дагъиста лебилра халкъличи дугъабиз къабулбариб, Деникинна гѣяскурти Дагъиста ванзаличирад дугѣаэс багъанданси, Дагъиста халкъанала азаддеш ва дин бузахъес ихтияр калахъес багъанданси дявличи ахъбиахъес жибируси.

Эгер Деникиннис Дагъистан буцес имканбакѣалли, чучира ярга биахъу или, Азербайжа правительстволи Дагъистайзи кумеклис ярагъ дархъиб.

Генерал Халиловли Гѣяли-Хѣяжичи гѣяйиббариб Деникинна гѣяскуртас къаршидеш дарни багъандан. Гѣяли-Хѣяжини аргъахъиб, сунела шайзибад сегъуналра валикибдеш биэс хѣлебирни дурабад бакѣибти хъямчибачил, чулира халкъла лебдеш кебисути, зулмукардеш дирути, адамти дин бузахъес хѣбалтутачил.

1919 ибил дусла октябрьла 19-личиб Северный Кавказла ва Дагъиста Оборонала Совет акѣлахъуб. Илала центр сабри гъала-гъала Ахъушаб, гѣур-Лавашаб. Илизи каберхуртири Дагъиста хѣурматла адамти. Советла бекѣлибиубси мурад сабри Северный Кавказла ва Дагъиста мер-мусаличирад Деникинна гѣяскурти гъарахъдарни, ил баркъудилизиб лебилра цабиахъни.

Северный Кавказла ва Дагъиста Оборонала Советла председатель Султан-Сѣгѣид Казбеков 1920-ибил дусла мартла 5- личив турканани кавшиб. Большевикунани туркла 20 бургъан буциб ва Казбековлис чеббицѣес кабушес къасбариб.

Гѣяли-Хѣяжини, ил баралли авара дахъдиур, турканани сагати цѣакъани лерку, иткъяйдара бархибси Дагъистан гъатѣира бирхахъу или буриб.

1920-ибил дусла апрельла 1-личибад Дагъиста ва Северный Кавказла Оборонала Совет Военно-Революционный Комитетличи шурбатур.

Горское правительстволаседаниеличи жибариб большевикуначи къар-

шиси дявилис бекДеш дируси Н. Гоцинский ва Ахъушан ГЯли-ХИяжи. Илав гъайухъи ГЯли-ХИяжини буриб, Гоцинскийла авара дархъти ахIен, гъар бархIи гЯйиб агарти адамти кабуршути дявти адилкъниличи къабуликес хIейрус или. «Большевикуначи къаршили ургъес гъалав хIу илдала пикриличи лехIахъес, хIед къабулхIебиркуси чузи аргъахъес гЯгIнисири. Исламличи ва шаригIятличи къаршили хIебиалли, илдачил ургъес хIяжатдеш чебиули ахIенра» иб ГЯли-ХИяжини Нажмутдиннизи.

Революционертала баркъудилис халаси урехи акIубси, Россия тIутIу-кабиэс хIядурси ва се-дигара барили, Россиялизибад Дагъистан декIарбикахъес Турция бургули, ил Англияли гIеббурцули, пачала Россияли биалли Дагъистан мутIигIбарахъес Деникинна гIяскар бархъибси ил манзиллизиб Ахъушан ГЯли-ХИяжила гIякълучебдешличила, сабурличила сунела пикри бурули, СягIид Габиевли белкIун: «Баркалла биаб ГЯли-ХИяжис. Илини Дагъистан берцахъиб!».

Большевикуначи Ахъушан ГЯли-ХИяжила гъаланачи халаси хIурмат бариб. Илала тилади хIясибли сунела юртла мякълаб 7-13 дусла гIямрула уршби-рурсби бучIахъуси мадраса абхъиб, шила Советла къайгъиличил Ахъушала шила дайлабси базарличибад Ахъушан ГЯли-ХИяжила юртличи бикайчи гъуни хIеркIла къаркъали кабуциб. ГЯли-ХИяжила гъайличи хIякимти лехIихъутири.

Амма 1922-1925-ибти дусмачибад бехIбихъили, цахIнабли пачалихълизиб ва, илкъяйдали, Дагъистайзиб дин бузахъниличи хIукуматла бяхIчибиз барсбиуб – динна агълула вакилти выбортазир бутIакъяндеш дарес ихтиярлизибад мяхIрумбариб, шаригIятла судани урасиб, дин бузахънилизир, гIярабла мезла жузи тIинтIдирахъес къадагъабариб.

ГЯли-ХИяжила хаслира халаси разиагардеш акIуб «мижитуни дахъал лерну, илдала лугIи камбарес гIягIнили саби» ибси пикриличил мижитуни къяпIдирес бехIбихъибхIели.

Илдигъунти анцIбукъуначи ГЯли-ХИяжини дакIу-гъаргли къаршидеш дагъахъур. ГЯли-ХИяжи гIевуцили, илала уркIила дард иргъули, ахъушанти 1925-ибил дуслизир шила Советлизи дурадуркIути выбортачи хIябкъун ва илди детхIеур; Ахъуша школалис или хибти партаби хIеркIлизи лайдакIиб, шаригIятла законтти датахъес тIалаббариб.

Просвещениела шайчибси Пачалихъла комиссияли школала хIекълизиб хасси хIукму къабулбариб. Илизиб иргъахъулри пачалихъли гъаннала гIергъи жавабкардеш дихути хIедиъни дурхIнас динна шайчиб бяркъ бедлугнилис ва багъуди кайсахънилис.

Ихтияр батур дурхIни хъулиб къуръай бучIахъес, илхIелира – ца мугIял-лимли бучIахъути дурхIни 3-личиб имцIали хIебиэсли.

Дагъистайзир мижитуни дирес бехIбихъибтири 7-ибил даршдуслизиб, хаслира Дагъиста югла шайчиб. БегIлара бахъхIила мижит саби Дербентлизибси. 1913-ибил дуслизир Дагъистайзир лерри 767 мадраса, чузибра 6727 урши-рурси бучIути.

Октябрьла революциялис гIергъи, мадрасабала лугIи дебали камбиуб. Динна хIекълизир чумал документ къабулдариб, чузибра адамлис ихтияр бедибси дигалли – дин бузахъес, хIейгалли – хIебузахъес.

Хасси Декрет гIямрулизиб дурабуркIули, школабала программабазибад

убасиб динна шайчирти багъудлума кайсахъни. Иличи къаршидеш дагъахъур дигалли бусурман динна, дигалли цархИлти динанала вакилтани. Россияла деклар-декларти шагъуртазир чедиб гъанбушибси Декретличи къаршидеш далахъули, киласабала агълу гЕббурцули, митингуни ва цархИлти далдуцуни дурадериб.

РСФСР-ла цаибил Конституция хИясибли киласабала, мижитунала ва цархИлти динанала агълула вакилти депутатунили бирлес ихтияр убасиб.

Дагъистайзиб динна чебкадси Декрет гЯмурузиб бетерхахъес дебели къияннири. Адамти динна асарлиуб сабри, бахъал дурхИни мадрасабазиб бучГулри.

1925-ибил дуслу августличи бикайчи Дагъистайзиб къуръай бучИахъни даимбиуб.

1929-ибил дусла февраль базлизир ВКП(б)-ла секретарь А. М. Кагановичла къулбасличил «Динничи къаршиси хИянчи цАкъбарнила хЕкълзиб» ибси уличилти кагъурти гъар мерличи даиб. Илди кагъуртазиб бурулри динна агълу Совет хЛукуматла ва Компартияла баркъудиличи къаршити аварализи ихъули сабину, илдачи хИеруди цАкъбарес гЯгИнибиркур или.

Дин бузахъниличи къаршили хаслира чумали гъайбулхъутири РСФСР-ла Совнаркомла председатель А.М. Рыков ва просвещениела министр А.В. Луначарский. Илдани бурсири, валлагъ, динна агълу социализмала идеябачи къаршити цАкъаначил бархбиркулину, илдачил чекайзурли дяв бузахъес, жавабличи битИкИес чараагарли хИятбиркур или.

Ил дуслизиб РСФСР-ла Конституцияла статья барсбариб ва дин бузахъес лерти ихтиюрти ил статья хИясибли гИурра камдариб.

Илис гъалаб Совет хЛукуматличи разиагардеш далахъни илцад дакИу-гъаргли чебиахъули хЕбиалра, динна агълуличи къаршидеш цАкъдиубХели, лебилра халкълизиб дин бузахъес хЕбалтниличи разиагардеш акИуб. Мера-начибра паргъатагардеш имцабиуб.

Илбагъандан 1930-ибил дусла мартла 14-личиб ВКП(б)-ла ЦК- ли къабул-бариб сагаси хЛукуму, сунезибра хъарбарибси киласаби, мижитуни къяпИдирни гИашаахъес, илди къяпИдирнила суал халкъла сходличиб хИербарили, сходла хЛукуму хИясиблицун ирзес ибси.

Ил хЛукуму хИясибли гъалар къяпИдарибти киласаби, мижитуни, цархИлти мер-муса сагали абхъиб, иличибли халкъла разиагардеш камбиуб, улкализиб паргъатдеш имцабиуб. Амма динна агълуличи халати налогуни чедихъиб.

Бусурмантала Духовное управлениеела председатель муфтий Р. Фахретдиновли ВЦИК-ла председатель М. И. Калининничи кагъар белкИун. Илизиб бурулри, Совет хЛукуматличи илцад халаси къаршидеш агарли биалра, динна агълулис ва дин бузахънилис сен диргаладеш алкИахъусил иргъули ахИенра или. «Бусурман динничи хЛукуматла шайзибад ишгъуна хИер даимбиалли, бусурман дин бекИлил беткахъес асубириуси даражаличи бетиркур», – белкИун Р. Фахретдиновли.

Иличиблара гИахИайчи барсдеш атИекИуб. Улкализир колхозуни кадил-захъуси, кулакунала лебдеш кебасили, саби цархИлти мер-мусаличи дурай-уси манзил бехИбихъилри ва динна масъалализиб бузес замана аги. Адамтала, илкъайдали, мижитунала лебдеш зулмули кебисниличилра динна агълу

къабулбикес хЕбири. КъабулхЕбикни аргъахъалли –динна агълу кулакуначил цабиубти колхозуначи, Совет хЛукуматличи къаршити бетарулири.

Дагъистан цархИлти мер-мусаличил цугбуцибхЕли, динна асар имцАли лебси мер сабри. ДагЦИК-ла председатель Нажмутдин Самурскийли хИса-ббарили къяйда, Дагъистайзиб динна агълу (шуйхри, имамти, будун-къадни, гЯлимти ва мугЯллимти) цахИнабли 40 азир адамличи абиркулри, цархИлти мераначиб ил лугИ дебали камли сабхЕли.

Дагъистайзиб арагЕбли Северный Кавказлис динна гИлму делчИунти адамти хЯдурбирутири. Дагъистайзиб багъуди касибти бахъал мугЯллимти бузутири Татарстайзиб, Башкириялизиб, гЯхИцад цархИлти мераначиб.

Динна черкад пачалихъли къабулдирути законт челис-че чИумадикУлри. Ахъушан ГЯли-ХИяжис ил анцИбукъ дебали децИгулри. Чичи дугъаизурли хъаллира гЯхИдеш бетарули ахЕнри.

1920-ибил дусла ноябрь базлизив Дагъиста автономия багъахъес вакИб-хЕли РСФСР-ла миллатунала къуллукъуназив узуси нарком И. В. Сталинни бурибири: «Советское правительство динна шайчирти суалтази гъудурхЕ-бикIар. ЦархИлти динанала адамтас къяйдали, бусурман дин бузахъутасра ихтиюрти цагъунти сари. Совет хЛукуматла пикри агара шаригЯтличи къар-шидеш дарес».

ГЯли-ХИяжичил бархбас бузахъути Дагъиста руководителъти Жалалутдин Къоркъмасовли, Нажмутдин Самурскийли, ГЯлибек Тахо-Години ва цархИл-тани бурусири дин бузахъниличил дархдасунти суалтазиб къиянбухъеси баркъуди хЕбирар или.

Бусурман диннис уркИ-уркИлавад марси ва сунела гЯмрула чебла диннис къуллукъбирнилизиб чебиуси ГЯли-ХИяжис дин батни сабри гЯгИнисира. Илала бекИлил къас аги большевикуначи къаршили кайзес, дин бузахъес ихтияр балтули гЕргъи. Иличи ургЕбли, 1918-ибил дуслизив Дагъиста хал-къаначи дугъаизурли, ГЯли-ХИяжини ишдигъунти гъай дурибтири: «Нушала дин хЕбалтули биаллири, нуша цадиубли дургъес чебсири. ИлхЕли нуни лебилра халкъ ислам хЕбалтутачи къаршили дурайаси. БусягЯт биалли нуни ил барес сабаб чебиули ахЕнра. ЦацабехИ динна узби большевикуначи къар-шили дурабухъес балбизни – гЯхИл пикрихЕбарибси баркъудили уббулхъан или гъанбиркули саб наб. АрагЕбли Россия большевикунала някъбазиб саби ва илдачи къаршили дургъни нушала заяси баркъудили бетарар.

1960-ибил дуслизиб Дагъиста жузала издательстволи Г. А. ГЯликберовла бекИдешлиуб халаси жуз дураиб «Дагъистайзиб Совет хЛукумат кабизахъес багъанданси дяви» ибси уличил.

Авторгани, дахъал гИлмула хИянчурби ва архивла материал пайдалада-рили, 1917-1921-ибти дусмазиб Дагъистайзибси аги сипатбарили саби. Амма ил жузлизиб Ахъушан ГЯли-ХИяжичила камли бурили саби. Гъандушили сари чИянкИли чумал анцИбукъ: сунес гЕлавад укьяхъес или Узун-ХИяжини тиладибарили хъалли, ГЯли-ХИяжини ил викИуси хЕбарниличила, ГЯли-ХИя-жила урши ГЯбдуллагъли Мажалисла мякъларти ва Хайдакъла-Табасаранна мер-мусаличирти дявтазир бутIакъяндеш дарниличила;

Турцияла гЯскарла бекИ Казимбейличил ГЯли-ХИяжи цахЕйъниличила;

Ахъушаб дураберкИбси собраниеличиб Нури- Паша ва илала гЯскар Дагъистайзирад дугАэс ибси хлукму къабулбарниличила.

ИтхИелла анцІбукъуначила бурути цархИлти жузазибра Пяли- ХІяжила баркъудиличила, Дагъиста цадеш калахъес багъандан илини барибси къай-гъиличила камли бурули саби.

Илбагъандан баркаллаикІес виар профессор Б. Г. Кашкаевлис, суненира МяхІяч Дахадаевлис багъишлабарибси жузлизир Ахъушан ГІяли-ХІяжила гІякълучебдеш, халкъ цабахъес устадеш ва Дагъистан берцахънила баркъудилизи кабахъибси пай ахъли къиматладарибси.

1987-ибил дуслизиб Москвализиб дурабухъунси 20-ибил даршдусла бехІбихъудлизиб Дагъистайзибси агиличила белкІунси профессор М. ГІябдуллаевла жузлизиб бурули саби Ахъушан ГІяли-ХІяжила, баркъуди, большевикуначил цавиънила – аргъес виар, – ит заманала тяхІяр-къяйдаличи балбикили саби или.

«ГІяли-ХІяжи большевикуначил цавиънила мурад – дурабад бакІибти гъармукаби гъабяхъни сабри. Амма, – лукІули сай авторли, – чекайзурси динна адамли сайси Ахъушан ГІяли-ХІяжи большевизм тІинтІбикІниличил ва гъалабахІ башниличил къабуликес хІейрни якъинси саби».

1993-ибил дуслизиб МяхІячкъалализиб дурабухъунси ГІябдуллагъ МяхІяммадовла Пялибек Тахо-Годила гІямруличила буриси жузлизиб ил машгурси революционерла пикри гъанбушили саби:

«Ахъушан ГІяли-ХІяжи – дубурланти-ургаб халаси хІурмат сархили, хІялалли хІяниубси, адамтани сунела дяхІлизирад нур ухули чедиуси, дахъал делчІунси ва халаси багъудила вегІ, сабурла адам 1917-ибил дуслизив политикала гІямрулизи витІакІили увухъун, илхІелира – Н. Гоцинскийличи къаршили».

Н. Самурскийла ва А. Скачкола жузазиб лукІули къяйда, Дагъиста социалист къукъяли саби гІеббуцахъес Н. Гоцинский ахІи, Ахъушан ГІяли-ХІяжи декларвариб, ил имцІали уркІигъаргси, чеветаибси, хІурмат халаси виъни сабаблицунра ахІи, бусурман динна байрахълиуб Дагъиста хъархІерагардеш калахъес ургъуси кІарахъан Шамилла баркъуди даимбарибси сайни багъанданра.

Россияла гІилмуртала Академияла Дагъиста гІилмула Центрла историяла, археологияла ва этнографияла Институтла Фондлизир лер белкІани Ахъушан ГІяли-ХІяжила секретарь ва халалгъуна мурид Сулейбан-хІяжи МяхІмудовла – гІярабла хатІли дарган мезли делкІунти 42 бяхІ.

Илди делчІунсини иргъули сай, сецад мурхъси гІякълула, сабурла, бархъдешла вегІ уилил Ахъушан ГІяли-ХІяжи, секъяйдали бажардиикилил ил пасихІси адам Деникинна ва цархИлти хъямчибазибад Дагъистан берцахъес багъанданси дявлизиб халкъ цабахъес.

Ахъушан ГІяли-ХІяжини дурабадти душмантачилси дявилизиб цабахъуб дарганциунра ахІи, дахъал кІарахъала ва булугунала шимала адамтира. Социалистунани халаси устадешличил Ахъушан ГІяли-ХІяжила хІурмат ва илини халкъличи бириси асар пайдаладариб дурабадти хъямчибачи къаршилициунра ахІи, Дагъиста бухІнабти большевикуначи къаршитала лугІи камбахъес багъанданси баркъудилизирра.

Аллагъла къадарличи чичивалра дебали вирхули хьалли, Гяли-Хияжи халаси хазнала веГІ адам ахІенри, ва цархІилти къакъабакІахъили, урхІла кебасили, сунес барес узуси ахІенри.

Амма революционерта чедирад дашути хъарбаркъуни таманхІедирес ихтияр аги.

1928-ибил дусла май базлизиб ВКП(б)-ла Дагъиста обкомла агитацияла ва пропагандала отделлизиб дураберкІибси заседаниеличиб къабулбарибси хІукумулизиб белкІун: «Дагъиста динна вакилтани, илдала лугІилизиб Ахъушан Гяли-Хияжинира Совет хІукуматличи къаршили хІянчи дурабуркІули саби, илдала бекІдешлиуб адамти Совет хІукуматла баркъуди бетерхахъес диргалабулхъули саби» или.

Илдигъунти тяхІяр-къяйдализив Гяли-Хияжи лехІахъили уэс хІейри. Ил Совет хІукуматла баркъудиличи дакІу-гъаргли къаршидеш далахъес веХІхъиб. Гяли-Хияжини сунела муридунни бучиб ва илдази буриб, мижитунни къяпІдарили абхъибти школаби, клубуни ва цархІилти секІал нушаб гІягІнили ахІен или.

Дагъиста декІар-декІарти шимазиб адамти дурабулхъулри мижитуннала лебдеш кресткомтази бедлугниличичи къаршили. Ца дусла бухІнабцун 150-на адамти дурабухъун илдигъунти анцІбукъуначи чула къаршидеш далахъули.

Улкализиб дин бузахъниличичи къаршиси хІяракат челис-че цІакъбикІулри, ва дин бузахъутас къияндешуни имцІадикІулри. Динна агълу лехІахъили буэсра бирули ахІенри, къаршидеш дагъахъалли – Совет хІукуматла душманти бетарулри.

1926-1927-ибти дусмазив Ахъушан Гяли-Хияжи дахъал шимази ваиб: Цудхъурла, Мажалисла, Губденила, Къарабудагъкентла, Къаякентла ва цархІилти. Гяли-Хияжичил барх сунела муридуннира башутири. Гъар шилизиб илала муридунни лебри. Илдани халкълизи иргъахъулри: дин хІебалути – капурти саби, илдала ибси барес асухІебирар, илди бикІуси баралли сабира жагъаннабла цІализиб бирар или.

Гяли-Хияжис децІигулри, цацабехІ адамти сунечила гІелаб гъайбикІули, динничичи къаршити большевикуни гІеббуциб или гІяйибта биркъули. ДецІигулри дин бузахъутас гІелабадкабикили, Совет хІукуматла хІякимтани адамти инжитбирули, сунес бедибси гъайлис марли калес хІебиъни.

Гяли-Хияжини Жалалутдин Къоркъмасовличичи ва Гусман Гусмановличичи бархъибси кагъарлизи белкІун: «Нуни дурабад бакІибти душмантази Дагъистан батахъес багъандан набзибад лябкъуси барира. Дила ибси барили, даршанадли адамти къазакъунала гІяскарличичи къаршили дурабухъун. Нуни ил барибсири Дагъиста цадеш ва азаддеш калахъес ибси къасличил, исламла дин мучлахІебирантас халкъ мутІигІли хІебиахъес багъандан. Амма наб гІяхІбилзули ахІен Дагъиста бухІнабра динна къаршикарти дакІубиъни. Аги ишкъяйда калалли нуни большевикуначи къабулагардеш хІебагъахъес хІейрус». Амма Гяли-Хияжини сунела кагъарлис жаваб катхІесиб.

1928-ибил дусла декабрь базлизиб Совет хІукуматличи къаршити саби или динна агълула вакилти туснакъбирес бехІбихъиб

Ахъушала шилизибад туснакъбариб ГІисаев Чарак, ГІисаев НурбяхІянд, Къадиев Зугъум-Хияжи, МяхІмудов СулейбанхІяжи (Гяли-Хияжила секретарь), Зугъумов ХалалмяхІяммад, БяхІяндов ДаудхІяжи, ХІясбанов ГІябдулла,

Гяли-Хіяжила халалгъуна урши МяхІяммад; АметеркІмахъилизибад-Къурбанов Шарип, Маргучев ЯхІя, Тагъиров ГІяхІмадхІяжи, Тагъиров Шарип, Къурбанов Сиражутдин, МухІела шилизибад – ИсмягІилов ШяхІбан, Мутаев Къурбан, ГІябдуллаев ГІиса-Къади; Усишала шилизибад – Арслаибекков Ибахъ, Мутаев ГІялаутдин ва ГІяхІцад цархІилти динна агълула вакилти.

Дагъиста автономия балахъухІели ишар лерри 1725 мижит. ГехІел дусла гІергъи илдала лугІи кІийнали камбиуб. Камбиуб мижитунази башутира. ТамбихІладирура или урухІули, мижитуназиб будун-къади биубли бузес хІейгути меранира диуб. Амма имцІатигъунтани дигІянали дин бузахъулри. ГІяли-ХІяжила гъуни буцибти илала муридуни Къасум-ХІяжи, Мирзала ГІямар, МусахІяжиев Мямма – (ГІяли-ХІяжила гуяв) Мустапала МяхІяммад, Хизри-Къади, Ибрагъимов ХІяжи халкъ-ургаб динна асар калахъес, шаригІятла гъуйчибад халкъ чебхІебалкІахъес къайгъилизибри.

ГІяли-ХІяжила муридуни лебри гъар мерличиб ва илди динна хІурмат калахъес дигІянали бузулри.

1928-ибил дусла декабрьлизиб Северный Кавказла ва Дагъистайзибси ОГПУ-ла отделениели уголовное дело бариб, сунезибра Ахъушан ГІяли-ХІяжини ва илала урши МяхІяммадли бекІдеш дируси, революцияличи къаршиси, 66 адамлизибад цалабикибси къукъя леб или, гІяйиблизи буцили, лебилра илди туснакъбариб. Илдазибад 29 адамлис кабушесли суд бариб. ГІелаб калунти Сибирьлизи ва цархІилти мераначи бархъиб.

ГІяли-ХІяжи ил анцІбукъла чевкад Совнаркомлизи дугъаизур. Илала председатель К. Мамедбековли ГІяли-ХІяжила урши МяхІяммад кавшес или барибси хІукму барсбариб – 10 дуслис туснакъварес или. ЦархІилтала чевкад селра барсхІебиуб.

1930-ибил дусла апрельла 8-личив Ахъушан ГІяли-ХІяжи гІямрулизивад арякъун.

Ил хабарла аргъили, Дагъиста гъар мераначибад Ахъуша адамти къалабабикиб. Ил бархІи барибси зикрулизир 200-цад адамли бутІакъяндеш дариб. ГІяли-ХІяжила хъунул Булбунна ва урши Илъясла тилади хІясибли, ГІяли-ХІяжи сай хІерирули калунси юртлизив хІяриихъиб. ГІяли-ХІяжила уршби МяхІяммад ва ХІясбулла туснакълизиб сабри. Илди бархъесгу или хъулбикІули, хІябал бархІи устазла хІяб кІапІхІебарили батур. Амма дудеш хІяриихъахъес уршби хІебархъиб...

(ХІяжимурад ГІябдуллаевла «Али-Хаджи Акушинский» бикІуси жузлизибад).

ПатІимат МАЛЛАЕВА.



Нүшала аслу-мина

ХизрихІяжи устад:

**«Дила ши халкъли бархъбалта,
амма гІур илизи сагали чарбулхъан»**

*Заклизиб бархІион диннизив шалал,
Бац-алав урмион, насихІят жагвол,
Изуси уркІилис бицІахъри бикъан,
Чархлизивад зулмат гъарахъбикъан,
ХизрихІяжи устад, хІузибад кумек.*

Муршид ГІябдуллагъхІяжи

Ит бархІи мугрила ши ила музабухъунти адамтала бахъдешли имиула къадаван сабри. Шилизисби илгъуна гІядатлихІебиубси мицІирдешлирил яра цІаличирти халати шунгразибад башуси дигъла тІемли иладяхІ дитІакІибтирил, Мугрила шила чедисби Циндирла музала чедир заклизир кІел чІака хІяздухъесли кІайдяхІилри. Шила чедирад чумал мява дарили, чІакни вацІала чедирад ЭчадяхІ ардякъун.

Хабарла ГІямарла Батирайличил варх цазаманализив хІерирули калунси дина машгъурси поэт муршид ГІябдуллагъхІяжи сунела тулкнала цализив, дунъялизив хІерируси адамличи дугъайзурли, викІули сай: «Мискин адам, хІулагІи язихъдиш – хъул гІиркъал, манзил къантІа». Вархъли викІули сай ил пасихІси адам, сенкІун дунъялизиб чули буцибси мер хІясибли халбаралли, лебилра адамти цаван «мискинти» саби, сенкІун илди дунъяличи заманалис бакІибти гІяхІли саби, илдани чула у ахІенси селра я итил дунъялизи арбухес бирути ахІен, сецад давла бучес бажардибикиб биалра, бикІуливан, «хІулилипІла» гІямрулизиб. Вархъли сай ил «хъул гІиркъал» викІухІелира, сенкІун адамлис дигутала ахир агарану. Вархъси сай «манзил къантІа» викІухІелира, сенкІун бегІлара сунела бузуси ва гъар секІал муридиубси вахтлизив хабарагарли гІямрулизивад аркъули сайну. Гъариллис-декІар сунени деркІибти гІямруличила «ну чи сайра, сен акІубсира?» или пикриухъесалра биркули ахІен, вахъ дунъяла гІузрумази вархидешли.

БекІахъудилизив мискиниубси гуширар виалли, рухІла шайчирти мискиндеш гІердаибси - тамай кутурирар, сенкІун ил адамдешла дазурбазивад



дураветиркур. Камти диалра дагъри мицѳираглизирра лерли сари (житали, хяли халаси замана арбякѳи гѳергъира чула вегѳ валулигу), адам мицѳираглизивад декѳарулхъахъуси дагърили ахѳенну, адаб-хѳяяли сай. Илис ургар XII ибил дуршдуслизив хѳериури калунси бусурмантала машгъурси гѳялим ва философ Ал-Гъазали «Жагѳял Аллагъла гъалайзес хѳяжатли биалли, ну ишбархѳил, умуси хѳевара чегъурли, хѳядурлира» викѳуси.

Инкъурбазив акѳубли, хъям-къацѳлизив хѳериубси адамлизир гѳяхѳачил дарх дахъал вайти къиликъунира минадиубли сари. Илдазирад азаддиес нушаб халаси замана хѳяжатбиркур. Ванзаличиб алжана белшес балбизурти коммунистуналара гъархѳебизургу.

Ишбархѳи дин бузахъес нуша хѳедалтуси агара. Вецѳани азирти адамти хѳяж барес башули саби. Амма, бархъли бурая, гѳергъити хѳябѳали душла бухѳнаб адамти къулайбиублил, ахѳенал? Вайти бетаурли биънилис бикъри-деш дирути биалли дахъал лишанти хѳясибдарес вирули сай. Мижит агарси ши агара гъанна, буркъа сагабарили саби яра сагаси тѳашбатурли саби, цацадехѳ шимазир къалли илди вецѳани лерли сари. Адамла рухѳла дунъяличи мижитлира илцад халаси асар барес бирули ахѳен. Хѳяж баресра адамлис халаси хѳядурдеш бирес чебиркур. Чили-сабил бедибси путевка хѳясибли барибси зияратлис хѳяж викѳес хѳейрар, сенкѳун ил турист архѳяличи имѳали мешули саби.

Итира гъар шайчибад пачалихъли гѳеббуцибти халати хѳякимти булан хъям-къацѳлизи ахъили, туснакъунази биркули саби, жавабличи битѳхѳекѳили кавлуги биалли гъатѳира бахъал саби. Изути, зягѳипти, пакъирти адамти хѳербис пенсия кабизахъес дедес арц агарли цѳумбикѳули саби, мегъгъунти адамтани биалли арцлис пенсияби исули сари ва халаси гъунар барибтиван хамли къунзбикѳули саби. Рухѳ кутурдирнила лишан биъниличи пикриулхъуси агара. Цархѳилван буралли, ишбархѳи нушани нушала жагаси ванзаличиб жагъаннаб лушулра. Хъулкъназибад цалабикибси правительстволи бирару халкъ гѳяхѳити гѳямру лушниличи бяхѳичаес? Мажахѳят.

Жамигѳятла бухѳнаб халкъличи пикрибикѳес бажардибикести гѳяхѳити адамтира леб, илди агарти биалри, цѳакъла бегѳти гѳелаб калунти бугули баткабирхъи. Амма илди пачалихъла ургъур чузи бикибтани халкълис гъуни чебиахънилизибад тѳяйдил бихѳули саби.

Мяхѳячкъалализиб чула дурхѳнира, узбира, муйлира гуждан арбукили бетахъахъибти хъунул адамти разиагардеш багъахъес тах шагъарла бекѳли-биубси площадъличи чуйнал дурабухъун, амма илдала балбуц гѳеббурцули, «Такъсирчиби – судла хѳукму хѳясибли жавабличи битѳакѳая, амма гуждан буцили бетахъахъибти баргая!» или халкъ дурабухъес хѳебиуб.

«Нуша итдигъунти, ишдигъунти сарра» или, гапбикѳес дагъистанланти гъалакбикѳули саби, амма саби пасадли хѳербирули биъниличила пикрибулхъули ахѳен. «Хѳуша нуни лагъдешлизирад аздадалтара!» или вявикѳули вализурси Р. Гѳябдулатѳиповра, нушара лайдакѳили, Дагъистайзивад вебшили ветахъиб.

Чедирад нушала гѳямру къулайхѳемирахъни аргъес жявлил замана баили саби, удибад халкъла гъяжра хѳяжатси саби, кадизурти жапати аги-къяйда дарсдиахъес багъандан. Революцияби чила-биалра хѳяздухъи дирути ахѳенну, челукъути масъулти ирзхѳерзухѳели анѳѳубукъ баргбердличи бетиркусси саби. Аги-къяйда илкъяйда гъунчидиркниличи аркъули нушани камси гъаларванра чедаира.

Кадизурти вайти аги-кьяйда дарсдирниличи хьулдикIахъуси лишанра леб. Гергъити дусмазиб адам «кани бахесцун хIейъни дунъяличив акIубси» иргъути ва рухIла дунъяличи пикрибулхъути адамтала лугIи имцIабикIули саби. Халкъличила пикрибикIули калунти динна гIялимтала хIябрачи зияратли башули саби. Илдигъунти машгъурти адамтала уми шагъарла къакъурбас дедлугули сари. ЦацабехIтас ил секIал бекIлил гIяхIбилзули хIебиаллира. Бусурман диннира адамтас памятникуни тIашдалтахъес маслигIятбирули хIебиэс. В. И. Лениннис сецад памятникуни тIашдатура Совет хIукуматла дусмазир, гъанна биалли илди делхъули саби ва халкъла хIукумат белшунси, лебилра дунъя барсбахъес бажардиикибси пагъмукар адамлис бургъули саби. ГIяхIти адамти памятникуни тIашхIедаталлира, халкъли хъумуртули ахIен. Совет хIукуматла замана имам Шамиллис гIяхIцадхIи бургъули калун биалра, дагъистанлантани илала у чула дурхIнас бирхъусири.

Шайх-ул ислам Ахъушан ГIялихIяжила къадри гъанна бархъли иргъули саби ва Дагъиста халкъла гъаларти илала къуллукъуни къиматладирули саби. Муршид ГIябдуллагъхIяжила тулкни дучIули сари халкъли. Даргала гIяхIцад шимазиб динна гIялимти лебтири, Совет хIукуматла замана илди хъумартахъес балбизурли хъалли. Илди адамтани, чула шималацун ахIенну, алавчарти шимала халкъла ургабра халаси хIурмат сархибсири. Илдани халкълис гIяхIти насихIятуни дурутицун ахIенрину, гъар секIайзиб илди саби цархIилтас гIибратлира бирутири. Илди дин бузахъниличира чекабизурли бирутири, халати адамдешличилра декIарбулхъхутири. Илис бикъридеш дирули сари халкъ илдала хIябрачи зияратли башнили.

Илдигъунти пергер адамтазивад ца сайри Сергокъалала районна Мугрила шилизивадси устад ХизрихIяжира. Гъар дус илала хIябличи бахъал адамти зияратли башули саби, балга-дугIя дирули саби, мавлидуни дирули саби, садакъа буртIули саби. Гъалаб имцIали зияратли башути гъести ГIямрула адамти биалри, гъанна илдала ургаб бахъал жагъилтира къаршибиркули саби. Зияратли башути камти ГIямрула дурхIнала ургаб Къуръай бучIес балутира леб.

Чумал гъай саби Мугрила шиличилара дурес чебиркур, устад ХизрихIяжичила бурес гъалаб. Районна центлизирад бегIлара гъарахъти шими сари Мугрилара Къянасирагъилара. Сергокъалализибад илдази гъуни 30 километрличи абиркули саби. КIелра шила ургабси уркурла гъуни хIябал километрличиб цакъадар имцIали бургар, къяшла дякъ биалли илцадра агара.

Бурес агарли жагати мер-муса сари иларти. ВацIурби, мурби, гIинзурби, дуцIрумла замана илав къаршиикибси адамлис иларти мер-муса алжанагъунти саригу или гъанбикур. ВацIурбазир дахъал хивала галгуби лер, жунаб, мяхIяули, дургби, чадур ва цархIилти къадала цIедеш духъули сари. Колхозуни «дебкIили» гергъи калунти унхъразир гъаннара гIинцIбира хъярбира духъули сари. 90 ибти балагъла дусмазир хасмушунанани хивала дахъал галгуби тупангунас къандакъуни дарахъес дяхъили дициб диаллира. Жагаси тIабигIят саби илабси.

КIелра ши «гъарахъти» детауртири укъес-вакIес гъундури къиянти диъни багъандан сари. ТутIила унхъразиб бузахъес ялчни хIебиухIели, КIелра шила халкъ Мурегала ва Губданила совхозунази гечбарибтири. КIелра совхозла тутIила унхъразибцун ахIенну, чягъир дирути заводуназибра илди шимала адамти сабри бузути.

Дубуртазибси Мугрила ши тамай бацІкабухъун, Къянасирагъила биалли, байхъала диркъаличи гечІебиубли, дубуртазиб убкалун ва гъатІира тІагІямагарси агилизи бикиб, халкъ тІутІукабиубли. КІелра ши диркъаличи гечдарни итхІели къулайсилези халбирутира леб, дугІли гечбарибтири бикІутира къаршибиркули саби. Биубси биуб, гъанна иличила гъай дугІла сари. ТІутІи дашахъухІели, кІибехІелра разили сабри, гъанна биалли лебилра разиагарли саби, сенкІун адатас хІянчила мерани агара.

Диркъаличи гечдарибти шимира кутурдирули сари, халкъ шагъуртази бубшули. ХІянчила мерани агни лебилра Дагъистайзиб мусибатли бетаурли саби. Тяп илкъяйда бирусири Совет хІукумат кабизес гъалабра. Дубурти мицІирдирахъехІе или дахъал гъай лер, амма бируси селра агара. Гъайгъай, адамта саби акІубти мер-мусара хала бегІтала хІябрира разили дархъдалтули сари викІес хІейрар. Саби бегІти мер-муса кункли дархъдалтули сари или адатачи гІяйибта виркънира бархъли хІебирар. Амма хабарла Тимурлизира Надир шагълизира датахъурти шими халкъли дархъдалтули чедиухІели, уркІилис дебали гІядабли саби.

Катругси Циндирла музала берхІи шайчибси бяхІлизи белшунси Мугрила ши гъарахълавад хІерикІухІели суратлизибсиван жагали чебиули бири. Гъанна биалли иларти гъятІбиълумачи хІерикІухІели уркІи къакъабикІули саби. БекІлизи «ГІябас хъу барсбирули ахІенрара» ибси пикри булан абицІули саби.

Халкълизиб бурули бирар «Заб чинар диаллира, хІянра Мугрир дирар» или. Мурхъси къярдлабад батбихъибси зумаси дирихълизи, ил бамбала бекІа саби или, ахъти шурмачибад тІяхІбухъунти саби ибти ва цархІилти масхурти дурули бирар мугрантас. Илди лерилра халкъла фольклор сари. Илдигъунти тамашала масхурти алкІнилис бикъридеш дируси ца мисал гъанбуршис. Сергокъалализибси Къалала хъяблабад дубуртазибяхІ адамта бицІибси дехла машина батбихъили саби. Лебилра районнизив валуси масхарачи сирагъан Къасум-ази къаршиикили сай илав. «Арбякъун мугур алжанализи», - викІули сай ил, хъярхъли гъайбиубси автомашиналис гІелавад хІерикІули. «Нура мугран сайрагу!» – викІули сай къаниубли увкалунси ца адам. «Чинав калунрив?»- хъарбиули сай Къасум-азини. «Хъяшнас кампетуни асес тукейзи ацІира!» – бекІли гъакІикІули сай увкалунси. «Агъ, хІела хъали гІяхІбиъ! ХІябал къурушла кампетуни багъандан алжанализивад мяхІрумиублиригу хІу! – имцІабарили сай Къасум-азини. – Кери баахъес нушалайчив аркурину, тІашизи хІебиалли, чІикІни асес Халитла инкубаторлизи аррякъунси хъунул адам чаррухъунмад гъайдирехІену». Дагъиста цархІилти миллатуналара илдигъунти масхурти дархдалсахъути шими лер, масала, кІарахъала Сивухла шантачила, Дахадаевла районна ДугІахъарличила ва цархІилтачила. Мугранти цархІилти шимала халкълизибад селичиблилра декІарбулхъути ахІен, гъатІира бузери дигути ва гъар шайчиб бажардичебти биъни ахІенси. Мугрила шилизибадти саби мушул вашнила шайчивси дунъяла чемпион МяхІяммад ГІязизов, полицияла генерал АрсланГІяли ГІямаров, амма Мугрила шилизив акІубси бегІлара машгъурси адам – ил ХизрихІяжи устад сай.

Республикала прокурорли вируси Шанавазовла гІяхІдешли кІелра шиличи гъамси Мургукла шилизи къирли буцибси пергер гъуни барахъиб, ил ши тІабигІятла газличилра гІеббуцили саби. Сергокъалализибад МулебкІи аркъуси гъуни къулайси агиличи буршулра или, даршани миллионти харжда-риб (харжхІедарибну, ванзалези «удатур»), Муза-къада убилчедариб, гъуни

биалли мурт бираралра балуси агара. Илдигъунти детаурлисари ишбархИ нушала гІямру. Илдицад арцлискІун лебилра районннизирти гъундури къулайси агиличи душес вирусир!

Къянасирагъбси клуб ремонтбарилибхІели, ила вакІибси районна администрацияла бекІли «ХІушала мер-муса Швейцариягъунти сари, хІушачира гІяхІти гъундурира дирехІе, тІабигІятла газличилра гІердурцура» или, бурибсири. Ил ихтилатличила багъес дигуси интернетлизибси сайтлизи хІеризес вирар. Сепайда илкъяйда викІуси администрацияла бекІлизи ца яни беркІахъес Къянасирагъила шилизиб! Секъяйда хъярхъли ил «Швейцариялизивад» гъавулхъил. Чумал дус шалгІердухъи сари итхІейчирад, амма шилизиб селра барсбиубли ахІен. Сагати юртани тІашдатурти жагъилти булан Избербашлизи яра МяхІячкъалализи гечбирули саби. Школализиб бучІути дурхІни биалли дусличи дус камкабикІули саби. Аги-къяйда дарсдиахъес бажардихІебикалли, ашкарлигу, Къянасирагъила шиличира Мугрила шилагъуна къисмат хІерли саби.

ХІера севан лукІулил гъанна нушала ургав агарси Мургукла шилизивадси журналист ва писатель Ильяс ХІусейновли 1995 ибил дусла июльла 14 личибадси «Замана» газетализиб «Дурхъати адамти гъанбиркахъули» ибси рубрикалиуб дураибси «ХизрихІяжи устад виубли кумек...» бикІуси очерклизиб бахъхІила Мугрила шиличила: «Бара гъалавванра вякъунра ну дила дурхІядешла ва жагъдешла гІяхІцад разити дуги-хІери деркІибси Мугрила шилизи. ГІямарла Батирай викІуливан «...акиб аргъла дирихъван гІелабяхІ чахъбикІули» гъунибаиб наб хабарла Шубурумличи шурбухъунси Мугрила ши. ГъятІдиълумала гІела-гъаладухъунти гІянжи-къаркъа ахІенси селра агара ишбархІи ил хабарла устад акІубси шилизиб. Агара итди гъарахъти дусмазир къяйда анкІи-мухъили, мяхІярли, хІяжланкІили, картошкали, шибши хъарали дегІунти хъумира. Сагначи шурдухъи сари илди хъуми». Гъанна биалли илди сагни вацІурби детаурли сари.

Арбьякъунси дуслизив ХизрихІяжи устадла хІябличи зияратли вякъунра нура. Набчил варх дурхъаси устадла узи МяхІяммадла уршила урши ГІябдулкъадир ГІябдуллаевра леври. Дила бегІтала гІяхІлала урши ГІябдулкъадир дила гІяхІси гъалмагъ сай. Илала машиналичир сарри бахъхІила Мугри дякъунтира. Дебали вайси даражаличиб сабри ила аркъуси гъуни. Устадла хІябличи зияратли башути лебнила гІяхІдешли саби гъуни илгъуна даражаличибра калунси. ГІяхІси гъуни биалри, Мугрила шилизиб хІербирес чумилра адам гечбииши. БусягІятла замана илаб ца хъубзарла хозяйствола мицІираг адилкъуси фермацун саби лебси. Илар гІурра чумал адамли мицІираг адилкъули саби.

Электричество илаб гъалабра хІебири. МицІираг адилкъантани моторличибли гІямалбирули саби.

ГІяхІцад дусми гъалав диркъаличивад ила гІелавяхІ чарухъунси Расул Къурбановла уршиличиб «Жигули» батурра ва устадла зияратличи Расулла урши Къурбай «Ниваличир» даахъира.

– Дила бегІтала юрт буибси махъи хІуни гІяхІил балад, сенкІун чуйнара вакІибсирину. Сегъунти жагати мер-муса дирил чедаири. Иш вайси гъуйчибад машина геркабухъи дила хала дудешра, нешла узира, гІурра чумал тухумра бекІиб. Илбагъандан ишавяхІ вашес дила уркІилис гІядабли бирар, амма вегІ акІубти мер-муса чедаэс чис хІейгахъув? Шагъарлизир дила гъар секІал

тер, амма уркі гъаннара иша чарухъес биалри или гъуцІбикІар, – бурули сай ГІябдулкъадирли.

Нуша илдала махъи буибси мерличира дякъунра ва илар деркІибти дурхІядешла разити бурхІни гъандикахъира. «ЦадехІ гІямрулизирцун сецад дардешуни кадикибал», - бекІли гъакІикІули сай дила гъалмагъ. Илдала юрт буибси мерличирад чедиути муза-къадаличи, вацІурбачи, дубургачи хІерикІухІели чебиуси къяркъси жагадешли уркі ясирбурцули саби. Ишабад хъатлабван чебиули саби Къянасирагъила шира.

Мугрила хІябри шила удирван, къярдла итил шайчибси бяхІлизир сари. Адамти бахъхІи хІерхІебирухІели, шила хІябри булан вацІа детаурли сари. Сари хІябри хІяйван-къача ва маза-мас атхІедацІесли мегъла хІярили дебадарили сари. ХІябрала дублаб саби ХизрихІяжи устадла хІябра. Устадла хІябла мякълар илала хъунул Хадижатла ва уршби ГІябдуллагълара Багъаудиннара хІябри лер. Илди лерилра цахІнабси гІяшли белшунси лацли алавдарили сари. Устадла гІядатла къаркъализибад барибси хІябал метрлацад ахъси цІелдализи гІярабла хатГли белкІи саби: «Нуша лерилра дубкІутира. Иш хІяб накъшибандила Парикъатла шайх, гІилмула ва динна бекІ гІинизли сайси МуртазагІялила урши ХизрихІяжила саби. ВебкІиб бусурмантала тарихла 1337 ибил дуслизив». ХІебиалли ишдус устад вебкІибхІейчирад даршал дус диркули сари. Ил белкІ бучІухІели, дагърилизир мицІидирули сари муршид ГІябдуллагъхІяжини илис багъишлабарибси сунела тулкилизир дурибти пасихІти гъай: «Аллагъли гІякълура багъудира дитхъибил, гІилмула дигІяндешуни сунес гъаргъякъибил, чеввикІибси гІялим ва Дагъистайзиб абалкунил нурла Пал сай мугран ХизрихІяжи устад...»

Устад ХизрихІяжи 1851 ибил дуслизив Даргала округла МикІхІила наибстволизи кабурхуси Мугрила шилизиб хІербирути узданти МуртазагІялила ва СягІидла ПатГиматла хъалибарглизив акІубсири. ХІебиалли ил дунъялизив 67 дус хІериубли сай. Пачала хІукуматли 1886 ибил дуслизиб Дагъистайзиб халкъла сияхІ дураберкІибсири. Илала баянти хІясибли итхІели Мугрила шилизиб 600 адам хІербирули буили саби. ЦархІилти шималаван, Мугрила шила тарихра дяркърли ахІен. Илаб бусурман дин кабизес гъалабра адамти хІербирули буили саби. Мугрила ши-алав чумилра мерличир махъурбала гъятІбиълуми чедаэс вирар. Динна жузачил дарх тарихла баянтачилти жузи 30 ибти дусмала бекІбяхъуна къирхІедарили дерцили дуили сари. Илди 50 ибти дусмачи бикайчи шила хІябразибси хъулир кали дуили сари. ГІур илди шилизи хили, Айсила МухІаммала хъа гъалабси урцІализир дигубли дуили сари.

Хабарла Батирай Мугри вякъунхІели, халкъ маза кайули бархили буили саби ва Батирайчи лайикъси пикри бяхІчиаили буили ахІен. Ил багъандан сай сунела «АрхІялилизив» ил ХІурехъивси ГІябдусалам-къадичи «хІуни гІякІа лукІаду гъитти унна мугриши» или мугъаизурсира. 1990 ибти дусмазиб МахІаргивадси Дагъиста тарихла гІялим Амирхан ГІисаевли Мугрила шилизи архІя дураберкІибсири ва ил шилис багъишладарибти белкІани «Гъалмагъ-деш» журналлизира «Замана» газетализира кадяхъибтири.

ХІейгеси биаллира, нушачи ХизрихІяжи устадла някъли дарибти белкІани дебали камти даили сари. Устадла кІел узира кІел рузира лебли буили саби. Рузби ПатГимат ва ХІулаймат сабри. Узби ГІябдулхІяпизра МяхІяммадра сабри. ВиштІали левалли ХизрихІяжи дебали серхурси урши уили сай. Ил

бугаси гЯкълуличилра декАрулхъусири. БегТани къуръай учАхъесра жявли ведили уили сай. Мугрила шилизиб итхЕли гЯрабла гИлму делчІунти цабахъл адамти буили саби. Илдазибад цацабехІ мижитуназиб имамтили гЯхІцад цархІилти шимазибра бузули кали буили саби. Шилизибти делчІунти адатанира жявли хЯсибдалири буилри уршилизирти гИлмуличи вегІиэс гъира ва илала гЯкълула бугадеш. Ил пергер хЯл-гІабигІятличилра декАрулхъуси уилри. Адамти жявли шакбикили буили саби илизир караматдеш лерниличира.

Мугран ХизрихЯжила пагъмула хабар жявли лебилра Даргази ва Дагъистайзи гІинтІбиубсири хаслира илини хЯжлизи дурхъаси зиярат дураберкІили гІергъи. Ильяс ХІусейновли Мугрилацун ахІенну, алавчарти шимазивра ункъли валуси хІурматла Марзила ГЯбдуллагълизибад ишгъуна хабар аргъили уили сай:

– Лебилра Дагъистайзив машгъурси кІарахъала Согъратлила шилизивадси гЯрабла гИлму мурхъли дяркъурси гЯлим ГЯбдуряхІманхЯжи устадли сунечи бекІа гъамбикІули биъниличила багъурхЕли, хъунуйзи аманатбарилри уили сай: «Ну вебкІнила хабар аргъибхЕли, Мугрила шилизивад ХизрихЯжи алхІям белчІес лявкъян. Ил вакІибхЕли хІуни илис дила сагаси хЯбсур пешкешбара. Мура аманат саби или бура. ХЯбсур бедлугухЕли, хъуммартид илала ца кисализиб нуни сунечи белкІунси кагъар лебниличилара бурес...»

ГЯбдуряхІманхЯжи устад ас-Сугъурила хъунуй мура аманат бетерхахъурли руили сари: мугран ХизрихЯжизи ил баягъи хЯбсур бедили сари, илала кисализибси кагъарличилара гъанбушили сари. Хъули чарулхъухЕли, гъуйчиб ХизрихЯжини ил кагъар белчІи сай: «ХІурматла Хизри – мугран Муртаза-гЯлила урши, Къудратла вегІ Аллагъли набзи ахиратлизи гъуни буцахъили сай. Гъамли нуни иш хІулилипІла дунъя балтас. ВахъхІи пикриикІули кали гІергъи дила устаддеш хъардареси хІуван лайикъси адам хІергира. Дуца илди хІуни ва адатас мурталра къуллукъличив ви...»

Илала гІергъи верхЕл дус ил кагъарличила ХизрихЯжини чизилра селра бурили уили ахІен. ВерхЕл дус дикибхЕли, сунечи алавти шимала гЯлимти ва делчІунти адамти бучили, мавлид барилри уили сай, ва илаб ил кагъарра илдази белчІахъи сай...

Сергокъалализив хІериули вири халкъли халаси хІурмат бируси Мугрила шилизивадси ГЯбайла ГЯбдулкъадир. ХІера сегъуна хабар бурусирил илини ХизрихЯжи устадличила:

– Хизри устад хЯжлизи аркъухЕли, иличил барх зияратли дурабухъунти КичихІямрибад, ХІурехъибад, УбяхІ МулебкІибад, Мургукибад ва цархІилти шимазибад адамти буили саби. Гъуйчир гъар дехІибала дирухЕли илдани дехІибайс гъала имамли мугран ХизрихЯжи устад калтули буили саби. Ирайзи букъес ХЯштархайзиб гамиличи кабибси замана илдазивад ца викІули сай: «Мургукан Хизрини Къуръан уркІиличиб бала бикІулигу, бархъсира?» КИ-эсил викІули сай: «Иличи вирхаэс гъамадси ахІен...» ХЯбэсиллира бурили сай: «Дахъ кункли гъаймадикІудая, Къуръан уркІиличиб хІебалалри, илгъуна хабар хІебирину». Баягъи цабилли мургукан Хизризи или сай: «Гъари, Хизри, пулан аятличивад вехІихъи...» ГІелавяхІ шуряхъили, Хизрини или сай: «Гъандуца, уртахъ, хІу викІуси аятличи каибхЕли ахъли учІусну». ГЯхІцад замана дикили гІергъи, мургукан Хизрини багъахъурли сай: «Гъанна лехІиди-

зирая, баягъи аятличи каилрану...» ва жагаси, ахъси тІамаличил ил белчІи сай. ИлхІели мугран Хизри устад гъамиубли мургукан Хизриси викІули сай: «ХІу набчивад чевверхи, Къуръан гІела кабихъили, ну дехІибайс гъала калзни багъандан. Гъанна нуни дила ил хатІа гъарбирулра, гъаннала гІергъи дехІибайс хІу имамли гъала калзад...». ХІера илгъуна, бархъдеш дигуси, халахІерхуси, сунела хатІаличи жявли мукІурикІуси адам уили сай нушала устад ХизриХІяжи.

МяхІячкъалализибси исламла университетла проректорли узуси диъ-букІан МяхІяммадхІяжи устадла урши МяхІяммадимин устадла урши МяхІяммадхІяжинира ишкъяйда бурусири:

– Мугран ХизриХІяжи устад хІяжлизивад чарулхъухІели, дила хала дудеш МяхІяммадхІяжи илис гъала вякъунси сай. Ил сунес гъала вакІниличи разивиубси ХизриХІяжи устадла, илала някъра цацабарили, кІапІра икили гІергъи, илизи бурили сай: «ХІу устадунала тайпала урши сайри. Аммаки ишбархІиличирад дила устаддеш хІечи аманатдирулра. Къабулдара ва адамтас къуллукъличи кайзи...»

ХизриХІяжи устадла хІябла мякълаб зияратли бакІибти адамти хъурабирахъес мугрантани гІашбатурли жагали балкъаахъурси гъарзаси ва шаласи хъали леб. Зияратли бакибтас хурегуни дирес ва къацІли букахъес хасбарибси хъалира леб. Илав хІерирули ва зияратли бакІибти къабулбирули халаси баркаллаличи лайикъси хІянчи бирули сай Мугрила шилизивадси гІяраблара делчІунси ва устадла гъуйчивад чевхІелкІи вашуси пергер муъмин адам Къурбан Маноповли. Зияратли башути адамтас гІяхІти шуртІри гІердучесра илини халаси гъаза бирули сай. Ил районна администрацияла бекІ МяхІяммад ГІямаровличи дугъайзур Буркъа Мугри аркъуси гъуни къулайси агиличи бушахъес кумекбарахъес. Гъундури бульдозерли гъярдарили, къулайси агиличи душили сари. Устадла хІябличи зияратли бакІибти къабулбирниличи хІядурдеш барилри.

Шуйхри-устадуназирти караматдешличила тамашала хабурти дурули бирар. Устадлис ва шайхлис сеннира караматчили виэс чеблибиубси хІебиаллира. Ил тІабигІятли бедлугуси пагъму саби – секІал гъалахили бални. Аллагъли караматдеш дедибтира илдазиб буили саби. Караматдеш лерли дуили сари ХизриХІяжи устадлизирра. Илини сай мицІирли левай бурили уили сай «мугрантани чула ши бархъбалтниличила ва гІур сагали илизи чарбирниличила».

Гъайагарли ХизриХІяжи устад сихІрукъя уили сай. Тамашала хабар бурули бирар илини диркъаличивси зулмукар Амирчупан кункли бушинварниличила. ЦархІилти устадуни Амирчупайчи абацІесалра бирули буили ахІен. ХизриХІяжи биалли камси заманала гІергъи иличивад «къуллукъ бекІбарира» или дуравхъи уили сай. Сунела хъунуй Амирчупан тамай хІялагариубли варгили руили сари. «ВецІну кІира шила хужаимли сайси хІечи вайлиулра ахІейуси тавлуни илцад асар секъяйда барес виубси?» рикІули руили сари ил муруйзи. «ХІу набзи илкъяйда хІерикІади, итала хъуцІрумачирад набчи тІяхІдашути арслан-къаплантис чедаили риадри», – бурили сай Амирчупай хъунуйзи.

Гъачамра Ахъушаб устадуни-гІялимти мажлисличи цалабикили буили

саби. Лебилра лебли саби, чІянкІли ХизрихІяжи кІаниубли уили сай. Хизри агарлира мажлис бехІбирхъехІе бикІути лебли буили саби. Ахъушан ГІялихІяжи-устад викІули сай илхІели: «БиштІал шила халаси шури шишбарес набзиб ахъри агарану, ХизрихІяжи вакІайчи тІашдилзехІе».

ГІачамра Мургукла шила гумаилизиб жал бемжурли буили саби «Мугран ХизрихІяжини дигІянаси секІалра бала-хІебала» или. Илдани ца жагІили дурхІя Мугри вархІили буили саби ХизрихІяжизибад «ца кІуруш га» барахъес. Мугра ваили, ил жагІили Хизрила юрт баргили сай. ХизрихІяжи хъулив кІаршиикили ахІен. «Устад мижитлав сайну, рякІи левкис, хІуни ишаб бамсриахъа», - рикІули сари устадла хъунул. Мижитлизи рякІи, вакІибси гІяхІяйчила бурибхІели, ХизрихІяжи устад викІули сай: «Ил ца кІурушличи вакІибси сайну, тахличибси гІяна удибад касили, илис кІуруш беда» или, хъунул хъули рархІили сай устадли. Ца кІурушра сайра жагІил адам Мургуки чарухІи сай ва гумаилабтази сунес бетурси бурили сай.

МулебкІантазибад ХизрихІяжи устадличила ишгІуна хабарра аргъес вирар. КІел хІурматла мулебкІан гІабза цаличи ца гІимбукІили буили саби. Илди даршубарахъес ХизрихІяжи устад живарахъес жагІил адам вархІили буили саби. Ишдира кисализирли устадличи укъес балхІебиркур или, жагІили сунела танбакула кисара цІадирхъра кІадубазибси ца кІаркІала уди дигІяндарили уили сай, гІелавяхІ чарулхъухІели кайсис или. МулебкІай танбакура цІадирхъра дигІяндарибси мерличи баибхІели, илди кІелра, гІаббуцили урчира сабира, бархІи башули буили саби, ва жагІилис сунела матяхІ касес бетатурли буили ахІен. ГІяхІцад гІуни ахІибхІели, ХизрихІяжи илизи викІули сай: «Чарину, хІуни ит кІаркІалиу дигІяндарибти танбакула кисара цІадирхъра каса». Илди гІунти хабурти дебали дахІал лерти сари.

Мурегала мер-мусаличбси Сагаси Мугрила шилизивад БуркІа Мугрила шилизи чарухъес вализурси Расул КІурбанов ила чарухъахъес хІелтули чумал дус калунсири. Амма ахирра илис чарухъахъес пурбанбариб. Илини юртра тІашбатур ва гІяхІцад дусмазив илав хІерирули калун. УхІнаваили вяшикІес кІяянбулхъухІели сайри ил СергокІалализи гечиз кІабуликибси. Дудешли Мугрила мерличиб тІашбатурси юртлизив илала урши КІурбан хІерирули сай. Илала урчала илхІира цадахІал хала хІяйвантира лер. Илра дебали бузери дигуси адам сай. ЧІумаси хъубзарла хозяйство леб илала. Адамтала ургавра дебали валикибси адам сай Расулла урши КІурбан.

БагІадур адамти саби мугранти. Илдани гІятІбиълумачи шурбухъунси чула шилизбси мижит сагабариб. Илар хъулри дарес балбизуртира леб. Чула бегІтала юртани сагадирес бехІибхІибти леб. ЧІянкІли ила аркІуси гІуни кІулайси агиличи бушес хІяжатбиркур. Адамтала арадешлис иларти тІабигІятла шуртІри диркІаличирван ахІи, имІцали далдикибти сари. СирагІиб беркІибси ца бархІи нунира шагІарлизиб беркІибси жумягІличиб гІалаб чебиули вирус, илцадра гІямруличи гІав имІцабирахъу ВацІа-хІярлизбси зархІси гІавали ва иларти ГІинзурбала шинни.

ХалкІ мицІирли лебалцадхІи, чула ши цІурІали батес балбикили хІебирар. Даршал дусличибра имІцали гІалаб ХизрихІяжи устадли бурибси бетасгу или хъулбикІути мугранти-ургаб бархІиличи бархІи имІцабикІули саби. МяхІяммад идбагла кІамлизибадти адамти хІербирули калунси КІаракІуреш сагабирулигу гІанна. Нушала аслу-мина нана хІуливан мяхІкамли дихІес

чебиркур, чеабиуси наслулизирра хала-бегІтала мер-мусаличи диги адикъес багъандан.

ХизрихІяжи устад вебкІибхІейчирад даршал дус дикнилис багъишлабарибси мавлид бетерхур иш дусла июльла І4-личиб. Дугили кам-гъамти забра дарили, гІергъила бархІи савлиличибад Мугрила ши-алавси тІабигІят умубиэс базибсигъуна тяхІяр сабри. Ши-алавчарти мер-муса суратдарибтиван жагали чедиулри. Зияратличи жявливан музабухъунтани ши-алавчарти мер-мусаличир дерхъибти чяй дирути ва дармандирути къарани дурчулри. БегІ гъалаб Мугрила шилизи бакІибти биалли иларти жагати тІабигІятла мер-мусаличи хІербикІули тамашабирулри. Дирсибти къаркъализирад дарибти юрганала гъятІбиълумани хІербикІутачи халаси асар бирулри.

Дурхъаси устадла хІурматбарес адамти савлиличибад башес бехІибхъиб. Зиярат лебси мерличи аркъути адамти хІеркІван сабри. Илдала ургаб Мурегабад, Губданибад, Меръакибад, ДиъбукІибад, Парауллизібад ва дахъал цархІилти шимазибадти адамти лебри. Рахлира аги вацІли музавхъунсира: илдани мавлидличи бакІибтас помидорти, вякъни, курега, бягІли, къурчи, бананти хилри. Чилирил автомашиналичиб кибси кигъа ванзаличи кабицІахъулри. Устадла гъамта ва мугранта дурхъаси устадла хІурматбарес бакІибтас гІяхІти гІяхІялдеш дариб: халаси хІяйван белгъи хурег балкъаахъурлири. ГІяхІлас гІяхІти хурегуни далкъаахъес бажардикиб Каспийск шагъарлизив хІерируси мугран хурегунала урибси уста МукъмахІяммад КъурбанхІяжиев.

ГІяхІлас разили гъунивиулри, ва илди разили къабулбирулри устадла зияратличи хІеруди бируси багъадур адам Къурбан Манатовлира.

Бахъалгъунти автомашинабачиб бакІилри. Марлирагу, ит бархІи илар даршани автомашинаби ва маршруткаби лерри. Лебри хъурали бакІибтира. ХІяна муцІуртала бегІти бухънабира лебри илдала ургаб, хъунул адамтира, бахъал лебри жагъилти. Зиярат-алавти мер-муса гарчли дицІиб. ИлхІели бахъал адамти хІябрала чедибси вава-къарли бертурси майдайчи кабииб.

Цалабикибтала гъалаб динна агълула вакилти гъайбухъун. Балга-дугІя дариб. Мавлид белчІун. Музабухъунтачи хаслира халаси асар бирулри ХизрихІяжи устадла гІямруличила дурути хабургани. Муршид ГІябдуллагъхІяжила тулкни делчІун жагаси тІамала бегІти нашидунани. ЛехІихъутала ургаб тулкили барибси асарли нургъби дурадикахъибтира камли ахІенри. РухІла дунъя умубирнилис катарсис бикІар. Ил бархІи илаб ил хІяйчи бикибти дебали бахъал лебри. Гъанналис даршал дус гъалав вебкІибси дурхъаси муъмин адамти сегъуна асар барибал ила бакІибти бусурман адамтачи! Чумилра районна халати ва диштІати шимазибад бакІибти лебри илаб. Чумал адам музабухъири унраличибси Чечнялизібад булан.

Мавлидличи вацІли музаухъунсира левсигъуна ахІенри: бахъли зияратличи бакІибтас помидорти, вякъни, курега, къурчи ва цархІилти цІедеш хилри. Чилирил автомашиналичибад садакъалис кибси кигъа кабицІахъулри. Устадла гъамтани ва мугрантани гІяхІти гІяхІялдеш дариб. Савли жявли хала хІяйван белгъун. Балга-дугІя тамандиубли гІергъи, гІяхІли хурегли бахун.

Къянасирагъила шилизивадси дина агълулизивадси ГІябдусаламлира унра шилизивадси устадлис багъишлабарибси «ХизрихІяжи устад мубарак» бикІуси пергер тулки белкІунсири, ил вебкІибхІели децІлизи викили. Нушачи илини белкІунси шурли бячІунти рурсбачилара пергер назму баили саби. Амма ил сунечила нушачи дебали камти баянти сари даибти. Илини ХизрихІяжи устадлис белкІунси тулкилизир ишдигъунти уркІилизи алтІути тугъи лер:

**Къяба Дарго, Хайдакъ, Диркъа хІакибли
ТІагІятлики хъарихъани таманни,
Тавба даркъиб бунагъуни датулли,
Аман дад, аман ХизрихІяжи устад.**

**ХІу сайри авлияуназив мухтар,
ХІала саби муъминтас халал асар,
Гъар мерла даиб хІала вягІза-хабар,
Аман дад, аман ХизрихІяжи устад.**

**Сипайда хІабагъулли хІала къадри,
ХІу сайри гІяламлис Лайлатул къадри,
Нагагъ багъалли халкъли хІала агри,
Аман дад, аман ХизрихІяжи устад.**

**ХІу сайри Дагъистан шалабаркъибил,
РабитІа тІарикъат халкълис дутІибил,
Гъапулти уркіби кирсаргъихъибил,
Аман дад, аман ХизрихІяжи устад.**

Дурхъаси устадла рухІла дунъяла давлаличила гІур имціали саркъахъили мажахІят бурес виэс.

ХизрихІяжи устадли Накъшибандила тІарикъат Дагъистайзиб тІинтІ-бирахънилизи бурес агарли халаси пай кабихъиб. Сунела заманала динна гІялимтанира иличила балахъусири.

ХизрихІяжи устадла букъуртачила се буриша? Илала уршила урши МяхІяммад Багъаудинов Киевлизив хІериусири, чумал дус гъалав вебкіб. Украинализиб хІербирули илала кІел рурси теб. ХизрихІяжи устадла рурсила урши ГІябдулагъ Сергокъалализив цулбала тухтурли узули вири, илра ахиратла хъули арякъи чумал дус вирули сай. Илала авал урши леб Сергокъалализиб хІербирули. Дурхъаси устадла тухумдеш детиути гІурра гІяхІцад адамти леб. Лебилра илдачи дурхъаси устадла баракат чебетаили саби – лебилра кабизалачебти, хІурматла адамти саби, чулира саби дурхъаси устадла тухумти биъниличила хъумхІертутти, гІяхІти баркъудлумачил декІарбулхъути ва адамтала ургаб балкабикибти.

Ил бархІи мавлидличибад хъули чарбухъес хІядурбиубти адамтачи хІерикІухІели багъеслири илдала рухІличи Мугриб дураберкібси балбуцли секъяйдали халаси асар барилил. Илдала дяхІличир нур алкунтигъунти сарри.

ТІабигІятлизир гъар секІал цаличил ца уржили дархдасунти дуили сари. Илгъуна пергер балбуц дураберкіниличи тІабигІят булан разибиубсигъунари: балбуц таманбиубмад къукъуличилти хъярхъти заб дариб ва алавчарси дунъя бирцибсиван кабизахъур.

Тавсултан СЯГИДОВ,



Нушачиб гяхлагли

Жаракъала поэт Максуд Зайналадидовлис - 80 дус



Д Я В Т И

(поэмализирад бутІни)

...Дагъистайчи чили някъ ахъбуцалра,
Келра някъ агарли кавлан ил кІарза.
ХІези бархъдеш буру къантІли тарихли,
ТІутІукъякъварибал душман чуйнара...

Цадеш ва узидеш дубурлантала,
Дехъес бируси цІакъ биубси ахІен!
Назикти ахІенну чІигІяван хІеркІла,
ЧеряхІти сарину БерхІиван гІяршла!

БЕХІБИХЪУД

Ахъбии, шурмар ВатІан,
ХІядурбии дургъбачи,
Гъаргълину хІила душман
ХІела азадешличи.

Ахъдирая бегІти,
Ахъдирая дурхІни,
ХІушала улгуличи
ХъусдитІину чІичІлуми.

Хъунри, рурсби, биштІати,
Бурсидия иртес.
Лебтачиб чебси саби
ВегІла ВатІан батахъес.

Душмайчи гъмилилизир
Дебшладарая уркІби,
ЧІакала дурхІнаниван
Дяркъес гІягІнити дурсри...

Ансалтилан хъяганаг
Виаб хІушаб гІибратли,
Гъамиахъес хІетурси
Душман унабурхІличи...

ДелчІена хІекъти тарих,
Петрла заманала.
ГІярасайличи даим
КарцІсири Виктория...

ГягИнилив ревизия
Чи саррал, чинадтирал?!
«ДугІла дивизияличиб»
ЛапІбухъун хІунтІен байрахъ!

Дургъбазив фашистуна
ГязабуркІуси сагІят,
Гябдулманановли иб:
Сайра урусла солдат!

Дагъиста дибГя шими
Цали адалкунХели,
Дишес музаухъунси
Гярасайлан солдатри!

Ва чебяхІси Гярасай,
Мургалра духусири.

Дуньяла улкни ургаб
Гякълули ухусири!

УркИилис къабурли сар
Дакъес узидешла гъай,
ХІела саби Дагъистан
Дила дурхъал, Гярасай!

Ахъдия лерилра
ДурхІни дубурлантала,
Батахъес душмантази
Ванза дудешунала.

Гядатла дубурланти
АхІенра нуша гъанна,
ВатІан гъанни дургъути
ДурхІнира Гярасайла!

...Н О В О Л А К

ЖихІебариб хІяжарти
БакІиб Новолаклизе,
Цукла гІебниван хъулри
ГІеладушиб цІализе.

Ужагълар декла цІаван
Къакъурби демжурли сар,
Чедиберхур урхъуван
Цала океан рурхъяр...

Вавна дерхъиб дукъбачир
Кадухъун хІила хІуркІби,
Даршути дубуртачир
КІухдухъун душа тупи.

Къалаван кабизурли
Саб кІялГя РОВД-ла
Дубурлантачил бархли
Саб уршби Гярасайла,

Дарх дурцулри илдани
ИмтихІян кахси дявла,
Илди къирбарес къасри
Илбис-нажасунала!

Батахъес бакІибтири
Душмантази Дагъистан,
Гярасайла батирти –
Липецклизибад ОМОН.

Бяхъибтас кумекбарес
Илди музабулхъулри,
РОВД-ла хъулрази
Къаркълума ардикулри...

Дубурла паргъатси ши
Жагъаннаб аурлири,
Кахси, царугагарси
Илаб дяв бемжурлири...

ДурхІни дуклабуцили
Абни саби бебшили,
ДурхІни батахъес, бебкІа
Къабулбарес хІядурли.

ХІера, ца къардрикІули
Къагъсиван ратрихъили,
Я хІярхІубала шятІла
Я вявла хІебикъули...

ХИли дясун някъбани
Кавшиб дурхІя авцили,
Бац буркъла цІяб дугиван
Дардлизир сукъур-гІянцІли.

Кавшили сай мурулра,
Игъубли гІямзилабад,
ГІягІнили ахІен селра
Илис гІямрулизибад...

Дагригу ил исбагъи
ТалихІчерси хъунул, неш!
Агъ, кахти хІяжар дургъби,
Агъ, хІушала усалдеш!

Бячунси сягІятванри,
КъутГхІебикІули уркІи,
Къаклаб чекабасири,
Беръубси цІукван, лезми.

Илини чебиуси
Я бикъуси бугаги,
Кусбариб хяван багъси
БекІа гІергъи башулри...

Рерцахъес музабухъун
Омойзибад кІел солдат,
КІелра душма хІярхІуба
Кабикахъиб итсегІят...

ИлхІели кахдешлизир,
Дагъри чардухъунтиван,
ЧІяръиб ахъли, хІякъкъат
Рарглаб баргбердибсиван!

Сунела уршила хІи
ЧяхІдухъири илдачи,
Сунес жан дерцахъибти
ГІярасайла уршбачи.

КІелра бургъанна урга
Кайхъиб абани урши,
РикІули уршбас къадин
Карурхус ну дявлизи!

БекІибтазивад цала
Касиб сунес автомат,

Бугал дис итилилла
Ва хІядурси гранат...

БекІаличи ряхІчили
Ретухъун цІябдешлизи,
Сукъур хІярхІуби далли
Илис шулумдашулри.

Душмайчи черухъунси
Урехи агар чІака,
Ил нушала манзилла
Сарри ПартІу ПатІима!

Илис гІелабад лебил
Арцур атакаличи
РОВД бициб гъубзни,
Каберхур гъазализи...

МаркІачи биули саб,
ГъамбикІули саб дуги,
ГІабигІят, дергъ гІашбизаб
Или булгули саби...

Ишар къаркъа-къаркъара
Душмайчил дарс дургъулри,
Чучил пикри-къас паси
ХІергни душмай аргъилри.

ХІяя детахъиб хури
ГІелабахІбиублири.
Бургъантас гъаррашули
Дубурлан рурси сарри!

Душман хъураварибси
Ца вершала юрт гІашли
Лебалри, буцибтира
Ил юртлизиб лебтири...

Буцибти гъабаили,
Вебшиб душман,пандахъи,
Ишаб ахир сабаиб
Вершалисра увяхІси.

Шури пІякъбикес бири
Иш сурат чебаалри,
Чердушилири букІри
Буцибтала хІяжарта.

Душмайс лягІнатдикІули,
Хи ванали лералри.
Ца – някъби чердушили,
Ватурлири мицІирли.

Хъярхъли чедигъун някъби
ПартІули сараили,
Ил Липецклизивадси
ОМОННа тухтур сайри...

Тухтурлис гъанаур ил
Кумек сарлин Аллагъла,
Пишяхъиб, баркаллала
Изайзивкъи балагъла!

ИлхІели хъунул адам
Черсаргъибсиван риуб.
Бяхъибси уркІилизи
Умут ва цІакъ чардиуб.

Агъ, цІакъ, мурчІван назикси
Хъунул адамлизибси!
Азадешлис дихъалис
Марзла урши кайхъибси!

Шаласира сари ил
БерхІила нураниван.
ХІялалси, пасихІсира
Дурхъаси неш ванзаван...

Шурдатурси- Аминат ХІЯПИЗОВА



Очеркунни

Дагъиста халкъла поэт
Аминат ГІЯБДУЛМАНАПОВА



ЛЕБТАЛАЛРА ДАГЪРИЛИЗИВ КАЛУНСИ

Совет хІукуматла замана гъар адамличила къайгъна биркъули бири. Ил секІалра халал хІякимтазибад дигахъусири. Гъарли-марли вегІла халкъличила, вегІла ВагІайчила пикрибикІути хІякимти бирутири. Дила зилантани гІяхІил бала – узусилис хІукуматли хІербиахъес матъал хъулри лугутири, учІес дигусилис институтуни ва университетуни гъаргтири. Гъанна дунъя барскабиуб, пашкабехъуб ит нушала хабарла улка. Лерилра секІал арцлис детаур, белчІудила къадри камкабиуб, къалпла диплошти имцІадиуб. Гъанна нура дила зилантира ит улка лушантачила гъанбикуназирра ва децІдикІула.

Адамдешла, гъабзадешла къиликълизи халбируси, адамлис халкъли кабалтуси къимат саби, ил хІякимдешлизиwad акъуухъунхІелира ва ахиратлизи арякъунхІелира халкъла пикрумазив, рухІлизив даимлис кални, иличила гІяхІтицун гъанбикуни дурни ва илала агри халкълис бетяхърили бетаяни.

Халаси хІяким лебтасалра дигахъуси хІейалра, хІяким хІякимлицун кахІели, адамлира кали, илдас гъамсили ветаурли, халкъла зугІлумачила балули, дахъал къайгъни дакІудирухІели сай ил гъарли-марли дигахъуси ва иличила хъумхІертуси. Сунечи Дагъистан хъарбарибхІели, ил гъар шайчибад гъалабяхІ арбукъяхъес, илала давла имцІабиахъес, сунезиб хІербирути адамти талихІчебтили бетаяхъес лерилра гІямру харждирули калунси хІякимлис нуша хІялалси адам дикІехІе.

Илгъуна сайри Лавашала районна ЦІудхъурла шилизив акІубси пергер гъабза МяхІяммад-Салам Ильясович Умаханов. ГІярмиялизиб къуллукъ таманбарили, ВагІан багъандан чІумали ургъули калунси ил дургъба, цІализиб шанданван, дебшлавариб.

Гъар чинавалра, цархІилтасра гІибратли ветаурли, улкала хъархІерагардеш датахъес ургъи ил Брянсклизив, Белоруссияла фронтлизив, Прибалтикализив, Польшализив, ахирра илала буйрухъла удиб Рейхстагличи Чедибдешла байрахъ катІун.

Дургъбазив чІумавиубси, гІямрули вет-садвяхъибси ва хабардерхурси илис ахъти къуллукъуначив узес къадарбиуб. – Дагъистайс чумал дус бекІ-деш дирули.

Нуша гЯмрулизир кадиркути тамашала анцІбукьунала бикьрумили дета-рулра. ГЯмрулизибад арбякьунти гЯхІгъубзначила децІдикІулра, челябкьла-личила пикридикІулра. ЦацахІели чЯнкі авлахъличиб дугІба бет-садбирхъ-уси галгаличи мешулира. Гъанналаур диубти далулра, гъай-аман, челябкьла сегъуна биэсара дикІулра.

М.-С.Умаханов гЯмрулизивад арякьунхІейчирад гЯхІцад дусми ардякьун, гЯхІцад хІякимтира барсбиуб. Хъям-къацІлизи гІелабикили, хІелукъути бакІиб. Амма хІялалтачила нушала белкІанира адамтала гъанбикунира ми-цІирти бикьрумиван калун.

Дила дудеш ГЯбдулманап шила парторг вирусире. Бархъдеш дигуси, шилтахъ бируси хІелтуси, вай барибси танбихІлаирусире адамри ил. Илди сабри коммунистуни. Илгъуна сайри партияла Дагъиста Обкомла цаибил секретарь Умахановра.

М.-С.Умахановличила чула пикруми делкІун сунечил барх бузули калунти даршалцад адамли, ил гЯхІил валутани, унраличиб хІербирули калунтани.

ИтхІели ну ДГПУ-ла студентка рирусире. Дубурла шимазирад дакІибти нуша уржили хІердирутири. Ца миллат итиллайчиб чебяхІси саби дикІути ахІенри, хІу чиди миллатла вакилри или хъарбиуси ахІенри. Миллатуни ур-жахъуси политикара дурабуркІусире. Леблисалра дучІес, дузес имканти дири.

Дагъиста халкьла поэт Хизгил Авшалумовла белкІлизиб дила хІер тІашбизур: «ЦІудхъурла шиличила очерк белкІунсире, ца ухънала хабар-лизибад масхарара имцІабарибсире. Давлачевсила рурсиличи илала букьур гЯшикьибсире. Илдачи чекайзурси дудешли къадагъабарибсире илди гъайбикІахъес, къаршибиркахъес. ИлхІели жагъилти гъаббухъунтири ва «ЦІудахар» (турк мезли) «Суахар» (Шин дашан) мерличиб хІербирутири. ИлхІейчибад илдала шилис ЦІудахъар бихъибсире. Ил белкІ белкІунси илдала цашанни ну вагІунра ва М.-С.Умахановлизи гЯрзухъун. Ну Умахановличи вя-кьунхІели, илкІун нуни белкІунси ца ухънала хабар сабри, се вайси белкІирал балули ахІенра ира. Умаханов дукаряхІиб. «Селра вайси агара, хІела лерилра белкІани дучІулра, гІурра лукІен, лерилра дикьурти сари. ХІед хІяжатбикибси леб биалли, урузмакІуд, дугъаилзен», – буриб илини.

ГЯдатла, духуси, гъар секІайчи чекайзурси адам сайри ил. Илини гЯхІил гІеббурцусире искусство, районтазир ва хъарахъуназир литературала бай-румти, концертуни дурадуркІутири. УркІичеббирахъутири писателти, бучІантачил илдала бархбасуни диахъес мурталра махикІусире. Бусурманта-лара урусуналара бархбасуни, уржибти гъалмагъдеш калахъести далдуцуни гъаладирхъутири. Дургъбала игитунас, хІурматла адамтас памятникуни ди-рахъесра хъарбаркьуни дедлугусире, илди тІашдалтути мер-мусаличи сайра вашусире ва гІевугъусире.

Советское къакъализибси халаси юртлизив бахъал цархІилти сунечил барх бузути хІянчизартачил секциялизив хІерирусире. Илини, цацабехІ хІя-кимтаниван сай вегІти кІялгІни тІашхІедатур. УрхІлисгъуна сунесра баибси юртлизив хІерирули калун.

Ца унрала гъанбикуназибад: «Нушала юртлизив ца адам вебкІиб, илала децІ барес шагъарлизибад бахъал адамти музабулхъулри. Тамашабирутири

илди адамти кабирахъес гъаргала кадихъибти скамейкабачив М.-С. Умахановра чейухъели. Чумал бархъи илра ила тIашилзи ва балга бири, гIур ил вебIибсила гIелабтас сегъуна кумек гIягIнисил хъарикIи».

Тяп илкъяйда чекайзурли илини цахIнаб Дагъистайсра халаси къуллукъ бариб.

Илдигъунти бузес хIебумсути, халкъла давла балтахъути, абадла-абад чула къел-хIерзи дунъяличир хIедуэсти, Дагъиста давлализи халбарести адамтачила чеалIуси наслулира багъес чебиркур. Школабала жузазира иличила лукIалри гIяхIсири.

Дубурланта бурала лебси саби: «Кайзурси адамли юрт тIашбатес, галга убатес ва дурхIни абикъес хIяжатси саби» ибси. Илди секIал тамандариб Дагъистайзивцунра ахIи, арагIебли улкализивра машгъурси политикала-жамигIятла хIяракатчи Умаханов МяхIяммад-Саламовлира.

МяхIяммад-Салам Умахановличила, илала бузериличила, адамдешличила, сунела тухум-агълулицун ахIи, чеалIуси наслулира багъурли дигула. Чули пахрубарести, саби илдачи мешубуцести адамти буилигу бикIесли. Сепайда, дахъал далхIедикибти анцIбукъунира къаршидиркули сари. Гъари итхIелла бяркъ лебти пионерти, комсомолецунни, коммунистунни.

Гъар адамличи хъарсири, сунечилацун ахIи, адамтачила, бегIтачила, ун-рубачила, ВагIайчила, бухънабачила къайгъни дакIудирес.


Гъар белчIудила дуслу ахирличир нуша декIар-декIарти районтази дурхъутири совхозуназир, колхозуназир, консервобала заводуназир хIянчили диркъахъес. Баркаллара багъахъурли, нушаб алапара гили, дурхъутири.

ИшбархIила даража итхIели гъанра биркуси ахIенри, арцлис къуллукъуни исути ахIенри. Гъарли-марти, кабизурти, дагъричебти, духути адамти бири къуллукъличи кабалтути.

Бурес дигула, М.-С. Умахановли сунела дагърира, къуватра, къасра ца-дарили дахъал дусмазив республикала Министртала Советла Председатель виубли, кIинайс КПСС-ла Дагъиста Обкомла секретаръла къуллукъличив узули, халкъ гIяхIцад гъалабяхI арбукес виуб. Илкъяйдали сунела дагъри пайдаладарили гъала хили гъар секIайс къимат кабатес ва сунела буйрухъли-ур сархибдешуни диахъес бажардикиб. МяхIячкъалализир, Къизларлизир, Дербентлизир хъулри дирути комбинатуни акIахъубли, юртани лушнила хIянчи сакIахъуб ва гIядатла адамтас матъал хIербиахъес хъулри тIашдатур.

Илала бекIдешла удиб Дагъиста экономика гъалабяхI башес бехIбихъиб.





**МяхІяммад
ТАХСУРМАНОВ**

РАЙОН АХЪБАРИБСИ

ХІяпизов НурбахІянд гъаниркахъули

*Халкълис гІяхІдешилс узни –
хІера, ил саби гІелайзи арбухес
асухІебурси.*

В. Гюго

Леб мурталра халкълис гІяхІдеш биахъес, илди хІянчиличил гІеббуцес, илдала яшавла шуртІри ункъдиахъес, улкалис, халкълис манпагІятли бузес гъирали бицІибти, духути, бекІдеш дирнила устадеш чузир лерти руководители.

Илдигъунтазивад сайри Лавашала районнис 12 дус (1997-2009) бекІдеш дарили, гІелакабухъунси район гъалартала къяянази дураибси гъабза ХІяпизов НурбахІянд.

Илини тамашала бузерила гъуни ахъиб: бехІбихъудла ва чедирти классунала учитель, школала завуч, директор, районна учительтала профсоюзла председател, Лавашала районна багъудила управлениела начальник, районна бекІ.

Илди бузерила ганзухъуни НурбахІяндли секъяйда ахъибал тІинтІли бурес чебиркур.

ХІяпизов НурбахІянд акІубси сай Лавашала районна МикІхІила шилизив 1938 ибил дуслизив учитель НурбахІяндов ХІяпизла хъалибарглизив.

Илини 1957 ибил дуслизиб МикІхІила урга даражала школа ункъли таманбариб. Дудешла санигІят чеббикІили, Сергокъалала педучилищелизи керхур ва 1960 ибил дуслизиб ил таманбариб.

Лавашала райОНО-ли ил Къакъамахъила школализи бехІбихъудла классунала учительли узахъес вархъиб. Школализив узули, илини учительтала, дурхІнала бегІтала бирхауди марбариб ва хІурмат жявли сархиб.

ЧеббикІибси санигІят марбарес ил дуги-хІери, къиян-жапа хІеили, чекай-зурли ва жавабкардешличил узиб.

БелчІудила ва бяркъла шайчирти сархибдешуни багъандан ил школала дирекцияли ва райОНО-ли чуйнара шабагъатлавариб.

Сунела багъуди чебицахъес багъандан, НурбяхІянд заочно ДГУ-ла математический факультетлизи керхур ва 1972 ибил дуслизиб ил таманбариб.

Учительла санигІятличи мурхъти диги, узес иштяхІ-гъира пикрилизи касили, Лавашала халкъла багъудила отделли ил Къакъамахъила урга даражала школала директорла къуллукъличи катур.

«Школа районнизиб цаибил мерличиб биахъес, цархІилтас гІибратли биахъес ва школала дураб бируси хІянчи ахъси даражаличиб дураберкІес илини мягІничерти суалти сунела ва коллективла гъала тІашдатур.

ДегІес багъалли, дусли хІяйна хъу духъар, бикІар. Ил халкъла пасихІси бурала ХІяпизовли сунела хІянчила хъулчилизи кабахъиб.

Цаибилгъуна пикри школалис сагаси юрт бирниличи бяхІчаиб, сенахІенну ил гъятІбиэс хІядурси юртлизиб мерлабиублири.

Ит замана школа барахъес дахъал къиян-жапа чекасес, дахъал гунзри кацІес, хІякимтала дахъал унзурби ахъес чевкъусири.

Вамсниагарли, республикала хала хІякимтачи вашули, школа лушни планнизи кабикахъес, проектла-сметала документуни дарахъес бажардиикиб.

Директорла дахъал къайгъни-хІяракатла гІяхІдешли 1976 ибил дуслизиб школалис юрт тІашбатур.

Сагаси школализир НурбяхІянд ХІяпизовичли учительтас, бучІантас, технический хІянчизартас гІягІнити лерилра шуртІри акІахъуб: предметный кабинетуни, библиотека, жура-журала спортла секцияби, художественная самодеятельность, парнойличилси хІямам (ил районна цалра школализиб лебси ахІенри).

Школа сагати ваяхІличил, кабинетуни белчІудила гІягІниахълумачил гІердуциб, школала мякълаб ВатІан багъандан жан къурбандарибтас памятник тІашбатур.

Къакъамахъила школала бучІантани районна ва республикала олимпиадабачир гъаларти мерани дурцутири, художественная самодеятельность районна школала абзаназиб гъар дус чедибиркусири. Ил школала мушлукъябанира районнизиб ва республикализир цаибти мерани дурцутири.

Къакъамахъила школала халати сархибдешуни Лавашала райОНО-ли, республикала гъуни чебиахъути органтани чихъли къиматладариб.

Масала, ил школалис районна ва республикала гъуни чебиахъути учреждениебани 50 хІурматла грамота, 30 кубок ва цархІилти къиматчерти савгъатуни дедиб.

Къакъамахъила школализи мурт укъялра, илар жагадеш, умудеш, ряхІятдеш, вакІибсила уркІи разибарести тяхІяр-къяйда дири.

Гъарил хІянчизар сунела мерличив чеветаили вири.



Ил – НурбяхІянд дуги-хІери хІеили, бекІлис бамсри, кыашмас паргъатдеш хІебедили, узнила резултат сабри.

Илкыяйда узули, Кыакыамахыла школалис 17 дус бекІдеш дариб илини.

Иличиб халаси хІурмат адамлис гІур се бизса?! Ил кымат арцличибра дурхъаси саби. Ил кыматла битІакІ умцес хІейрар.

Ил секІал пикрилизи касили НурбяхІянд ХІяпизов районна халкыла багъудила управлениела начальникли катур.

Сегъуна хІянчиличи катурли хыалли, НурбяхІянд ХІяпизович гыачамалра кыардхІевхъун.

Управлениела сагаси начальникли гІелакабухъунси Лавашала багъудила отдел гыаларти кыянази дураэс кыасбариб.

Ил кыасли НурбяхІяндлизи гыанкІагар дугурбира бамсниагар бурхІнира деркІахыб, лугІагар гыундурира ахъахыб. ДекІар-декІарти хІякимтачи вашес, илдази ит-иш бихая или тиладиикІес чевкъулри.

Гыалаб школабала директорти, дурсри датурли, школабас гІягІнидиркути ваяхІ асес Дагъиста шагъуртазиб чумал бархІи кыяйцІбикІутири. Ил секІал пикрилизи касили, НурбяхІянд ХІяпизовичли райцентрлизиб ХЭЖ (Хозяйственно-эксплуатационная контора) акІахыб. Дагъиста шагъуртазирад шиферти, уркыли, унза-улкыай, фанерала ва картонна уркыли, плитаби, хъулри ванадирути батареяби, классла доскаби, шкафуни, стол-утни, бадруми, буш-кули, учебникуни, художественная ва методическая литература ва цархІилти хІяжатдиркути ваяхІ дихутири. Илди районна школабас чула тІалабуни хІясибли деддугутири.

Ил школабала директортас халаси гІяхІдеш сабри НурбяхІяндли бируси. Школаби гыар се-секІайзир гІердуцес, белчІудила ва бяркыла хІянчи ахъси даражаличи бикахъес, школала дураб бируси хІянчи программала тІалабуначил балбикахъес Лавашала районна багъудила управление дегІла гыаларти хІябла лугІилизиб биахъес ибти пикрумани я дугели я хІерели паргъатдеш лугули ахІенри. Илдани чеимцІати цІакъани, устадеш тІалабдирулри. Илди ХІяпизовлизир лерри.

Управлениела начальникли узуси замана НурбяхІяндли Сулайбакентлизиб – гехІел дусла, Тахзиркентлизиб – бехІбихъудла школаби, Кутишала урга даражала школализир – 6 класслис, Кыакыамахыла школализир – 3 класслис, КыулецІмала школализир – 2 класслис сагати хъулри дарахыб.

Кутишала, Кыуппала, Няскентла, УхІлила, МикІхІила урга даражала школабас спортзалани, КыулецІмаб – садик, Наскентла, ЦІухтала, ЭбдалагІяяла, УбяхІ ЧІугІлила школабазир столоваябас хъулри, Лавашаб – 280 мерличилси ясли-садик, МикІхІила, Лавашала, Хажаламахыла шимазир – спортла школаби дарахыб.

Илкыяйда, Дагъиста багъудила Министерстволар харжанас Урмаб 380 мерличилси, Хыарлябхъуб 280 мерличилси, МикІхІиб 365 мерличилси, ГІяялахыяблаб 265 мерличилси кІидерхІла школаби дарахыб, районна школабазир, ясли-садикуназир дарибти дибгІян-хыяшти хІянчи гыанхІедушалра.

Марлира, экономика мискинбиубси замана илди стройкаби дахыал сари.

Сунела хІянчи гыар шайчибад чебетаахыли бирнила лишан саби, вамсниагарси бузерила гыунар саби ил.

НурбяхІянд ХІяпизович начальникли узуси замана (1985-1997) бархибси, жапаси замана сабри.

ХІяпизовлис заманала кьялшубаув калес хІейгахъи. Заманала кьячІа кьяшмази ганзикІули вашусири ил.

Илини МикІхІила, Къакъамахъила, Лавашала, Наскентла, ЦІудхъурла, Кутишала, УхІлила урга даражала школабазир компютертала классуни далкъаахъур.

Илкъяйдали, начальникли халаси пикри бяхІчаиб районна школабазир художественная самодеятельностьла бузери лайикъси даражаличи, программала тІалабуначи бушес, предметуни хІясибли олимпиадаби заманала тІалабунала даражаличир дихъес, физкультурала ва спортла хІянчи ахъси даражаличиб бихъес. Сайра спортсмен ва тренер сайхІели, НурбяхІяндлис спорт дебели дигахъи. Ил управлениела начальникли виайчи районнизир 4 спортзал сарри лерти. НурбяхІяндли илди 18-лича адикахъиб.

Спортла хІянчи ахъси даражаличиб биънилиси бикъридеш дирули сари Шамилкъалализиб сархибси халаси чедибдешли.

Гъар дус Шамилкъалализир дурадуркІути республикала районти-ургарти «Шамилла шушка» бикІути фестивалтачир Лавашала районна командабани гъар-Гергъили хІяйна цаибти мерани дуциб.

«НурбяхІянд ХІяпизовичли нушаб цаибил мер биркахъуси ахІен», – бикІутири ила бакІибти багъудила управлениебала начальникуни.

НурбяхІянд ХІяпизовли Лавашала районна багъудила управление гъаркъя-тала кьяянази дураиб. Илгъуна саби гъарли-марси бузерила гъунар!

Ил гъала-гъала банкиртачил, бизнесментачил, саби бегІти предприятиебала руководителтачил, баркъудила адамтачил ва цархІилти давлачебти адамтачил тянишири. НурбяхІянд районнизив ва районна дурав халаси хІурмат лебси адам сайри.

Гур илдачи – руководителтачи кагъурти делкІи, 17 миллион къуруш дучиб. Ил фондла пай бахълис баахъиб.

Илди 17 миллион къуруш мискинтас, зягІиптас, гІямалагартас, къиян-жапализи бикибтас дедиб. Илгъуна, адамтачи уркІеЦичевси адам сайри НурбяхІянд.

Лавашала районна багъудила управление гъалартала кьяянази дураъни багъандан Дагъиста багъудила Министерстволли ХІяпизов НурбяхІянд Министерстволла коллегияла членни викибсири.

Районна бекІла выборти диэс гъалав ХІяпизов НурбяхІянд халаси районнис бекІдеш дарес, районна экономика, гІядлу-зегъа, низам-къяйда, гІяхІдухъахъес, халкъла тІалабуни детерхахъес вирусал, хІейрусал верхІна пикриухъи, гур сабри районна бекІ ветаэс кандидатура гъалабихъибси.

«ТІяхІухъи дирути делхъ дирар». Ил халкъла духуси гІякълу, мурхъси пагъму пикрилизи касили, чумра дуги гъанкІ бемцІахъурли, паргъатдешагарти бурхІни дуркІули, пикрумала къикІа ветаурли, гур сабри НурбяхІяндли кандидатура гъалабихъибси.

1997 ибил дусл мартличир детаурти выбортачив НурбяхІянд ХІяпизович Лавашала районна бекІ ветаур. Ибкъти жалтазиб сархибси – ил халаси чедибдеш сабри, районна халкъли бихъибси халаси игъдибарра сабри.

Халкъли сунечи бихъибси игъдибар марбарес, илдала хІурмат сархес, район чІумати кьяшмачи тІашбатес чараагарли гІягІнилири.

Районна бекІвиубти цаибти бурхІначивад НурбяхІянд вархъли узес вехІихъиб.

Узес вехІихъиб арадешра, цІакъра, бузерила устадешра ахІерхІедарили, дуги-хІери цадарили, адамтала уркІбази гъуни бургули, илдала челукъути зугІлуми детерхахъес къасана вицили.

Илкъяйда, вархъли узухъели сайри ил 12 дус районнис бекъдеш дирули калунсира. Цархъилтани къяйда гъалабла хъянчизарти акъухъебатурли, илди бузахъес батур, сунечи къаршитира балли, амма сагаси тяхъярли, заманала тлалабуни хъясибли, къалп агарли.

Итгъуна бархибси, экономика палакатси, халкъла яшав мискинси, халкъ хъянчиагарли къяйцъибикъуси замана районнис Нурбяхъяндгъуна халкъличи уркъи изуси пагъмукар руководитель къаршиикни халаси игъбар сабри.

Илини гъуни чебиахъути дусмазир районна халкъла бекълахъудилизир, социальный агилизир дахъал дарсдешуни диуб.

Гъелакабухъунси шила хозяйство гъалабяхъи арбукиб. Цъедешлизибад, овошуназибад, мицъираглизибад кайсуси продукция имцъабилахъуб.

Имцъакадиуб хала хъяйванти, маза. Хала хъяйванти 20 азирличи, маза 285 азирличи адикиб.

Бекълахъудила ва экономикалашал район республикализиб цаибил мерличи дураиб. Лебгъеб халаси хъянчи бариб строительстволизиб. Лавашала шилизиб 1300 адамлис мерани лерси спорткомплекс, Микъихъиб 600 адамлис спортла калалгъя дариб. Илди калалгънани келра ши жагадарили сари.

Цъудахъараб, Цъухтаб, Эбдалгъяялизиб, Уллугъяялизиб, Наскентлизиб, Къакъамахъилизиб, Чебяхъи Лябхъуб, Къулецъмаб спортла залани дарахъиб.

Микъихъиб, Гъяялахъяблизиб, Зуримахъилизиб, Хъярлябхъуб, Чебяхъи Гъяршиб, Гъярада-Цъугълиб, Чуниб, Урмаб, Кутишаб, Тилагуб, Бурганиб, Хакитлаб, Жангамахъилизиб школабас юртани дариб.

Илала дурад, школабала дуркъа юртани ремонтдарахъиб, классунас сагати хъулри имцъадарахъиб.

Лавашаб реабилитационный центр, шимазир ясли-садикуни, клубуни, фельдшерско-акушерский пунктани, шимала администрациябас юртани дарахъиб. Райцентрла лерилра учреждениеби ремонтдариб, къулайси куцличи душиб.

Райцентрлизир налогунала инспекциялис, казначействолис, прокуратуралис, маслигъятла судлис, ЖКХ-лис, финотделлис, цъа дилшахъантала частьлис сагати юртани тлашдатур. Дейгъалли, Нурбяхъянд Хъяпизовичли районнис бекъдеш дируси замана 20 сагати школа, 18 спортзал, шимала администрациябас 10 юрт, 8 фельдшерско-акушерский пункт, 8 клуб, дурхъинас 7 ясли-анхъ дарахъиб.

Нурбяхъяндла сипта хъясибли районна шимала халкълис къуллукъличи каиб ТБС (мерла телевидение).

Райцентрлизир ва шимазир жагати юртани, дахъал тукенти дакъудиуб. Райцентр шагъарличи мешубикили саби.

Игитуну бузерили абилкъа. Бузерила игит сайри Нурбяхъяндра.

Районна бекъли, сай гъяхъиси спортсмен ва тренер сайхъели, лебгъеб халаси пикри бяхъичиаиб физкультураличи ва спортличи.

Школабазир ва шимазир спортла залани дарахъиб, спортла школаби акълахъуб. Илар мушлукъябала, боксла, шашкаби-шахматунала, кункси атлетикала, волейболла секцияби акълахъуб, илдази школабала бучъанти ва шимала жагъилти алавбуциб.

Лавашала районнизиб спорт ахъси даражаличиб биъни багъандан, илар халкъани-ургарти спортла турнирти дурадуркъутири. Гъар дус Лавашаб миллатла спортла журабала шайчиб гъалабдеш багъанданси Дагъиста чемпионатра дурабуркъусири.

Адамли се къасбаралра, иличи виур. Буралли шурла къакъъличибра хъу бетарар.

Районна шимала спортсментани республикализир, Россиялизир, дунъя-личир гьаларти мерани дуциб. Районна мушлукьябани республика, Россия разидариб. Масала, МикІхИвадси мушлукья ГІисаев ГІяли азадли мушул вашнила шайчив Европала чемпион ветаур. КъулецІмавадси ГІябдусалам ХІядисов Россияла, Европала, дунъяла чемпион ветаур. Лавашавадси мушлукья Расулов МяхІяммадрасул дунъяла чемпион ветаур.

Пахрубарести чедибдешуни сархиб районна боксертанира. Хажаламахъилизивадси боксер Къурбанов МяхІяммад дунъяла чемпион ветаур. Ил шилизивадси Жабрагиллов МяхІяммадрашид Европала чемпион ветаур. Районна шел боксер Россияла чемпиони бетаур.

Къуппабадти МяхІяммадов МяхІяммадкадил азадли мушулбашнила шайчив дунъяла чемпион, Умаханов Сайпутдин ва Расулов ХІямзат дзюдола шайчиб чемпиони бетаур.

Дагъиста ва Россияла урибси учитель, Россияла багъудила отличник НурбяхІяндли лебГѳеб халаси цаъкъ, багъуди, опыт дяхІчиаб районнизиб багъуди гъалабяхІ арбукес.

НурбяхІяндлис учительти сунела тухумтиван дигахъи, илдала бегІталагъуна хІурмат бири, илди гъар се-секІайзиб бегІгъалаб гѳеббурцахъес къарайчив вири.

«Учительти наб дебали ахІерти, дурхъати, уркІилис гъамти адамти саби. Илди чебаибхІели, уркІи харибирар. Учитель бегІ гъалав гѳевурцес гІягІниси адам сай. Илини бучІахъути дурхІни багъудичебти, бяркъчебти, дагъричебти биалли, челябкъалалис хъулчи илизиб саби», – викІи ХІяпизов. Учительтала хІурмат ахъли калахъес, илдала бузерилис лайикъси къимат бедес мурталра чекайзурли вири.

Илкъяйда халаси пикри бяхІчии илини тухтуртачи, илдала бузериличи, яшавла шуртІрачи.

«Тухтуртира гѳеббуцес гІягІнити саби. Илдани саби зягІипти сагъбирахъути. Илдас бузериlara яшавлара шуртІри акІахъес гІягІнити сари», – викІи ил. Районнизиб бегІ гъалаб учительтас бири алапалис арц дедлугути. КъанхІебиахъубли тухтуртасра алапа заманаличиб бедлуги.

НурбяхІянд ХІяпизовичли халкълис къуллукъбирниличи бекІлибиубси, гъалаб-гъалабси пикри бяхІчии.

Илдала зугІлуми, челукъути суалти арзес, яшавла шуртІри ункъдиахъес чекайзурли гъар бархІи узи. ЖумягІла духІнар адамти къабулбарес чедаахъибти кІел бархІи диалра, илини адамти гъар бархІи, мурт бакІалра, къабулбири.

Районна бекІличи чула челукъути, чула зугІлуми дурес гъар бархІи шимазибад, махъурбазибад адамти баши. Баши чула суал ирзниличи умутбихъили.

Перерывла замана хъайгІи арукъес гъунчи дуравхъунхІелира сунечи чи-биалра дугъаизалри, чариубли, дугъаизурсила мурад бири. Илини адам къабулири чинав-дигара, мурт дигара. Ил багъандан сайри ил халкълис вигуси, халаси хІурмат бируси. Я советский замана, я демократияла замана НурбяхІянд къяйда халкълис вигуси руководитель хІейуб.

«Адамличи диги – илдикІун чучив адам бегІлара ахъихІи айцахъути дуклуми сари» (А.М Горький).

НурбяхІяндлизир адамтачи уркІи-уркІиларадти, гъарли-марти диги дири. Сунела адамдешли, дамус-хатирли, адаб-хІяли район жагара бариб, гъалабяхІра арбукиб.

Адамтала ургала гІяхІил биахъес, илди цабалги, даршули, узбиван хІер-
биахъес халати къайгъи-хІяракат дариб ХІяпизовли.

Районнизиб капустала халаси сабухъ кайсули саби, амма илди дицес
къиянни саби, халкъ инжитбирули саби. Ил къияндеш пикрилизи касили,
районна бекІли гІяскургала частаначил капуста асахъес вягІдурти дири. Ил
халаси кункдеш сабри халкълиса барибси.

Учительтас, тухтуртас, бюджетникунас алапаби, дурхІнала пособиеби,
пенсияби кабизахъурси замана къанхІедиахъубли луги.

НурбяхІянд районна бекІла къуллукъуначивад арякъунхІейчирад иш-
бархІиличи бикайчи, чедир гъандушибти алапаби, пособиеби, пенсияби гъа-
чамалра къанхІедиахъубли хІегиб. Къанра ибхІели 10, 15 ва гъатІира имцІали
бурхІнала къандирахъули сари.

«НурбяхІяндли сунечил барх районна бюджет арбухисив?!» – или
учительти, тухтурти, пенсионерти, пособиеби кайсути зигарбикІули саби,
къабулагарли саби. Илдани ХІяпизовла агри багъур.

НурбяхІянд ХІяпизович халахІерхуси, уктемдеш агарси, хІякимра или
чевкад хІерхІейкІуси гІядатла адам сайри. Адамдешла дегІлара гІяхІтигъунти
къиликъуни лерри илизир тѧп нешли даркъибтиван.

Илини адамтала уркІбази гъамадли гъуни бурги, сунечи разибиэсли гъай-
икІи, адамтала зугІлумачи, сунела хъалибарглайчиван, лехІихъи.

Районна чиди шилизив, чиди махъилизив адам вебКалри, децІ барес ваши.

Ил шимази ваши адамти зугІяйзи бикибхІели, мусибат бакІибхІели, илдала
децІ бутІес гІяхІти гъай дурили, илди уркІичеббарес. ХІяпизовли сунени
чесибси секІал хІякъикъатлизиб бетурхахъи, сенахІенну ил гъайра баркъудира
цаси адам сайри.

Ил уркІила хІялалдешличил, сабурличил адамти къабулбируси, илдала
мурад бируси руководитель сайри.

Лавашала район 70 дус биънила шадлихъличи вакІибси Дагъиста пра-
вительствола председател ШихсягІидов Хизрини ишдигъунти гъай дуриб:

«ХІурматла районна жамигІят! Ишгъуна къиянси замана хІердирухІели,
НурбяхІянд ХІяпизовгъуна руководитель левни – хІуша лебталалра игъбар
саби».

Правительствола бекІли сегъуна къимат бедилли ХІяпизовла бузерилис!

Илала халал пасихІдеш, гъунар сабри – лерилра къялубачи чеветаили узес
бални. Ил замана мутІигІбарес бажардиикибси, ахІмакъ хІянчизар сайри.

Дагъиста хала хІякимта ХІяпизов чиди-дигара замана къабулирисири,
сенахІенну илини район гъар се-секІайзиб дусличи дус гъалабхІи башахъи,
мурталра гъаркъятала лугІилизиб бирахъи.

Илгъуна хІурматла вегІ районна бекІ, мажахІят леври вииши итхІели
Дагъистайзив!

Районна бекІли халаси пикри бяхІчиини халкъ шинничил гІеббурцниличи,
гъундури дирниличи ва ремонтдирниличи, къакъурби къирли дурцниличи.
Илдигъунти хІянчи дирутири райцентрлизири ва шимазири.

НурбяхІянд бажардиикиб Лавашала район бегІ гъалаб газличил гІеббу-
цахъес. НурбяхІянд ХІяжиевич сецадхІи районна бекІли узули калаллири,

хІякимтас, министртас, халкълис вигахъи, сенахІенну район дусличи-дус гъалабяхІ башахъулли, халкъла яшавла шуртІри ункъдикІахъулли.

Сепайда, мурталра хІякимдеш хІедирар. Районна шимазибад зугІяла, челукъуси лебли чучи адамти бакІалри, НурбяхІяндрала илала хъунул РайхІянатра берхІиван дяхІ шалали гъунибии. Чула лебсигъуна гъалабихъили, дуббатли балхи, гІур зугІялаличила хъарбии ва илдала мурад бири.

НурбяхІяндли ва илала гІямрула гъалмагъ РайхІянатли кІел урши ва кІел рурси халабаахъили, бяркъ-багъуди касахъили, гІямрулизиб мер баргахъили, хъаллабариб. НурбяхІянд ХІяпизович вебкІили хъалли, халкъла уркібазив мурталра мицІирли кавлан.

НурбяхІянд хъумхІерту Лавашала районна учительтани, тухтуртани, пенсионертани, пособиеби кайсантани.

**ВебкІнира селра ахІен
Хабар гІелаб батурли,
Адамтала гІямрулис
Къяца гІал ветатурли.**

**ХІу Лавашав левхІели,
Байрахъ бири райойзиб,
Гъар мурталра ил бири
Гъаркъятала къяйлизиб.**

**ХІела агри халал саб
Районна къяя халкълис,**

**Ил гъатІира халал саб
ХІела узи-уршилис.**

**Халкъличи, гІямруличи
Вахъ карцІли, вахъ хІясратли,
Дунъя батурри хІуни,
Ва ХІяпизла НурбяхІянд.**

**Аллагъли вархъааби
Алжанала гъуйчира,
ХІед нурла чирагъааб
ЦІябси хІябла хъалира.**




*Дарган писатель Ибрагъим Ибрагъимовлизи ва илала
узи-уршилизи ахІерси узи*

ГІЯХІМАД

*ГІямрулизибад шалгІевухъниличил бархбасахъи халаси
пашмандеш балахъулла.*

*«Гъалмагъдеш» ва «Лачин»
журналтала редакцияла хІянчизарти.*

Фольклор



Мяхъяммад КЪАРАТОВ

ГЪЯМУЛТАЛА КЪУЦУРИ

Уили сай ца шилизив ца адам сунела шила ва унраличирти цархъилти шимала адамти Гъямултачил селичи-дигара бирхарахъуси ва биргъябиргуси. Илгъуна «пагъмула» вегъ илис адамтани Гъямултала къуцури ибси чеу бихъили буили саби.

Гъачам гумайлизи кабибхъели, гумайла агълула Гъямултала къуцурличила гъай детаур: илала Гъямултачила, илини чи-дигара виргъявиргес вирниличила. Илхъели гумайлизиб лебри унраличибси шилизибадти чумал адамра.

Гъямултала къуцурчила дурутаци лехъахъили гъергъи, бакъибтазивад ца викъули сай: «Ну гъачамалра чилилра виргъявиргибси ахъенра. Хъушала Къуцурлира виргъяхъергура. Виралли виргъяваргаба илини ну, – плугъухъи сай вакъибси.

– Бемжур жал вакъибсилара гумайлабти цашилантаalara ургаб. Илдала жалла ахир ишгъуна сабри. Эгер вакъибси унрашан виргъяхъейалли, лебилра гумайлаб лебтани гъачам-гъачам, гъяхъси хурегра барили, ил гъяхъладли живарес. Удиикалли, белгъи гъяхъси кигъара, илини, гумайлабти лебилра жибарили, гъяхъяддеш дарес.

– Чинав варгес вирару ил хъушала Къуцури? – хъарбаиб гъяхъялли.

– Гумайлизив агарли гъергъи, сунела хъулив ургар буриб илизи.

Унра шай Къуцурла юрт хъарбаиб ва иличи арякъун.

Гумайлизи лъякъуси Къуцурли, илаб сунечила гъайбикъули бакъиб ва, гумайла гъалли мякълабси гъятъбиубси буркъа мижитла гъела гъашизурли, сунечила дурибти лерилра дакъиб. Ил хъярхъли илавад ветяхъиб.

Унра шан Къуцурла юртлизи вякъун. Ил хъулив хъергиб. Ил арякъун шилизибад гъарахъли ахъенси къадализи. Хъар-хъарикъули, ил чеибтани бурили, Къуцури арякъунси къадализи арякъун унрашанра.

Илав унрашай чеили сай, гъабухъунси шурлизи хъуцърумира ибкъаили, гъашизурси адам.

– Хъу сайрив Гъямултала Къуцури? – хъарбаили сай.

– Сайра, се дигулри хъед набзибад? – хъарбаили сай Къуцурли.

– Хъуни бахъал адамти биргъябиргулри бикъули саби, вирадли нура виргъявиргаба. Ну виргъяхъейрус хъигъив, я чилилра виргъявиргибси ахъенра. Вирадли виргъявиргаба.

– Дила гъямултала къуцури хъулиб кали саби. Ил агарли вирхъейрус хъу виргъявиргес, – викъули сай Къуцури.

– Вякъи ха гъатли ил хъела къуцури, сегъуна сабил наб чебаэсра дигину.

– ЧехЛебиулрив иш шури кабиркули? Иш кахЛебикахъес тIашизурсира. Кабикалли, их шанги шинни бужуси гIиниз заябиру. Илбагъандан шури кахЛебикахъес тIашизурсира, хъуцIрумира ибкъаили. Ну, хъули вякъи, къуцури хайчи хIу тIашизадли иш шурла уди, лебхис дила къуцури.

Къуцури хес арякъунси хIякъули, хъуцIруми дамсурли, изули цIумикIулри шурлизи ибкъикибси. Ил вахъхIи уулигу хIякъули или, цIумбикIулри гумайлабти.

Къуцури биалли илдала авара агарли, хъулив тахличи геркайзурлири. Гумайлабтани ца адам вархъиб Къуцурличи хъули, ил хъулив саял, ахIенал багъахъес ва баягъи иличи арякъунси адам сунечи вакIибал хъарбаахъес. Къуцури баягъи ну виргIявиргес виралли виргIявиргаба или вакIибси адам чинав саял, илини се бирулил бурили сай гумайла вакиллизи.

Къуцурличи вархъибси гумайлизи вакIили, Къуцурли бурибси бурили сай. Гумайла агълу абизурли лебилра арбякъи саби «шури кахЛебикахъес» или увяхъибси унрашан левихIи. Бетаили хIербикIалли, ца хъуцIар гъачам ибкъиули, цархIил гъачам ибкъиули, илди хIилизидушили, шурла удив унрашан.

– Ягъари се бирулри хIуни ишаб, хъуцIрумира хIилизи гIеладушили, шурлизи ибкъикайзурли? – бикIули саби илизи.

– ХIушала Къуцури сунела гIямултала къуцури хес арякъунси сай. Ну виргIявиргес ил агарли вирус ахIенра или. Сен саял вахъхIи уули сай ил хIякъули.

– УввацIи шурла удивад, итини хIу жявлил виргIякаргилрину, – бикIули саби бакIибти.

– УвхIейцIус ит вакIайчи, итини къалли буриб ну уввацIасли шури кабиркур или.

– КахЛебиркурну, уввацIи илавад. Ил илаб или кабизурли азирти дусми буибси сабину, – ил зулмудан уцили увасили саби шурла удивад.

Шури кахЛебикили калунхIели сайри ил вирхаурси сай виргIявиубли виъниличи. ВягIа барибсиван, илини къянахIейубли, гIяхIси кигъара белгъи, цархIилти деркести-держестира асили, гумайла агълулис сяхIбат барили сай.

ЦА КЪУМЛА КЪАБАКЪУНИРА ЦА ТIАКЪАЛА МИРХЪИРА

Гъаннаван вегIлис дигухIели асес декъ хIедири гъалар. Гъарилли вегIла хъуличирад дакIахъибти ризкъи, унци-уркура агарсили къакъличи гIелахъили, шинкъала духили, дукъутири. ИтхIели хIуркIби мякълар лерти лерилра шимазир шинкъби дири. Илди шинкъбазир ризкъи дукъутири алавчарти шимала халкълира.

Ахъуша айухIели «ГIела хIеркI» бикIуси мер леб. Ил мерлис гъалаб «Улагъа шинкъбала къярд» или бикIутири. «Улагъа» сен бихъибсирил нуни хIебалас, амма илар дахъал шинкъби дири.

Илди шинкъбала цализир делкъес таврализир анкIира духили, ца мурул адам вякъи сай. Чекъурли сунела ризкъира, тамбакула папрусра пIагъбарили, шинкъала гъалабси къаркъаличи кайили сай. Ил замана шинкъала, гъалавсилагъуна тавралар ризкъира сайра, ца гъатIи мурул адам вакIили сай.

Урхам лукъулри, кIелра мурул адам, шинкъала гъала кабиили, папрусунира пIагъдарили, ихтилатбикIули буили саби.

– Ваши, ризкъи делкъи тамандиайчи анцIхIебукъахъес ца-ца хабар дурехIе, чидилли халаси къяна бурес бажардидиркехIел. Чедикибсилис удикибсини сунела декъ дедесли, – викIули сай кIинайс вакIибсилизи гъалав вакIибси.

– ГIяхIси саби, къабуллира хIуни бурибсилечи. ВехIихъи хIу, – къабуликили сай къанни вакIибси.

– Ишдус ахIи, ириъ ахIи, гъабил дусра ахIи, итис гъалабси дус диркъанивси ца гIяхIяйчи хъуравнубхIели, илини гIяхIти, дахъал дашути къабакъ-

унала кьум саби, ма хІунира убати хьулиб или, ца кьум гибсири наб. Хьули чарухьунхІели, ил кьум нуни юртла, берхІи абулхьуси шайчибси улкьайла уди убатурсири. Дубуртазир гьалахІеб ванадиубси замана сабри. Ца чумал бархІила гІергьи ил кьум чебакиб. ГІур ил илцадра хьярхъли тІинтІбиуб. Лерилра азбар-гІяя, юртла алавлa кІийна-хІяйна ласбиубли вяшухьес мер кахІелун. ГІур шила кьакьурби дицІахъиб, халаси шила дура дурабухьун, чуйнал ши алвбариб. Дикьурти кьабакьуни дучили бекІдиубхІейс гІуррара дилкьутири, сагали вавнани бирхьусири. Кьабакьуни дурчули лебил шанти бузутири. КъантІли бурасли, секІал кабихьес вирути мер-муса дилара, унрубалара, бахьал шанталара дицІибтири кьабакьунани. Илдала пай хІебаибси шилизив чилра кахІелун. ГІяламатла дахьал кьабакьуни дакІибтири ил ца кьумлизирад. Амма ца гьачамалра велкьайчи укес хІебикиб наб. Гьанна хІунира бура, – таманбарили сай илини сунела хабар.

– Нуни хІези бурасли, дила хала дудешла, хала нешла дудешла сай вегІти мирхъила даршал тІакьа лертири. Гьар бархІи савли дурадулхьухІелира, бархІехъ чардухъи тІакьнази адицІухІелира, нуша кІилинра лерилра тІакьназирти мирхъи ца-цали дуйгІутири. Гьачам, ца бархІи бархІехъ дуйгІухІели, ца тІакьаларти мирхъилизибад ца камбиуб.

ХатІадикили дургехІе или, дураили ил тІакьаларти мирхъи, гІурра сагадан дейгІунра. Сеннира ца мирхъи хІебиулри.

Нушани кІелра мирхъилигІир умцІули ши-алавти лерилра мер-муса чедидахъира, гьеч баргес хІедиубра. Вамсурси хала дудешла хала дудешла дудеш хьулив ватурли, ну ХІурхъала дубуртази, илдасра гІеларти гуржнала ванати мераначи ваира, амма мирхъи чинабалра баргес хІейубра. Вамсурли хьули чарухьунра. Байхъала сагІят бамсрира ахъили, къацІлира уки, гІуррара дураухьунра, мирхъи хІебаргили хІебалтас ибси къасличил. Ил бетахъили или хала дудешла хала дудешла дудешра децІлизи бикилри. Вирасив гьатІи ну паргъатли кайили уэс, ил децІлизи викахъили, байтарман биаб сабину, ца мирхъи багъандан?

– Иш гьакІлис нуни гьуни буцира диркьанибхІ. Ахъили гІяхІцад гьунира, умцІурра ил шайчирти мер-муса, вацІа-къада. Гьеч нушала мирхъила кьаралди чебаэс хІейрулри. ЦархІилти сецад-дигара кьаршидикиб.

Хьар-хьарикІули хьалли, наб кьаршибикибти бахьал адамтазибад цалилра чехІебаилри. Диркьа-таркамала ванзурби чедиуйхІиб камси бамсриахьес дубурла бекІличи кайибси замана, хІерикІулрагу, ца гІяхІил гьарахъихІив, диркьала халаси авлахъличив ванза балцули узуси адам хІясибиуб. ХІулбира душкили, гІяхІил хІеризуррагу, илаб халаси нугъай унцличил барх дукІлизи бабгили нушала мирхъи бузахъули чебаира.

Вахъ дебали гІясивиубли, дуцІикІули халаси гьуни камси заманала бухІнаб ахъили, ветаира хьу балцуси диркьаланничи. ВаятІа вехІизурли мирхъи дукІлизи бабгибсиличира, бамсурси мирхъи дукІлизибад батаира. ХІерикІулрагу, дукІ суркбикІули мирхъила хьяблизиб бетаурси халаси жижкІа. Ил хІяршбарили, суркбарили, мирхъилис гІяхІил биахьес виркьули левли, сунела вегІебш, жижкІа баргбердили ва илала бухІнабад се сабил белкІунси кагьар дурабикиб.


Ил мерличи ваибхІели хабар буруси лехІкахъили сай.

– Эй, ил кагьарлизи се белкІири? – яхІбарес хІейубли, хьарбаили сай лехІихьусини.

– Ил кагьарлизи белкІири, ил хІела декьла тавра наб гахьес или.

Илкьайда хабуртала абз вяшбарибси сай удикиб, декьра ардухахъиб валикьянази. Илала биалли къас сабри итилла декь сунесдарес.





ISSN 0235 - 0149

Индекс годовой 31176
Индекс полугодовой 73892

